

San Juan

Ñu waĩcũgu ipũre gojadigu Jesucristore ĩamuriĩnumi. Jesucristo i yebare buhecũ Ñu ĩgu buhegu árĩmuriĩnumi. Eropigu Jesu sĩridigu masa muria ĩgu Pagu pohro mũriara pũhrũgue Ñu ipũre gojaĩnumi.

Cristo masu ta árĩnũgaĩnumi

1 ¹Negohraguere i yeba árĩboro coregue ta Cristo mata árĩmũhtamũrituhapu. ĩgu Goĩmũ mera árĩpu. Eropigu ĩgu Goĩmũ ta árĩcũgu iipu. ²Matague ta Cristo Goĩmũ mera árĩpu. ³Eropigu i yebare, umũsire árĩpehrerire ĩhacũnugudorepu Goĩmũ ĩgũre. Eropigu masa sãre ĩhacũnugudorepu ĩgũre. Eropigu irire ĩhacũnugupehopu ĩgu Jesucristo. Eropiro irire ĩgu ĩhacũnugupehobiricũ i ne mariboya. ⁴Cristo ojocaririre ogũ ģhrimi. Boyocũ mari mari basi õaro mari ĩha masiro dopa ta, ĩgu mari Pagũre õaro ĩha masicũ iimi marire. Eropigu i yebare eragu mari Pagũre masicũ iimi masare. ⁵I yeba majarã erã guĩaricũri naitĩaro iro dopa ñeri ģhraa. Jesucristo boyogoro dopa ta masa pohro eragu erã Goĩmũ yare masicũ iimi. Eropiro naitĩariĩne, boyoriĩnere ne tarinũgabiro dopa ta Cristore ñeripu ne tarinũgabiriyoro.

⁶⁻⁷Goĩmũ Ñu waĩcũgũpũre obeomũhtapu Cristore quere aĩgã weremũhtadoregu. ĩgu obeodigu Ñupu eraa guare masare Cristo ĩgu ariburire weremi. ⁸Ñupu Cristo árĩbirimi. Eropa árĩbiriqeregu ta ĩgu Cristore masare wereyumũhtagu árĩmi. ⁹Cristo boyogoro dopa ta árĩgu árĩpehrerã masare Goĩmũre masicũ iibu i yebaguere aridigu árĩmi. Diaye ta ģhraa. ĩgu masare masicũ iigu ta ģhrimi.

¹⁰Eropigu Cristo i yebare árĩdigu árĩrimi. I yebare ĩhacũnugudigu árĩpu. ĩgu eropa árĩquerecũ ta i yeba majarã ĩgũre ne ĩha masibirinirã árĩma. ¹¹Ĩgu ya yeba ĩgu masa dehyoadigu árĩrimi. ĩgu ya yeba ĩgu masa dehyoadigu árĩquerecũ ta ĩgu ya yeba majarãpũ ĩgũre ne gamebirinirã árĩma. ¹²Erã eropa gamebiriqerecũ ta árĩpehrerã ĩgũre gamerãpũre erãre Goĩmũ ĩgu porã árĩcũ iimi. ĩgũre umupeorãre árĩpehrerã Goĩmũ ĩgu porã árĩcũ iimi. ¹³Erã Goĩmũ porã ta ģhrima. Eropirã masa erã gamero Goĩmũ porã wabeama. Goĩmũ gamero mera ĩgu porã wahama.

¹⁴Eropigu Cristo ĩgu masu ĩgu árĩnũgara pũhrũ mari mera árĩmi ĩgu. ĩgu eropa árĩcũ ĩarã masare mahigu, diaye majare ĩgu wereniguigu árĩcũ gua masibu. ĩgu

dihta Goãmũ magũ árĩgu turagu árĩmi. Ĩgu eropa árĩgu árĩcũ gua masibũ. ¹⁵Ñu waĩyegu ĩgu buherogue Cristo eracũ ĩha õpa arĩ gaguĩniguĩmi guare weregu:

—Sihĩ ahrimi yũ mũare weredigu. Ĩgu yũ puhru masa dehyoadigu ãhrimi. Eropã árĩqueregu ta yũ tauro turagu ãhrimi. Ĩgu yũ masa dehyoaboro coregue árĩtuharũ. Eropigu ĩgu yũ tauro ãhrimi. Yũhũ mũare eropa arĩ weredigu ta ãhrimi ihĩ, arĩmi Ñu guare.

¹⁶Ĩgu Cristopũ õagu turaro masare mahigu árĩgu marire árĩpehrerãre õaro iiniguicãmi. ¹⁷Goãmũ dorerire Moisepũ apimũhtarũ marire. Jesucristopũ Goãmũ masare ĩgu mahirire buhegu árĩmi. Goãmũ ĩgu diaye wereniguiri sãre buhegu árĩmi ĩgu. ¹⁸Masa ne Goãmũre ĩabeama. Ĩgũre mari ĩabiriquerecũ ta ĩgu magũ ĩgu turaro mahigu yujugu ta árĩgũpũ ĩgu Pagũre marire masicũ iimi.

Gajirã Ñu waĩyegũre serẽpiũma

Mt 3.11-12; Mr 1.7-8; Lc 3.15-17

¹⁹Judio masa oparã Jerusalén árĩrã pahiare, Goãmũ wihi mohmerã sãre Ñu pohrogue obeõnorã. “¿Nihino ãhriri mũhũ?” arĩ serẽpidorerã obeõnorã erãre. Erã eropa arĩ serẽpirã ejacũ õpa arĩ weremi Ñupũ. ²⁰Ne yayaro mariro weremi. Diaye ta werepehocãmi guayaro mariro.

—Yũhũ Cristo Goãmũ ĩgu masare taudoregu ĩgu obeodigu árĩbeaa, arĩmi ĩgu.

²¹Ĩgu eroparĩcũ erãpũ ĩgũre dipaturi serẽpima daja:

—¿Mũhũ Cristo árĩbigũ Eliapũ ãhriri? arĩma.

—Árĩbeaa yũhũ, arĩmi ĩgu.

—¿Gua coredigũ Goãmũ yare weremũtagupũ ãhriri mũhũ? arĩma erã.

—Árĩbeaa yũhũ, arĩmi Ñu.

²²Ĩgu eroparĩcũ erã ĩgũre dipaturi serẽpima daja.

—Guare serẽpidorenirãre gua õaro wereborõ dopa guare wereque daja. ¿Nihinopũ ãhriri mũhũ? ¿Dohpa árĩgũno ãhriri mũhũ? arĩma erã Ñure.

²³Erã eroparĩcũ õpa arĩ yũhrimi:

—Masa marirogue õpa arĩ gaguĩniguĩgu ãhraa yũhũ. Goãmũ ya weremũtagũ Isaiã mũru ĩgu werediro dopa ta werea yũ sã: “Mari Opũ ĩgu ariboro core õarã árĩyũque ĩgũre peemõrã,” arĩ masare wereyu gaguĩniguĩgu ãhraa yũhũ, arĩmi Ñu erãre

²⁴Ñure serẽpirã fariseo masa erã obeonirã árĩma. ²⁵Eropirã erã Ñure serẽpima daja:

—¿Mũhũ Cristo, Elia Goãmũ ya weremũtagũ gua coregu árĩbiriqueregu ta duhpigu masare Goãmũ ya árĩburire waĩyeri mũhũ? arĩma erã.

²⁶Erã eroparĩcũ yũhrimi ĩgu.

—Yũ deco mera masare Goãmũ ya árĩburire waĩyea. Gajigupũ mũa masibigupũ mũa watope árĩtuhami. ²⁷Ĩgũpũ yũ puhru arigu yũ tauro turagu ãhrimi. Õatariagu ãhrimi. Ĩgu iro dopa árĩbeaa yũpũ. Eropigu ĩgũre pepigu, “Bu árĩgu ãhraa yũhũ,” arĩ pepia, arĩmi Ñu erãre.

²⁸Eropa arĩ wereniguima erã Betaniague, dia Jordán waĩcũriya gajirũ masegu, Ñu ĩgu masare ĩgu waĩyeroque.

—Jesu Goãmũ ĩgu obeodigu cordero iro dopa ãhrimi, arĩ wereñumi Ñu masare

²⁹Gajinũ Jesu Ñu pohro ĩgu aricũ ĩagu Ñu õpa arĩmi guare:

—Ĩaque. Ihĩ Goãmũ ĩgu obeodigu ĩgu cordero iro dopa ãhrimi. Cordero mari ñeri iira dipuwajare sĩriro dopa ihĩ sĩrigu i yeba majarãre erã ñero iirare cóãgũcumi ĩgu. ³⁰Ihĩ ta ãhrimi yũ õpa arĩdigu: “Yũ pũhrũ arigu yũ tauro turagu ãhrimi. Yũhũ masa dehyoaboro core ĩgu matague ta árituhapũ. Eropigu ĩgu yũ tauro turami,” yũ arĩdigu ihĩ ta ãhrimi. ³¹Yũpũ ĩre Goãmũ magũ ĩgu áririre masibirinibũ. Eropa masibiriqueregu ta deco mera waĩyegũ arigu iibũ yũ acawererã Israe masa ĩre erã masiborore, arĩmi Ñu.

³²Eropa arĩtuha Ñu werenemomi:

—Espĩritu Santo ɔmarogue buja iro dopa bejagu Cristo weca dijarimi. ĩgu weca ĩgu dujanugacũ ĩabũ. ³³Ĩgu weca dujanugajacũ ĩha ĩgure ĩha masibũ. ĩgu yũre masare deco mera waĩyedore obeodigu Goãmũpũ õpa arĩ weremuhtatuhami yũre: “Espĩritu Santo dijari ĩgu weca dujanugajagu ĩgu ta árigũcumi. ĩgũpũ Espĩritu Santore masa mera eropa árinigucũ iigu árigũcumi,” arãmi Goãmũ yũre. ĩgu yũre eropa werebircũ ĩha masibiriboya ĩgure. ³⁴Dohpaguere ĩgure ĩha masituhaa yũhũ. Eropa ĩha masigu “Diaye ta Goãmũ magũ ta ãhrimi,” arãa yũhũ mũare, arĩ weremi Ñu.

Jesu buherã ĩgu ne sihunũganirã áriñuma

³⁵⁻³⁶Gajinũ Ñu mera gua perã ĩgu buherã ĩgu mera gua nigucũ, Jesu gua pohro tari wahgãgu iimi. ĩgu eropa tari wahgãcũ ĩagu Ñu dipaturi õpa arĩmi guare:

—Ĩaque. Ihĩ Goãmũ ĩgu obeodigu cordero iro dopa árigũ ãhrimi, arĩmi Ñu.

³⁷Ĩgu eroparĩcũ gua perã ĩgu buherãpũ ĩre peerã Jesure nũrũsiagãbũ.

³⁸Gua eropa nũrũsiagãcũ ĩagu Jesu guare maji ĩha, serẽpimi:

—¿Nohogue wahari maa? arĩmi ĩgu guare. ĩgu eroparĩcũ gua sã ĩgure serẽpibũ.

—Buhegu, ¿nohogue ãhriri mũhũ? arĩ serẽpibũ gua ĩgure.

³⁹—Yũ mera arinijarã, ĩarã arique, arĩmi guare Jesu.

Ĩgu eroparĩcũ guapũ ĩgu árirogue ĩarã wabũ. Irisubũ ñamicague cuatro hora áribũ. Eropirã iri ñamire ĩgu mera dujabũ gua.

⁴⁰Gua perã Ñure peerã, Jesure nũrũsiagãrã yũ mera majagu Andre mera áribũ. Andrepũ Simo pagũ magũ arĩmi. ⁴¹Eropigu ĩgu mata ĩgu tĩgure ahma boca, õpa arĩ werepũ ĩgure:

—Mesiare Goãmũ marire taubure Goãmũ ĩgu obeodigũre bocabũ gua, arĩpũ Andre Simore. Mesia ero majarã ya mera arĩrã, Cristo arĩrã iima.

⁴²Eropa arĩtuha ĩgu Simore Jesu pohro aĩgãmi. ĩgu pohro erã ejacũ ĩagu Jesupũ Simore õpa arĩmi:

—Mũhu Simo waĩcũgu Jona waĩcũgu magũ āhraa. Dohpaguere mũre Cefa waĩyegũra, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcũmi pare.

Felipere, Natanae sãre sihuũumi Jesu

⁴³ Gajinu Jesu “Galilea yebague ina warã,” arĩmi guare. Eropigu erogue eja ĩgu Felipere bocatĩri ōpa arĩmi:

—Yũ mera majagu árĩbu arique, arĩmi Jesu.

⁴⁴ Felipepũ Betsaida majagu árĩmi. ĩgu, Andre, Pedro mera yuju maca majarã arĩma. ⁴⁵ Eropigu Felipe Natanaere ahma, boca ōpa arĩ weremi:

—Goãmũ dorerire Moise ĩgu gojarapũgue ĩgu weredigũre, gajirã Goãmũ yare weremũhtanirã sã erã weredigũre gua bocabũ. Jesu Nazare majagu José magũ ĩgu ta árĩcumi, arĩmi ĩgu Natanaere.

⁴⁶—Nazareguere ne yujugu ōagu marimi, arĩmi Natanaepũ.

—Īagu arique mũhu, arĩmi Felipe.

⁴⁷ Eropi Natanae Jesu pohro ĩgu ejacũ ĩagu Jesupũ ōpa arĩmi Natanaere:

—Ihĩ dohpague arigu diaye ta ōagu judio masũ gohra āhrimi. ĩgũre ne gũyari mara, arĩmi Natanaepũre.

⁴⁸ ĩgu eroparĩcũ peegu Natanae ĩgũre serẽpimi:

—¿Duhpigu yũre ōaro masiri mũhu? arĩmi.

—Felipe, ĩgu mũre ĩgu sihuboro core, higueraгу doca mũ arĩcũ ĩhabu yũhu mũre, arĩmi Jesu ĩgũre.

⁴⁹ ĩgu eroparĩcũ Natanaepũ ōpa arĩmi ĩgũre daja:

—Buhegu, diaye ta mũhu Goãmũ magũ ta āhraa. Mũhu Israe masa gua opũ árĩbu āhraa, arĩmi Natanae.

⁵⁰ ĩgu eroparĩcũ peegu ōpa arĩ yũhripũ Jesu:

—Higueraгу doca yũ mũre ĩarare masigu yũre “Goãmũ magũ āhraa,” arĩ umupeoa mũhu yũre. ¿Iri ta mũre umupeocũ iiri? Mũre yũ eropa ĩara tauro Goãmũ turari mera yũ iicũ ĩagũca mũhu, arĩmi Jesu Natanaere.

⁵¹ Eropa arĩgu ōpa arĩ werenemomi:

—Diaye ta mũre arĩgu iiaa. Yũhu masũ Goãmũ ĩgu obeodigu āhraa. Ūmarogue Goãmũ yarã anyua erã yũ weca erã dijariçũ, erã mũriacũ sãre ĩagũca mũhu, arĩmi Jesu ĩgũre.

Caná waĩcũri macague erã mojoto diriri bosenugue Jesu ĩagu waũumi

2 ¹ Ūhrenũ puhũrũ Caná Galilea árĩri macague mojoto diriri bosenu árĩbu. Eropigo Jesu pago iri wihigue árĩmo. ² Jesu gua ĩgu buherã sã erã mojoto dirirogue sihubeonirã árĩbu. ³ Iri bosenu maja vino pehrecũ Jesu pago ĩgũre weremo:

—Dohpaguere vino pehrea wahabũ erãre, arĩmo igo Jesure.

⁴ Igo eroparĩcũ peegu Jesu ōpa arĩmi:

—Meho, ¿duhpigo irire yũre wereri mũhu? Masa erã yũre masiboro duhyania dohpa, arĩmi Jesu ĩgu pagore.

⁵ ĩgu eroparĩra pũhrũ ĩgu pagopũ mohme corerãre weremo.

—Yũ magũ ĩgu dorero dopa ta iique mũa, arĩmo igo.

⁶ Irisubuguere gũa acawererã judio masa Goãmũ yare iimorã masare erã dũpũre eropa coeniguicãdorema. Eropi iri wihi seis gohra máta sorori, deco dicuri sorori árĩbũ. Iri deco Goãmũ yare iimorã erã coeri deco árĩbũ. Iri soroburire ochenta o cien litros sihajabũ decore. ⁷ Eropigũ erã mohme corerãre doremi Jesu:

—I soroburire deco mera pisãnemo ujutu dobopehocãque, arĩmi Jesu.

Ĩgu eroparĩcũ erãpũ òaro ujutu dobopehocãma iri soroburire.

⁸ Erã eropa iira pũhrũ Jesu erãre doremi daja:

—Dohpagueere iri decore waa aĩ, sihu bosenu iigũre tĩarã waque, arĩmi.

Ĩgu eroparĩcũ peerã iri decore waa aĩgã, sihu bosenu iigũre tĩama erã.

⁹ Erã tĩacũ ĩgũpũ iri decore vino poyara decore ihriĩnami. Iri vinore “¿Noho majare aĩgãrayuri erã?” arĩ pepipũ ĩgu. ĩgu eropa masibiriquerecũ ĩgũre mohme corerãpũ iri vinore tĩanirãpũ masima. Sihu bosenu iigu eropa masibirinijagũ, mojoto diridigũre sihubeo ¹⁰ òpa arĩ weremi:

—Gajirã masa òari decore vino decore tĩamũhtamũrima. Masa erã òaro ihrira pũhrũ ñequeyari vino decopũre tĩama erã. Mũpũ òari vino decore dihbu, pũhrũgue guare tĩaa, arĩmi sihu bosenu iigu mojoto diridigũre.

¹¹ Caná Galilea árĩri macague decore vino ĩgu poyacũ iira ne Goãmũ turari mera ĩgu deyoro moanũgara árĩbũ. Eropa iigu gajirãre ĩgu turarire ii ĩhmũmi Jesu. ĩgu eropa ii ĩhmura pũhrũ gũa ĩgu buherã ĩgũre umupeobũ.

¹² Pũhrũ Jesu, ĩgu pago, ĩgu pagũ porã, gũa ĩgu buherã mera Capernaumgue sihgã wami. Eroque ejarã bajamenũrigã dujabũ gũa.

Jesu Goãmũ wihiguere ejañumi

¹³ Pascua árĩcũ gũa judio masa bosenu árĩboro merogã duhyanijabũ. Eropigũ Jesu gũa mera Jerusalengue wami. ¹⁴ Eroque e jagũ ĩgu Goãmũ wihigue ñajajagũ, wecuare, ovejare, bujare duarãre bocajami. Eropigũ niyeru gohrotorã erã mesarigue erã doacũ bocajami. ¹⁵ Eropa bocajagũ yuradari mera tãraridari ii, erãre árĩpehrerãre disiporogue tãranũrũ wiumi. Eropigũ niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi. ¹⁶ Eropa iitua bujare duarãre òpa arĩmi:

—Mũa yarã bujare aĩgãque. Yũ Pagũ ya wihire doberi duari wihi iibiricãque, arĩmi Jesu erãre.

¹⁷ ĩgu eropa iicũ ĩarã gũa ĩgu buherãpũ Goãmũ ya gojarapũ erã arĩrare guñabũ. Òpa arĩ gojanirã árĩma. “Goãmũ, mũ wihire turaro mahia. Eropa mahigũ mũ wihire ñero erã iicũ ĩagũ turaro bujawerea yũhũ,” arĩ gojarare guñabũ gũa Jesu ĩgu buherãpũ.

¹⁸ Jesu ĩgu eropa iira pũhrũ judio masa oparã ĩgũre serẽpima:

—¿Duhpigü mûhû oäre Goãmû wihigue áriräre cohã wiuari? Goãmû irire mûre iidoregü áricû Goãmû turari mera ii deyoro moaque gûa ãaburire, arĩma erã Jesure.

¹⁹Erã eroparĩcû Jesu yûhrimi:

—I wihire mûa cóacû, ûhrenû pûhrû tuhajagûca yûhû, arĩmi Jesu erãre.

²⁰—Ûhrenû i wihire iisome mûhû. Cuarenta y seis bojori gohra erã iira wihi âhraa i wihi, arĩ yûhrima erã Jesure.

²¹Jesu ãgu eropa arĩrare erã ôaro pee masibirima. Jesu i wihire arĩgu ãgu dâpû waburire arĩgu iirimi. ²²Eropi ãgu sĩrira pûhrû, ãgu masa muriara pûhrû gûa ãgu buherâpû ãgu eropa arĩrare guñabû. Goãmû yare erã gojarapûre, Jesu ãgu werera sãre guña, “Iri diaye ta âhraa,” arĩbû gûa.

Árĩpehrerã erã guñarire Jesu masiñumi

²³Pascua bosenû áricû Jesu Jerusaléngue árimi. Ero ãgu áricû masa bajarã Goãmû turari mera ãgu deyoro moarire ii ãhmucû ãarã ãgure umupeoma.

²⁴Erã eropa umupeoquerecû ta Jesu masa erã guñarire ôaro masiñû, “Yûre eropa umupeoniguicãracoma,” arĩ pepibiridi árimi. ²⁵Ãgu masa erã guñarire ôaro masimi. Eropa masiñû masa ãgure erã pepirire serẽpibirimi.

Jesu Nicodemo mera weretamuñumi

3 ¹Iri maca majagû Nicodemo waĩcûgû, judio masa oparã mera majagû árimi. ãgu fariseo masa ya curu majagû árimi. ²Eropiñû ãgu yuju ñami ãgu Jesu pohro ahri ãgu mera weretamupû:

—Buhegû, mûhû Goãmû ãgu buhedoredigû ãgu obeodigû mû áricû gûa masia. Goãmû mûre ãgu itamubiricû mupû ãgu turari mera ne deyoro moarire ne iibiriboaya. Mûhû bajasuburi Goãmû turari mera ii ãhmua, arĩpû Nicodemo Jesure.

³Ãgu eroparĩcû Jesu werepû:

—Diaye mûre arĩgu iiaa. Ne masa dehyoagû iro dopa dipaturi masa dehyoagû dihta Goãmû yagû árimasimi. Mû sã eropa ta árimasia, arĩpû Jesu.

⁴—Yaho. ¿Bugupû dohpa ii dipaturi masa dehyoabocuri ãgu? ãgu pago nijji suhriroguere ñajaa, dipaturi masa dehyoa masiya mariboca ãgure, arĩpû Nicodemo.

⁵Ãgu eroparĩcû Jesu yûhripû:

—Diaye ta arĩgu iiaa mûre. Ne masa dehyoagû iro dopa ta deco mera, Espĩritu Santo ãgu turari mera dipaturi masa dehyoagû dihta Goãmû yagû árimasimi. ⁶Nome nijipo sã nome árirã, majirãgãre masa dehyoacû iima.

Espĩritu Santopû masare Goãmû porã áricû iimi. ⁷“Ne masa dehyoagû iro dopa ta dipaturi masa dehyoagû dihta Goãmû yagû árimasimi,” yû arĩcû ne pee gorowerebita. ⁸Espĩritu Santo masare Goãmû porã ãgu iicû iiri miruñe iro dopa âhraa. Miruñe iri arirogue ahraa. Iri ariro caricû mari peea. Eropa peequererã ta iri aridirore, iri waro sãre ne masibea. Eropa ta iimi Espĩritu Santo masare Goãmû porã iigû, arĩpû Jesu Nicodemore.

⁹—Mû eropa arĩrire ôaro masibea, arĩpû Nicodemo.

¹⁰ Ìgũ eroparĩcũ peeɡũ òpa arĩpũ Jesu:

—¿Mũhũ judio masare buheɡũ áríquereɡũ ta, duhpigũ yũ arĩrire peebeari?
¹¹ Diaye mũre arĩɡũ iiaa. ƒua masirare, ɡua íarare ɡua werea. ƒua eropa werequerecũ ta ne mũa ɡua acawererã judio masa ne peediabiribũ. ¹² I yeba majare yũ werenigui queoñaquerecũ ta “Diaye ta áhraa,” arĩbeaa mũa. Eropa arĩbirã Goãmũ yare yũ werecũ sãre “Diaye ta áhraa,” arĩsome mũa.

¹³ “Ne yujugũ ƒmarogue Goãmũ pohrogue wagũ ne dipaturi dujarisome. Yũhũ Goãmũ ìɡũ obeodigũ yũ dihta ƒmarogue árdigũ i yebaguere aribũ. Eropigũ yũ dihta Goãmũ yare mũare weremasia. ¹⁴ Iribojeguere masa mariroguere Moise mũrũ añare come mera erã wéadigũre yucũɡũ erã nugudigũɡue duhsiupũ. Yucũɡũɡue ìɡũ duhsiudiro dopa ta yũre Goãmũ ìɡũ obeodigũre eropa ta yũ sãre duhsiurãcoma. ¹⁵ Yũre erã eropa iicũ árípehrerã yũre umupeorã árípehrerinũri Goãmũ mera áriniguirãcoma, arĩpũ Jesu.

Goãmũ árípehrerãre mahimi, arĩ gojañumi Ñu

¹⁶ Eropa arĩtuha òpa arĩnemopũ Jesu:

—Goãmũ árípehreri yeba majarãre turaro mahimi. Eropigũ yũre ìɡũ magũre yujugũ ta árigũre Goãmũ obeomi árípehrerã yũre umupeorã peameɡue erã wabiriborore. Eropirã árípehrerinũri Goãmũ mera árirãcoma erã. ¹⁷ Goãmũ yũre ìɡũ magũre masare dipuwaja moadoreɡũ obeobirimi i yebaguere. Eropigũ masare peameɡue wabonirãre taubure yũre obeomi.

¹⁸ “Yũre Goãmũ magũre umupeorãre ne dipuwaja moasome Goãmũ. Yũre umupeobirãpũre Goãmũ dipuwaja moadoretuhami. Masa yũre Goãmũ magũre yujugũ ta árigũre erã umupeobirira dipuwaja, dipuwaja moagũcumi Goãmũ erãre. ¹⁹ Yũhũ Goãmũ magũ i yebaguere arĩɡũ boyoriñe òaro íha masicũ iro dopa ta Goãmũ yare òaro masicũ iiaa masare. Yũ eropa masicũ iicũ íarã yũre umupeobirã yũre gamebeama. Erã ñerire iiripũre turaro gahmema. Erã eropa gameri dipuwaja erãre dipuwaja moagũcumi. ²⁰ Árípehrerã ñerire iirã erã ñero iirire duhudiabeama. Eropirã boyoro iiriñe deyoro moaro dopa ta erã ñero iirare deyoro moari arĩrã yũre gamebeama. ²¹ Óarire iirãpũ yũre, yũ buheri sãre gahmema. Goãmũ yare erã iirire yũ òaro deyoro moacũ ɡũhyasĩribeama erã. Eropiro yũre boyoro iro dopa árigũre gahmema, arĩ werepũ Jesu.

Dipaturi Ñu waĩyegũ Jesure wereñumi

²² Pũhrũ Jesu ɡuare ìɡũ buherãre Judea yebague sihugã wami. Erogue ejaɡũ ero majarã mera bajamenũrigã duja, Goãmũ ya áriburire waĩyemi erãre. ²³ Ñu sã masare waĩyegũ iipũ Enón waĩcũri macague. Enón waĩcũri maca Salim waĩcũri maca pohro arĩbũ. Ero wũaro dia arĩbũ. Ero eropa arĩcũ ero majarã masare waĩyegũ iipũ Ñu. ²⁴ Erã ìɡũre peresu iiboro core Enóngue masare waĩyegũ iipũ Ñu.

²⁵ Irisubure Ñu buherã mera majarã bajamerãgã judio masa mera waĩyerire wereniguirã dũyasoñorã. ²⁶ Tuhaja erã Ñu pohrogue eja irire wereñorã.

—Buhegu, dia Jordán waĩcũriya gajipũ masegue mũ mera áridigu “Īgu ta Cristo ta árigũcumĩ,” mũ arĩdigupũ dohpague masare waĩyegu iimi. Īgu eropa iicũ áripehrerã Īgu pohrogue wahama pare, arĩñorã erã Ñure.

²⁷Erã eroparĩcũ peegu Ñu yũhripũ:

—Īgu dorerire Īgu opacũ Goãmũ ĩgũre odi árĩmi. ²⁸“Cristo árĩbeaa yũhũ,” yũ arĩcũ maa peeabũ. Eropã Cristo árĩbiriqeregu ta ĩgũ core wereyubure Goãmũ ĩgũ obeodigu áhrra yũhũ. ²⁹Ōpã áhrra iri: Mojoto diridigo igo marapũ mera árĩgo wahamo. Mojoto diridigu mera majagupũ diridigu ĩgũ marapocũcũ ĩagu ĩgũ werenicũ peegu turaro mucubirimi. Eropigu mojoto diridigu mera majagu ĩgũ mucubiridiro dopa ta yũ sã Cristo mera masa erã wacũ ĩagu òaro mucubiria. ³⁰Cristopũre umupeoro gahmea masare. Yũpũre umupeobiricãro gahmea masare, arĩ yũhripũ Ñu.

Goãmũ magũ ñmarogue aridigu áhrimi, arĩ wereñumi Ñu

³¹Eropa arĩtuhagu òpã arĩnemopũ Ñu.

—Ñmarogue aridigu áripehrerã nemoro turagu áhrimi. Mari masa i yeba majarã áhrra. Eropirã i yeba majare werenigũia mari. Ñmarogue aridigupũ áripehrerã nemoro turagu áhrimi. ³²Īgu ĩarare, ĩgũ peerare ĩgũ weremĩ. Īgu eropa werequerecũ ta masa ĩgũre ne peediabeama. ³³Ñmarogue aridigu ĩgũ wererire masa peerãpũ, “Goãmũ diaye árĩgu tiimi,” arĩrã iima erã. ³⁴Ihĩ Cristore Goãmũ ĩgũ obeodigure Espĩritu Santo ya turarire opehoñumi Goãmũ. Eropigu ĩgũ Goãmũ ya wereniguirire wereniguimi. ³⁵Goãmũ ĩgũ magũre turaro mahimi. Eropigu áripehrerire, áripehrerã sãre erã opũ arĩdoremi Goãmũ ĩgũ magũre. ³⁶Goãmũ magũre umupeorãpũ ñmũri nũcũ Goãmũ mera árĩnigũicãrãcoma. Īgu magũre tarinũgarãpũ Goãmũ pohro wasome. Eropirã ñmũri nũcũ ñmaroguere árĩsome. Eropigu Goãmũ erãre turaro dipuwaja moagũcumĩ, arĩpũ Ñu masare.

Jesu Samaria majago mera weretamuñumi

4 ¹Jesu Ñu nemoro bajarã ĩgũ buherã ĩgũ opacũ, Ñu nemoro masare ĩgũ waĩyecũ fariseo masa peeñorã. ²Erã eropa peebeoquerecũ ta Jesupũ ĩgũ basi masare waĩyebirimi. Gũã ĩgũ buherãpũ masare waĩyebũ. ³Fariseo masa erã eropa masicũ peegu Jesupũ Judea yeba áridigu Galilea yebague silu dujaa wami gũare.

⁴Galileague warã gũã “Samaria yebare tarigã warãca,” arĩbũ gũã.

⁵Eropa tarigã Samaria yebague árĩri macague Sica waĩcũri macague ejabũ. Iri maca pohro iribojegue Jacobo mũrũ ĩgũ magũ José mũrũre ĩgũ ora yeba árĩyoro. ⁶Ero Jacobo mũrũ ĩgũ deco ihrira gobe árĩbũ. Eropigu Jesupũ yorogue aridigu, ĩgũ oẽtaria wagu iri gobe pohro doajami. Irisubu ĩgũ ero dojarisubu goeri boje gohra árĩbũ. ⁷⁻⁸Gũã ĩgũ buherãpũ macague gũã barire asũrã warã pũhrũ yujugũ ta ĩgũ erore dujadoami. Eropigo Samaria majago iri gobegue igo deco waago eracũ Jesu igore deco serẽpũ:

—Deco oque yũre, arĩpũ.

9—Mũhũ judio masũ ãhraa. Yũpũ Samaria majago ãhraa. ¿Duhpigũ yũre decore serẽri mũhũ? arĩpo igo Jesure. Judio masa Samaria majarãre game ãdiabirã áríñorã. Eropigo igo eropa arĩpo Jesure.

10 Igo eropa arĩra pũhrũ Jesu igore werepũ:

—Mũre Goãmũ ãgu itamudiarire masigo árigo, mũre decore serẽgũre masigo árigo, mũpũ yũpũre serẽboaya. Mũ eropa serẽcũ gaji decore oboaya yũhũ mũre. Iri decopũ ojocarinigũicãcũ iiri ãhraa, arĩpũ Jesu igore.

11 ãgu eroparĩcũ peego igo yũhripo ãgũre:

—Ne mũre sorobu mara. I gobe sã ãhcãri gobe ãhraa. ¿Eropigũ i ojocaricũ iiri decore nohogue waabocuri mũhũ? 12 Gũa ñecũ mũrũ Jacobo iribojegue majagũ mũrũ i gobere gũare apimũripũ. ãgu, ãgu porã, ãgu ejorã sã i decore ihrimũriñorã. “Gaji decore oboaya yũhũ,” mũ arĩgũ, ¿Jacobu tauro turagũ ãhriri mũhũ eropa arĩ pepigũ? arĩpo igo.

13 Igo eroparĩcũ Jesu yũhripo:

—Árípehrerã i decore ihrirã dipaturi ñemesiburãcoma. 14 Yaha decopũre ihrirã ne dipaturi ñemesibusome. Eropirã yaha decore ihrirã Goãmũ mera eropa árinigũirãcoma. Maũ dipagãgue eropa deco wirinigũiro dopa ta yaha deco ne pehreesome, arĩpũ Jesu.

15 ãgu eroparĩcũ nomeopũ õpa arĩpo:

—Ne dipaturi yũ ñemesibubiriboro dopa iri decore oque yũre. Eropigo dipaturi õguere ne deco waasome, arĩpo igo.

16 Igo eroparĩcũ Jesu igore werepũ:

—Irisubu tamerare mũ marapũre sihugo waque. Sihutuha õgue ariqũe ãgu mera, arĩpũ Jesu igore.

17—Marapũ marigo ãhraa yũhũ, arĩpo igo.

—Diaye ta arãa mũhũ. 18 Mũhũ cincosuburi marapũcutuharibũ. Eropigũ dohpague mũ mera árigũ mũ marapũ gohra áribeami. Eropigo “Marapũ marigo ãhraa,” arĩgo, diaye ta arãa mũhũ, arĩpũ Jesu igore.

19 ãgu eroparĩcũ peego õpa arĩpo igo:

—Ne, Goãmũ yare weremũhtagũ ãhraa mũhũ yũ pepicũ. 20 Gũa ñecũ sumarã mũra irigũ utãgũgue Goãmũre umupeomũriñorã. Eropirã mũrapũ judio masa “Jerusalẽngũe masare Goãmũre umupeoro gahmea,” arĩmũribũ mũa judio masa, arĩpo igo.

21 Igo eroparĩcũ Jesu yũhripo:

—Nomeo, yũpũre peenique. Pũhrũguere irigũ utãgũgue, Jerusalẽngũe sãre mari Pagũre umupeosome mũa. 22 Mũrapũ mũa umupeorire masibea. Masare taubupũ judio masũ ãhrimi. Eropirã gũa judio masapũ gũa umupeogũre masia. 23 Dohpagũre pũhrũgue sãre Goãmũre diaye umupeorã erã õaro pepiri mera ãgũre umupeorãcoma. Eropa mari umupeocũ gahmemi Goãmũ. 24 Goãmũ dũpũ marigũ ta ãgu áricũ masa ãgũre ãabeama. Eropiro ãgũre umupeori mera erã õaro pepiri mera ãgũre õaro diaye umupeoro gahmea masare, arĩpũ Jesu igore.

25 ãgu eroparĩcũ igo yũhripo:

—Mesia, “Cristo,” erā arĩgũpũ, masare taubu ĩgũ ariburire masia yũhũ. ĩgũ arigũ marire árĩpehrerire buhepehogũcumĩ, arĩpo igo.

26—Yũhũ ta āhraa Cristo, arĩpũ Jesu igore.

27 ĩgũ eropa arĩ weretamurisubu gũapũ ĩgũ buherāpũ erabu. Jesu nomeo mera ĩgũ wereniguicũ ĩarā ũca wacarabu. Eropa ũcaquererā ta “¿Dohpa gahmeri mũhũ? ¿Dohpa arĩri mũhũ igore?” arĩ serēpiñabiribũ. 28 Eropigo nomeo igo sorobure ero duhudobocā, macague waha wamo. Eja masare werego ōpa arĩpo:

29—Yũ ĩirare werepehogũre ĩarā arique mũa. ¿ĩgũ diaye ta Cristo árĩbocuri? ĩarā arique mũa, arĩpo igo.

30 Igo eroparĩcũ iri maca majarā Jesure ĩarā arimorā iima. 31 Irisubure gũa Jesu buherā ĩgũre turaro badoreribũ.

—Buhegũ, baque, arĩribũ gũa.

32—Gajiropa árĩri barire opaa yũhũ. Irire mũa masibea, arĩmi ĩgũ gũare.

33 ĩgũ eroparĩcũ peerā gũa basi ōpa arĩ wereniguibũ:

—¿Gajirā ĩgũre barire otuhayuri? arĩbũ gũa basi. Gũa eroparĩcũ Jesu weremi:

34—Masapũ basũama. Yũre obeodigũ ĩgũ gamerire iigũ sũaa yũpũ.

35 “Wapicũrā aberi duhyaa mari dũca aĩboro,” pohe opũ ĩgũ arĩ pepimi. Mũapũ “Goāmũ yare gũa masare wereboro duhyania,” arĩ pepibiricāque. Diaye arĩgũ iiaa mũare. Dohpague tamerare masare wererā waque. Masare ĩaque. Dohpague tamerare yũ buherire masa erā peeburisubuno árĩro tiiaa. 36 Dũcare aĩrāre erā wajayero dopa ta, yaharā árĩmorāre aĩnirāre yahare buhenirāre wajayegũra yũhũ. Erā eropiira waja ōaro wajayegũra erāre. Erā eropa buhecũ peerā yũ buherire peenirā yaharāpũ Goāmũ mera ũmũri nũcu árĩrācoma. Eropirā erāre buhemũhtanirā, pũhrũ yaharā árĩcũ ĩirā sã yujuropa mucubirima. 37 “Yũjugũ otemũhtagũ āhrimi. Gajigũpũ dũcare aĩgũ āhrimi,” arĩmũriñorā iribojeguerẽ. Iri diaye ta āhraa. Erā eropa arĩdiro dopa ta yujurāyeri yahare weremũhtarā āhrima. Gajirā yahare buhe yaharā árĩcũ ĩirā āhrima. 38 Pohe opũ ĩgũre mohmerā erā otebirinirā árĩquerecũ ta erāre dũcare aĩdoregũ obeomi. Eropa ta masare buhemũhtabirinirā mũa árĩquerecũ ta erā yũre umupeocũ iidoremorāre obeoa mũare. Gajirāpũ erāre buhemũtatuhama. Erā buhenirāguere dipaturi buhenemorā, yaharā árĩcũ ĩirāca mũapũ. Eropirā buhemũhtarāpũ erā itamuro mera gajirāre yaharā árĩcũ ĩirāca, arĩmi Jesu gũare.

39 Irisubure Samaria majago, “Yũ iira mũrāre ĩgũ werepehoami,” igo arĩcũ peerā Samaria majarā bajarā Jesure umupeoma. 40 Eropirā Samaria majarā Jesu pohro ejarā, “Gũa mera dujanique,” arĩma ĩgũre. Erā eroparĩcũ gũa penũ ĩgũ mera ero dujanibũ. 41 Gajirā sã bajarā Jesure peerā umupeoma. 42 Ōpa arĩma masa nomeore:

—Nere mũ arĩrāre peerā Jesure umupeonũgarabu. Dohpague tamerare ĩgũ wereniguirire gũa basi peerā ĩgũre ōaro umupeoa. Eropirā ĩgũpũre peerā i yeba majarāre peamegue wabonirāre taubu diaye ta ĩgũ árĩcũ, dohpague gũa masia, arĩma masa Samaria majagore.

Opu magure dorecugure òagu wacũ iĩnumi Jesu

⁴³Penũ puhru Jesu guare Galileague sihu wami daja. ⁴⁴Neguere òpa arĩmurimi guare Jesu: “Goãmũ ya weremũhtagure ĩgu ya yeba majarã ĩgure umupeobeama,” arĩmurimi Jesu. ⁴⁵Eropirã gua Galileague ĩgu mera ejacũ ero majarã ĩgure òaro bocatĩrima. Ero core Jerusaléngue bosenu áricũ Jesu ĩgu iirare ĩanirã árima erã.

⁴⁶Eropi Caná Galilea áriiri macague ĩgu decore vino wacũ ĩgu iira macague waha wabu gua ĩgu mera daja. Caná pohro áriiri maca Capernaum waĩcũri maca opu magu dorecugu iipu. ⁴⁷Eropigu Jesu Judea áridigu ĩgu Galileague ejari quererere peepũ. Irire peegu Jesu pohrogue erami.

—Yũ magu sirigu iiami. Eropigu ĩgure òagu wacũ iigu arique, arĩ yojaro mera sihumi ĩgure.

⁴⁸Ĩgu eroparicũ peegu Jesu yũhrimi:

—Goãmũ turari mera yũ deyoro moarire ĩabirã, ne yũre umupeobeaa mna, arĩmi Jesu.

⁴⁹Ĩgu eroparicũ peegu opu opu òpa arĩmi:

—Opu, yũ magu ĩgu siriboro core arique, arĩmi ĩgu Jesure.

⁵⁰—Dujaaque. Mũ magu ojocarigucumi, arĩmi Jesu.

Ĩgu eroparicũ peegu, “Ĩgu arĩdiro dopa ta ojocarigucumi yũ magu,” arĩgu opu dujaa wami. ⁵¹Eropa dujaniguigure ĩgu pohro majarã ĩgure bocatĩri wereñorã.

—Mũ magu masa wahámi, arĩ wereñorã erã ĩgure.

⁵²—¿Noho gohra abe áricũ òagu wahári ĩgu? arĩ serẽpipũ ĩgu pohro majarãre.

—Cãrũre goeri boje puhrugã ta nimacũri tahriabu ĩgure, arĩñorã erã ĩgure.

⁵³Erã eroparicũ òpa arĩ pepipu ĩgu: “Jesu yure ‘Mũ magu masa wahámi,’ arĩ werera puhru ta nimacũri tahria waya,” arĩ pepipu opu opu. “Diaye ta arãñumi yure,” arĩgu, ĩgu áripehrerã ĩgu acawererã mera Jesure umupeoñorã.

⁵⁴Jesu Judea áridigu Galileague ĩgu ejara puhru opu magure ĩgu òagu wacũ ĩgu iira mera mari queocũ pesubu Goãmũ ĩgu turari mera ii ĩhmũmi Jesu.

Curimasibigure òagu wacũ iĩnumi Jesu

5 ¹Puhru judio masa Goãmũre gua umupeori bosenu áricũ gua Jesu mera Jerusaléngue ejabu daja. ²Ero maca ñajari disiporo oveja waĩcũri disiporo pohro guhari gobe áribũ. Gua judio masa ya mera Betesda waĩcũri gobe áribũ. Iri deco gobe pohro cinco gohra tiaya mariri tari dipabu áribũ. ³Iri tari dipabugue bajarã dorecũrã oyarãre ĩabu. Cuiiri ĩhajabirã, curimasibirã, gõari marirã, erã iri gobe pohro oyama. Deco ñohmeborore corerã iĩñorã. ⁴Erogue dijarigu iri gobe maja decore yujuyerisuburi ñohmecũ iipu anyu. Iri gobe maja deco ĩgu ñohmera puhru ñaja guhamũhtagupu òagu wapu. Dohpa áriiri dorere opagu òagu wapu. ⁵Eropigu ero yujugu dorecugu oyami. ĩgu treinta y ocho bojori gohra dorecugu áripũ. ⁶Ero ĩgu oyacũ ĩagu ĩgu eropa yoari boje ĩgu dorecucũ masimi Jesu ĩgure. Eropa masigu ĩgure serẽpimi:

—¿Ōari dɛpɛ dore marigɛ árĩdiari mɛhɛ? arĩmi Jesu ĩgɛre.

7 ĩgɛ eroparĩcũ dorecɛgɛpɛ yɛhrimi:

—Iri deco ñohmecũ yɛre decogue aĩ acugɛ marimi. Iri decogue yɛ ñajadiaquerecũ ta gajirãpɛ yɛ core yuu ñajamɛhtama, arĩmi ĩgɛ Jesure.

8—Wahgãñugajaque. Mɛ omasiariñere aĩ, mɛ guburi mera cɛhɛrapi wahgã waque, arĩmi Jesu ĩgɛre.

9 ĩgɛ eroparĩcũ ta dorecɛgɛpɛ wahgãñugaja ĩgɛ omasiariñere aĩ waha wami. Iriñɛ Sabado gɛa judio masa soorinɛ árĩbɛ. 10 ĩgɛ eropa òagɛ wadigɛ ĩgɛ omasiariñere aĩgãcũ ĩarã judio masa gɛa oparãpɛ dorecɛdigɛre òpa arĩ wereñorã:

—Dohpagãre Sabadonɛ mari soorinɛ árĩquerecũ mɛ yañe omasiariñere aĩ wahgãa mɛhɛ. Eropã ĩgɛ mari dorerire tarinugagɛ ĩaa, arĩñorã erã ĩgɛre.

11—Yɛre yɛ dorecɛrre taudigɛpɛ òpa arãmi yɛre, arĩpɛ dorecɛdigɛpɛ. “Mɛ omasiariñere aĩ, mɛ guburi mera cɛhɛrapi wahgãque,” arãmi yɛre, arĩ yɛhrĩpɛ dorecɛdigɛ mɛgɛpɛ erãre judio masa oparãre.

12—¿Irire mɛre eropa arĩdigɛpɛ nihino ãhriri ĩgɛ? arĩ serẽpinorã erã ĩgɛre.

13 Ero bajarã masa erã árĩcũ ĩagɛ Jesupɛ waha wadigɛ árĩmi. Eropĩgɛ dorecɛdigɛpɛ ĩgɛre òagɛ wacũ iidigɛ ĩgɛ waĩre masibiripɛ. 14 Pɛhrɛ Goãmɛ wihĩgɛ gɛa ĩgɛre bocatĩricũ Jesu ĩgɛre weremi:

—Peenique mɛhɛ yɛre. Dohpaguere òaro dɛpɛcɛa mɛhɛ. Ñerire ĩinembiricãque. Dipaturi ĩinemoɛ mɛ dorecɛdiro tauro wagɛca, arĩmi Jesu ĩgɛre.

15 ĩgɛ eropa arĩra pɛhrɛ dorecɛdigɛ judio masa oparã ĩgɛre serẽpinirã pohrogue eja, werepɛ erãre:

—Jesu waĩcɛgɛ yɛre òagɛ wacũ ĩiami, arĩ werepɛ ĩgɛ.

16 Eropi Sabado árĩcũ Jesu dorecɛgɛre ĩgɛ dorere ĩgɛ taucũ masirã judio masapɛ ĩgɛre ñero ĩinugãñorã. Eropirã erã ĩgɛre wejẽdiariñorã.

17 Eropã ñero erã ĩidiarire masigɛ Jesupɛ weremi erãre:

—Yɛ Pagɛ dohpaguere mohmenimi. Yɛ sã eropĩgɛ mohmenigɛ ĩaa, arĩ weremi ĩgɛre ñero ĩidiarãre.

18 ĩgɛ eroparĩcũ judio masa gɛa oparã ĩgɛ mera turaro guarã, ero core erã arĩdiro tauro ĩgɛre wejẽdiañorã. Sabadonɛ erã soorinɛre ĩgɛre òagɛ ĩicũ ĩarã erã guañorã. Eropã guarã Goãmɛre ĩgɛ “yɛ Pagɛ,” ĩgɛ arĩcũ peerã erãpɛ tauro guañorã. “Yɛ Pagɛ,’ arĩgɛ Jesu ĩgɛ basi ‘Goãmɛ mera yujuro mera ãhraa,’ arĩ guñacumi ĩgɛ,” arĩ pepiñorã judio masa gɛa oparã.

Jesu “Goãmɛ ĩgɛ obeodigɛ ãhraa yɛhɛ,” arĩ masare wereñumi

19 Eropi Jesu erãre weremi:

—Diaye mɛare arĩgɛ ĩaa. Yɛhɛ Goãmɛ magɛ yɛ gamero ĩigɛ ĩibea. Yɛ Pagɛ ĩgɛ ĩirare ĩagɛ irire ĩaa. 20 Yɛ Pagɛ yɛre ĩgɛ magɛre mahimi. Eropĩgɛ ĩgɛ ĩirare yɛre ĩi ĩhmupehomi. I dohpaguere ĩgɛ turari mera yɛ ĩira tauro ĩgɛ gajire ĩidoregɛcumi yɛre. ĩgɛ eropa ĩidorecũ ĩgɛ turari mera ĩi ĩhmuɛca ĩgɛre yɛhɛ. Eropã yɛ ĩi ĩhmucũ ĩha ɛcarãca mɛa. 21 Yɛ Pagɛ sĩrinirãre ĩgɛ

masuro dopa ta yu sã yu gamerãre masugura. ²²⁻²³Ne yu Pagupũ masa erã ñeri iira dipuwaja, ïgu basi dipuwaja moagu moabeami. Yũpũre irire erã ñeri iira dipuwaja dipuwaja moabure apimi. Erã ïgure umupeodiro dopa ta yu sãre umupeoborore eropa apimi. Eropirã yũre ïgu magũre umupeobirã yu Pagũ sãre umupeobea mũa. ïgu ãhrimi yũre obeodigu, arĩmi Jesu.

²⁴Eropa arĩtuha õpa arĩ werenemomi:

—Diaye mũare arĩgu iiaa. Yu wereniguirire peerã yũre obeodigũre umupeorã umuri nũcu umarogue eropa árĩniguiçãrãcoma. Eropigu erãre dipuwaja moasome yũhũ. Eropirã erã peamegue wabonirã tarirãcoma. ²⁵Diaye ta mũare arĩgu iiaa. Peamegue wamorã yũre Goãmũ magũre erã peeburisubu dohpague ãhraa. Pũhrũ sãre erã yũre peerãcoma daja. Eropa peerã peenũrũrũpũ Goãmũ mera eropa árĩniguirãcoma. ²⁶Goãmũ yu Pagupũ erãre eropa árĩniguiçũ iigu ãhrimi. Eropigu yũre ïgu magũre erãre eropa árĩniguiçũ iibure árĩdoremi ïgu yũre. ²⁷Eropigu yũhũ masũ Goãmũ ïgu obeodigu árĩçũ ïgu masare dipuwaja moadorerire apimi yũre. ²⁸Ire peerã, pee ñcabiricãque mũa. Gajinũguere árĩpehrerã sĩrinirã masa goberigũe árĩrã yũ wereniguiçũ peerãcoma. ²⁹Eropa pee wahgãrã õarire iinirã mũa umuri nũcu Goãmũ mera árĩmorã masa muriarãcoma. Ñeri iinirã murapũ ñerire erã iira dipuwaja peamegue warãcoma, arĩ weremi Jesu.

³⁰Eropa arĩtuha õpa arĩ werenemomi:

—Yu gamero ne gajinore iibea. Ne yu basi yu gamero iibea. Yũre obeodigu ïgu gamero dopa ta iiaa. Eropigu ïgu arĩdiro dopa ta dipuwaja moaa. Eropigu masare yũhũ dipuwaja moagu diaye ta iiaa. ³¹“Yuũhũ Goãmũ magũ ïgu obeodigu ãhraa,” yu basi arĩ werẽçũ, “Mũ wereniguiçi ne diaye árĩbeaa,” arĩboca mũa. ³²Gajigu ãhrimi yũre weregu. ïgu Goãmũ ãhrimi. ïgu yũre werera diaye ta ãhraa. Irire yu õaro masia. ³³Mũa gajirãpũre Ñure yũre serẽpidore obeobũ. Eropigu ïgu sã diaye ta weremi mũare. ³⁴Masare yũre “Goãmũ ïgu obeodigu ãhrimi,” arĩ weremorãre amabeaa yũpũ. Eropa amabiriqueregu ta Ñũ masũ ïgu árĩquereçũ ta “Yũre diaye ta weremi,” arãa. Mũa yũre umupeoburire, mũa peamegue wabonirã mũa tariburire yũre ïgu werera “Diaye ta ãhraa,” arĩ weregu iiaa. ³⁵Ñũ mũare buhemũhtagu bajamenũrigã buhemi mũare. ïgu eropa buhecũ peerã bajamenũrigã mucubiriribũ mũa. ³⁶Ñũ yu árĩricũrũre weremi mũare. ïgu wereri mera yu árĩricũrũre masiquererã yu iirire ïarã tauro masirãca. Goãmũ yu Pagũ ïgu turari mera ïgu yũre iidorerare dohpague iigu iiaa. Ire yu iicũ ïarã diaye ta Goãmũ ïgu obeodigu yu árĩçũ masirãca mũa. ³⁷Eropiro yu Pagũ yũre obeodigu ïgu basi yũhũ ïgu obeodigu árĩrũre arĩ weremi mũare ïgu yare erã gojarapũgue. ïgu eropa arĩ werequereçũ ta ïgu wereniguirire ne peebeaa mũa. Eropi mũa ïgure ne ïabeaa. ³⁸Yũre Goãmũ ïgu obeodigũre mũa ne peediabeaa. Eropirã mũa ne Goãmũ yare gamebeaa. ³⁹Goãmũ yare erã gojarapũre mũa õaro buhea. Eropa buherã “Gũa ipũre buherã umuri nũcu Goãmũ mera eropa árĩniguirãca,” arãa mũa. Iripũ ta yũre werea. ⁴⁰Iripũ yũre werequereçũ ta mũapũ yũre gamebeaa. Umuri nũcu Goãmũ mera mũa árĩniguiçũrũre yũhũ ogũ árĩquereçũ yũre gamebiribũ mũa, arĩ weremi Jesu erãre.

⁴¹Eropa arĩtuha õpa arĩnemomi:

—Yũre masa erã umupeoire amabeaa yũhu. ⁴²Eropa amabiriqueregu ta Goãmure mua mahibiricũ masia yũhu. ⁴³Goãmũ yũ Pagũ ãgu dorero dopa ta yũ ariquerecũ ta mua yũre gamebeaa. Gajigũpũre Goãmũ ãgu obebiridigu ãgu árĩquerecũ ta ãgũpũre gamerãca mua. ⁴⁴Gajirã masa mũare erã umupeocũ gahmea mua. Goãmũ mua mera ãgu mucubiririre gamebeaa mua. ãgu dihta Goãmũ gohra ãhrimi. Eropa gamebirã yũre peebeaa mua. Yũre umupeobeaa mua. ⁴⁵Mũare yũ Pagũguere ne weresãsome yũhu. Irire pee masique mua. Moise ãgu gojarapũpũ mũare weresãroca. “Iripũ maja dorerire ipehorã, Goãmũ pohro warãca mua,” arĩripũpũ mũare weresãroca. ⁴⁶Moise ãgu gojarapũ yũpũre weremũhtayoro. Eropirã iripũre õaro umupeorã yũ sãre umupeoboaya mua. ⁴⁷Moise ãgu gojarapũre mua õaro peebirã, yaha wereniguiiri sãre peesome mua, arĩmi Jesu erãre.

Cinco mil mũare masare bajarã gohrare bari õũmi Jesu

Mt 14.13-21; Mr 6.30-44; Lc 9.10-17

6 ¹Eropa ãgu buhera pũhũ Galilea waĩcũri ditaru gajipũ masegue gua Jesu mera taribuja wabũ. Galilea ditaru ta Tiberia waĩcũbũ. ²Ero core Galilea yeba Jesu dorecũrãre ãgu õarã ãgu iicũ masa ãanirã árĩma. Erã eropa ãanirã árĩrã Jesu ãgu taribujacũ ãarã masa bajarã ãgũre nũrusia taribujama. ³Eroque eja, gua ãgu buherã ãgu mera utãgũgue mũria, doabũ. ⁴Irinũ Pascua waĩcũri bosenu árĩboro judio masa bosenu árĩboro merogã dũhyabũ. ⁵Eroque doagu, Jesu masa bajarã ãgu pohro erã aricũ ãhabeomi. Eropa ãhabeogu Felipere serẽpimi Jesu:

—¿Oã masa erã baburire nohogue asũrãcũri mari? arĩ serẽpimi.

⁶Jesu ãgu basi ãgu iiburire masiqueregu ta Felipere serẽpi ãami, “¿Dohpa yũhrigũcũri?” arĩgu. ⁷ãgu eropa serẽpicũ Felipepũ yũhrimi:

—Doscientos niyerupũri waja mera mari asũquerecũ ta, masare yujurãyerire mũtarigã barire mari guerequerecũ ta ne sihasosome, arĩmi Felipe Jesure.

⁸Gua mera majagu Andrepũ Simo Pedro pagũ magũpũ Jesure weremi.

⁹—Cinco pan dipuru, perã wai ihĩ majigu ohõ opami. Iri pan dipurugã ãgu opaquerecũ ta masapũ bajarã gohra ãhrima. Eropiro i merogã bari ne sihasosome, arĩmi Andre.

¹⁰—Masare doadoreque mua, arĩmi Jesu guare ãgu buherãre.

Ero mũtarigã taacũro árĩbũ. Gua doadorecũ masa árĩpehrerã doajapehrea wama taa weca. Ũma dihtare queocũ cinco mil gohra árĩma. ¹¹Erã eropa doajacũ ãagu Jesupũ panre aĩ Goãmure “Õhaa,” arĩmi. Eropa arĩtuha guare ãgu buherãre gueredoremi. ãgu eropa gueredorecũ guapũ erã doarãre guere wahgãbũ. Perã wai sãre aĩ guere wahgãbũ. Árĩpehrerãre erã sihajaro barire guerebũ. ¹²Eropirã masa erã yapicũ ãagu Jesu guare doremi:

—Erã ba dũharire aĩque. Eropirã iri barire ne dedesome, arĩmi.

¹³Īḡu eroparīcū ḡuapū cinco pan dipuru dūhyarare ḡua gameneocū doce puiṛi gohra wiribu. ¹⁴Eropirā masa Jesu Goāmū turari mera iri deyoro moariñere ĩḡu iicū ĩarā ōpa arīma:

—Diaye ta āhraa. Ihī Goāmū ya wereniguḡu i yebague aridigu mari coredigu ta āhrimi, arīma erā.

¹⁵Eropirā erā Jesure erā opu ārībure acudiarima. Jesu irire masigu dipaturi yujugu ta utāḡugue waha wami.

Jesu deco weca curiñumi

Mt 14.22-27; Mr 6.45-52

¹⁶Ñamicague ḡua ĩḡu buherā dihta ditarugue buhabū. ¹⁷Eroguere buhaja dohodirugue ñaja, Capernaum waīcūri macague taribujabū. ḡua eropa taribujacū ñamigue ārībū. Eropigu Jesu ḡua pohrogue arinibirimi dohpa. ¹⁸Miruñe turaro aricū ḡua taribujariyaguere pāḡúri wahḡābū. ¹⁹Cinco kilómetros gohra ḡua taribujara pūhrū Jesu ḡua pohrogue árīmi. Deco weca nigui wahḡaricū ĩabu ḡua ĩḡure. Eropa ḡua pohro ĩḡu aricū ĩarā ḡua ḡiūibū. ²⁰ḡua ḡüicū ĩagu ĩḡu ḡuare weremi:

—Ne yure ĩha ucabiricāque. ḡuñaturarā árīque. Yūhū ta āhraa, arīmi Jesu.

²¹Īḡu eroparīcū peerā ḡua ĩḡure mucubiriri mera bocatīri ñajadorebū. Īḡu ñajara pūhrugā ḡua wara yebaguere taribujabū.

Masapu Jesure amañuma

²²⁻²⁴Gajinū masa ero dujanirāpū gamenerenḡañoṛā daja Jesure corerā. Iri ñamire ḡua yaru mera ḡua dihta taribujacū ĩanirā árīma erā. Jesu ḡua mera ĩḡu wabiricū sāre ĩanirā árīma erā. Eropa gamenererā Jesure bocabiriñoṛā. Bocabiri ero pohro Tiberiague ariri gasi tuhajacū ĩañoṛā. Jesu Goāmure “Ōhaa,” arī, masare ĩḡu bari guerediro pohroñarigue árīyoro. Eropirā Jesu ḡua sā maricū ĩarā, iri gasigue ñaja, Capernaumgue ḡuare nūrusia taribujajama. Jesure ahma nūrusiagārā iima erā.

Yūhū ojocaririre ogū, bari iro dopa árīḡu āhraa, arī wereñumi Jesu masare

²⁵Ditarure taribuja, ḡua árīrogue eja, Jesure bocajanjarā erā serēpima ĩḡure: —Buheḡu, ¿dohpárīcū ahrari mūhū ōguere? arī serēpima erā ĩḡure.

²⁶Erā eropa arī serēpicū, Jesu erāre weremi:

—Diaye arīḡu iiaa mūare. Deyoro moarire yū iiquerecū ta yūpūre umupeobea mūa. Yūre umupeobiriquererā ta yūre ahmaa mūa. Yū mera pagari baha, mūa yapinirā árīrā yūre amagārīrā iiaya daja. ²⁷Bari ne árīniguibeaa. Pūhrū pehrea wahaa iri. Eropirā irire eropa amaniguibiricāque. Gaji bari gajiropa árīri baripūre amaque mūa. Iri barire amarā ũmūri nūcū Goāmū mera árīrāca. Eropiro iri bari tamera ne pehrebeaa. Iri barire yūhū masū Goāmū ĩḡu obeodigu mūare ogūra. Goāmū yū Paḡu yūre irire odoreḡu āhrimi. Īḡu obeodigu yū árīrīre ĩhmutuhami mūare, arīmi Jesu.

28 Ìgũ eroparĩcũ erã serẽpima ìgũre:

—¿Goãmũ iidorerire iimorã dohpa iirãcuri gũa? arĩ serẽpima erã.

29—Ire Goãmũ mũare iidoremi: “Yũre ìgũ obeodigũre umupeoque,” arĩ doremi Goãmũ, arĩmi Jesu.

30 Ìgũ eroparĩcũ peerã erã òpa arĩma:

—Goãmũ ìgũ obeodigu mũ árìgũ ìgũ turari mera ii ìhmuque gũare mũre gũa òaro umupeoborore. ¿Ñehenore iibocuri mũhũ? 31 Mari ñecũ sũmarã mũrague iribojegue majarã masa marirogue mana waĩcũri dipurure bamuriñorã. Goãmũ yare erã gojaripũgue òpa arĩ wereyoro: “Ìgũ erãre umaro maja dijuri barire omũripũ erã baburire,” arĩ gojañuma Goãmũ yare erã gojarapũgue. ¿Ìgũ eropa iidiro dopa ta iigu iiri mũ sã? arĩma erã.

32 Erã eroparĩcũ Jesu weremi erãre:

—Diaye mũare arìgũ iiaa. Moiserũ iri umaro maja barire mũa acawererãre obiriñumi. Yũ Pagũrũ umaro maja barire diaye maja barire mũare ogũ àhrimi. 33 Goãmũ ìgũ bari umaro dijari árìpehleri yeba majarãre ojocaririre omasia, arĩmi Jesu.

34—Opũ, umũri nũcũ iri barire oque gũare, arĩma erã.

35 Erã eroparĩcũ peegũ Jesu weremi erãre:

—Yũrũ ojocaririre ogũ bari iro dopa árìgũ àhraa. Mari ya barire barã matagã ta oaboa waha mari. Ihriri sãre mari ihrira pũhrugã ta ñemesibua daja. Yũre gamegũrũ, yũre umupeogũrũ, ne oaboabigu ñemesibubigu iro dopa ìgũ òaro árìri ne pehresome ìgũre. 36 Mũarũ yũre ìaquererã ta umupeonibeaa dohpa. Irirẽ ta mũare wererabũ yũhũ. 37 Árìpehlerã yũ Pagũ yarã árìmorãre ìgũ aĩnirãrũ yũre gamerãcoma. Eropigu yũre gamerãre ne cóasome yũhũ. 38 Umãrogue arìgũ yũ gamero iigu arìgũ iibiribũ. Yũre obeodigu ìgũ gamero dopa ta iigu aribũ. 39 Ita árìbũ yũre obeodigu ìgũ gameri gohra: Árìpehlerã yaharã árìmorã yũre ìgũ onirãre yũ dedeobiricũ gahmemi. Yũre obeodigu pehlerinũ árìcũ erãre yũ masucũ gahmemi. 40 Árìpehlerã yũre Goãmũ magũre ìarã, yũre umupeorã umũri nũcũ ìgũ mera erã árìcũ gahmemi yũ Pagũ. Eropigu pehlerinũ árìcũ erãre masugũra, arĩmi Jesu.

41 “Yũhũ umãrogue ariri bari iro dopa árìgũ àhraa,” ìgũ arìcũ peerã judio masa gũa oparãrũ ìgũ mera guarã, erã basi Jesure ñero arĩ wereniguima.

42—¿Ìhĩ Jesu José magũ árìbeari? Ìgũ pagũ, ìgũ pago sãre mari masia. ¿Eropa árìqueregũ ta duhpigu “Umãrogue aribũ,” arĩ wereniguiri ìgũ? arĩ guama erã.

43 Erã eroparĩcũ peegũ Jesu weremi erãre:

—Mũa basi yũre ñero arĩ wereniguibiricãque. 44 Yũ Pagũ yũre obeodigũrũ masare yũre gamecũ iimi. Ìgũ eropiibiricũ masarũ yaharã árìmasibiriboñuma. Pehlerinũ árìcũ yaharãre masugũca yũhũ. 45 Goãmũ ya weremũhtanirãrũ òpa arĩ gojañuma: “Goãmũ erãre buhegũcumĩ,” arĩ gojañuma. Árìpehlerã yũ Pagũ ìgũ buherire peerã ìgũre yũhrirã yũre gahmema. Eropirã yaharã àhriima.

46 “Yũ Pagũre ne yujugũ masũ ìabeami. Yũhũ Goãmũ ìgũ obeodigu dihta yũ Pagũre ìabũ. 47 Diaye arìgũ iiaa mũare. Yũre umupeogũ árìpehlerinũri yũ

Pagu mera áríniguigucumi. ⁴⁸Yupũ ojocaririre ogũ bari iro dopa árĩgu ãhraa. ⁴⁹Mũa ñecu sumará mũrague masa mariogue manare bamuriñorã. Eropa irire baquererã ta sîria wañorã. ⁵⁰Umarogue ariri baripũre masũ bagũ ne sîrisome. ⁵¹Yũhũ umarogue ariri bari ojocaririre ori bari iro dopa árĩgu ãhraa. I barire bagũ umuri ñecu yũ Pagũ mera eropa áríniguigucumi. I bari ojocaririre ori bari iro dopa árĩri yũ dũpũ ta ãhraa. Áripheereri yeba majarã Goãmũ mera eropa erã áríniguiburire yũ dũpũre ogũra. Eropa ogũ sîrigũca, arĩmi Jesu.

⁵²Ígu eroparĩcũ peerã judio masapũ õpa arĩ wereniguima erã basi:
—¿Ihĩ dohpa ii ígu dũpũre baburi ogũcuri? arĩma erã erã basi.

⁵³Erã eroparĩcũ peegũ Jesu weremi:

—Diaye arĩgu iiaa mũare. Yũhũ Goãmũ ígu obeodigu ãhraa. Yũ dũpũre babigu, yũ dire ihribigu Goãmũ mera árísome. ⁵⁴Yũ dũpũre bagũre, yũ dire ihrigũre, pehrerinũ árĩcũ masugura. ⁵⁵Yũ dũpũ diaye ta bari gohra iro dopa ãhraa. Yũ di diaye ta ihriri gohra iro dopa ãhraa. ⁵⁶Yũ dũpũre bagũ yũ dire ihrigu yũ mera mucubiriri mera áríniguigucumi. Eropigu yũhũ ígu mera mucubiriri mera áríniguigũca. ⁵⁷Yũ Pagũ yũre obeodigu eropa áríniguicãmi. Eropa áríniguigũ yũ sãre eropa áríniguicũ iimi. Eropirã yũre eropa áríniguigũre masa barã, Goãmũ mera umaroguere eropa áríniguirãcoma erã sã. ⁵⁸Ita ãhraa umarogue ariri bari. Mari ñecu sumará mũra erã bara mũra iro dopa árĩbeaa i bari. Erãpũ iri barire baquererã ta sîria wañorã. I baripũre bagũ umaroguere eropa áríniguicãgucumi, arĩmi Jesu.

⁵⁹Capernaum judio masa gũa buheri wihi Jesu buhegũ, eropa weremi.

Jesu ígu buherire peerã umarogue eropa áríniguirãca mari, arĩ gojañumi Ñũ

⁶⁰Ígu eropa wereniguicũ peerã bajarã gũa watope árĩrã Jesure gamerã, ígũre nũrusianirã õpa arĩ wereniguima:

—I buheri diasã ãhraa. Eropirã mari peediabiriñaria, arĩ wereniguima erã erã basi.

⁶¹Erã eroparĩcũ Jesupũ erã wereniguirire masimi. Eropa masigu ígu erãre serẽpimi:

—¿I buherire peerã guarĩ mũa? ⁶²¿Yũhũ masũ Goãmũ ígu obeodigu umarogue dũjaa wacũ dohpa wabocuri mũa? ⁶³Masũ ígu sîporãre opagũ ojocarimi. Ígu dũpũpũ ígũre ojocaricũ iibeaa. Masure ígũre ígu sîporã ojocaricũ iro dopa ta yũ buheripũ mũare Goãmũ mera eropa áríniguicũ iiaa. ⁶⁴Gajirã mũa mera majarã ne yũre umupeobeama, arĩmi Jesu.

Negohraguere Jesu ígũre umupeobiribonirãre masituhapũ. Ígũre ìhaturirãre wiabu sãre mata masituhapũ. Eropa masigu “Gajirã mũa mera majarã yũre umupeobeama,” arĩmi Jesu gũare.

⁶⁵Eropa arĩtuhaja õpa werenemomi:

—Õpa arĩ wererabũ mũare. “Yũ Pagũpũ masare yũre gamecũ iimi. Ígu eropa iibiricũ masapũ yaharã árĩmasibiriboñuma,” mũare arĩrabũ, arĩmi Jesu.

⁶⁶Īgu eropa arī buhecū peerā bajarā Jesure gamenirā mura ĩgure cohā, ĩgu mera dipaturi wabirima. ⁶⁷Erā eropa iicū ĩagu Jesu guare doce ĩgu buherāre serēpimi:

—¿Mua sã yure cóacārācuri? arī serēpimi guare.

⁶⁸Īgu eroparīcū Simo Pedro yuhrimi ĩgure:

—Opu, guare gajigu buhegu marimi. Mu buherire peerā Goāmū mera eropa arīniguirāca gua. Mu buheri dihta irire werea guare. ⁶⁹Eropirā gua mure umupeoa. Eropa mūhu ōagu, Goāmū magu ĩgu obeodigu mū arīcū gua masia. Eropirā mure cóāsoma gua, arīmi Simo Pedro Jesure.

⁷⁰Īgu eroparīcū peegu Jesu weremi guare:

—Yupū mūare doce majarāre beyebu. Yujugu mūa mera majagu watī yagu arību āhrimi, arīmi guare ĩgu buherāre.

⁷¹Eropa arīgu Judare Simo Iscariote magure arīgu iimi. Judapu doce gua mera majagu Jesure ĩhaturirāre wiabu arīmi.

Jesu pagu porā ĩgure peediabiriñuma

7 ¹Pūhrū gua mera Jesu Galilea yeba curigu wami. Judea yeba majarā judio masa ĩgure wejēdiañorā. Erā eropa wejēdiacū masigu ĩgu iri yebare wabirimi. ²Judio masa mūta wirigā gua iiburinu bosenu merogā dūhyabu. ³Eropirā Jesu pagu porā ĩgure werema:

—Judeague bosenure ĩagu waque. Ero mū yarāre deyro moarire ii ĩhmuḡu waque mūhu. ⁴Masare deyro moarire ii ĩhmudiagu mure dibubiricāro gahmea. Deyoro moarire iigu arīgu arīpehrerā erā ĩhuro iique, arīma erā.

⁵Īgu pagu porā arīquererā ta Jesure “Goāmū magu āhrimi,” arībirima. Eropirā eropa arīma erā ĩgure. ⁶Erā eropa arīra pūhrū Jesu weremi erāre:

—Masa yure erā ōaro masiburisubu dūhyania dohpa. Mūapu bosenure ĩadiarā waque. ⁷Ero majarā mūare ĩhaturibeama. Yūpūre erā ñeri iirare yu werecū yure ĩhaturima. ⁸Mua seyaro bosenu arīcū waque. Yūpūre yu waburisubu dūhyania dohpa. Eropigu yūpu bosenure ĩagu wanibea dohpa, arīmi Jesu erāre.

⁹Eropa arīgu ĩgu Galilea dujami.

Mūta wirigā erā iirinuri bosenu arīcū wañumi Jesu Jerusaléngue

¹⁰Bosenugue Jesu ĩgu pagu porā erā wara pūhrū Jesu sã gua mera erā pūhrū wami. Eropa wagu masa erā ĩabiririsubu wami. ¹¹Bosenu arīrā judio masa gua oparā ĩgure amañorā:

—¿Nohogue arīcuri ĩgu? arī serēpiñorā.

¹²Eropirā masa bajarā Jesure werewuñorā. Gajirā, “Īgu ōagu āhrimi,” arīñorā. Gajirāpu, “Īgu ñegu āhrimi. Masare guayagu āhrimi,” arī werewuñorā.

¹³Eropa arīquererā judio masa gua oparāre güirā, masa erā ĩabirogue Jesure werewuñorā.

¹⁴Gua erogue ejara pūhrū bosenu deco Jesu Goāmū wihigue ñajaja buhemi. ¹⁵Īgu eropa buhecū judio masa uca wa ōpa arīma:

—¿Ihĩ buherogue buhebigu árĩqueregu ta duhpigu òaro masipehori ìgu? arĩma erã ìgure.

16 Erã eroparĩcũ Jesu weremi erãre:

—Yũ buheri yaha wereniguiri árĩbeaa. Yũre obeodigu ya wereniguiripu ãhraa i buheri. 17 Goãmu gamerire iidiarã yũ buherire “Goãmu wereniguiri ta ãhraa,” arĩ masirãcoma. Yũ buheri yaha wereniguiri dihta árĩbircũ sãre masirãcoma. 18 Yujugu ìgu gamero ìgu masiri mera buhegu árĩgu “Yũ dihtare umupeoque,” arĩgu ãhrimi ìgu. Yũre obeodigupũre mũa umupeocũ gahmea yũpũ. Yũ eroparĩcũ peerã, “Diaye ta wereniguimi ìgu. Ne gũyabeami,” arĩ masirãca mũa.

19 “Goãmu dorerire Moise mũrupũ apimurĩñumi mũare. Ìgu eropa apiquerecũ ta mũa árĩpehrerã iri dorerire ne yũhribeaa. ¿Duhpirã yũre wejẽdiari mũa? arĩmi Jesu judio masare.

20—Mũ goroweregu ãhraa. Mũre wejẽdiarã marima, arĩ yũhrima erã Jesure. Erã eroparĩcũ Jesu yũhrimi:

21—Yũhũ soorinũ yujusubu Goãmu ìgu turari mera dorecũgũre ìgu dorere yũ cõacũ mũa ìha ñca wabũ. 22 Mari ñecũ sũmarã iribojegue majarãpũ erã dũpũre merogã gasirogãre wiri airã erã árĩdiro dopa ta Moise wiridoreñumi. Ìgu eropa dorecũ majirãgãre ocho ñũri erã masa dehyoara pũhrũ soorinũ árĩquerecũ ta erã dũpũre merogã erã gasirogãre wiri aĩmũria mũa. 23 Mari soorinũ árĩcũ majirãgãre erã dũpũre merogã gasirogãre wihria mũa Moise doreri iimorã. ¿Mũa sã soorinũ irire iiquererã ta irinũ dorecũgũre yũ taucũ duhpirã yũ mera guari mũa? 24 Yũ iirare mũa òaro masibiriboro core, yũre ñero pepibircãque. Mũa òaro masira pũhrũ yũre mũa ñero pepicũ diaye ta árĩroca, arĩmi Jesu.

Jesu negohraguere ìgu aridirore wereñumi

25 Ìgu eropa arĩ werera pũhrũ bajamerãgã Jerusalén majarã òpa arĩ wereniñorã:

—¿Ihĩ mari oparã erã wejẽdiagu árĩbeari? 26 Eropigu ìgure erã wejẽdiaquerecũ ta árĩpehrerã masare buhegu iimi ìgu. Eropirã ìgure wejẽdianirã árĩquererã ta eropa ìacãma. Eropa ìacãrã ìgure “Ìgu diaye ta Cristo Goãmu ìgu obeodigu ãhrimi,” ¿arĩ pepibocuri oparãpũ? Maripũ masia. Cristo árĩbiribocumi. 27 Ihĩ Jesu ìgu aridirore gũa masia. Cristopũ ìgu árĩcũ ìgu aridirore masiya mara. Eropigu Cristo gohra árĩbeamĩ Jesu, arĩ werewũañorã erã Jerusalén majarã.

28 Erã eropa arĩrare masigu, Jesu òpa turaro busũro werenigui buhemi Goãmu wihi:

—Yũre òpa arĩ pepia mũa: “Ìgure masia gũa. Eropirã ìgu aridiro sãre masia,” arĩ pepiraa mũa yũre. Mũa eropa arĩ pepiquererã ta yũ gamero aribirabũ. Yũre obeodigu gohrare masibea mũa. Yũre obeodigu diaye árĩgu, diaye iigu ãhrimi. 29 Ìgu ta yũre obeomi. Eropigu ìgu pohroque aribũ. Eropigu yũhũ ìgure masia, arĩmi Jesu judio masare.

30 Ìgu eroparĩcũ peerã ìgure ñeadiarima. Erã eropa ñeadiaquerecũ ta Jesu ìgu ñero tariburisubu árĩbiriyo dohpa. Eropirã erã ìgure ñeamasibirima. 31 Gajirã masapũ bajarã ìgure umupeoma. Òpa arĩma:

—“Cristo bajasuburi Goãmũ turari mera deyoro moarire ii ïhmugũcumi,” erã arĩ werediropã dopa ta ihĩ Jesupũ bajasuburi Goãmũ turari mera ii ïhmumi. Áripehrerã gajirã tauro Goãmũ turari mera ii ïhmumi ïgũ. Eropigũ Cristo Goãmũ ïgũ obeodigũ ta áhrimi Jesu, arĩma Jesure ne umupeonũgarãpũ.

Fariseo masa Jesure peresu iidoreñuma

³²Masa Jesure eropa arĩ werenigucũ peerã pahia oparã, fariseo masa mera Jesure ñeadorerã obeoriñorã surarare.

³³Eropigũ Jesu masare õpa arĩmi:

—Bajamenũrigã mũa mera árinigũca. Eropigũ pũhrũnarigã yũre obeodigũ pohro wagũca. ³⁴Yũ áriñborore mũa wamasibea. Eropirã yũre amaquererã ta ne bocasome mũa, arĩmi Jesu masare.

³⁵Ïgũ eroparicũ peerã erã judio masa õpa arĩ wereniguiñorã:

—¿Ihĩ eropa arĩgũ nohogue wagũcuri mũa pepicũ? ¿Griego masa pohrogue judio masa wasirinirã pohrogue erã áriñri macarigue Griego masaguere buhegũ wabocuri ihĩ? ³⁶“Yũ áriñborore mũa wamasibea. Eropirã mũa yũre amaquererã ta ne bocasome,” ïgũ arĩgũ ¿dohpa arĩronore ïgũ eropa arĩri? arĩ wereniguiñorã judio masa erã basi.

Ojocaricũ iiriyarire wereñumi Jesu

³⁷Bosenũ ojogorocurinu irinu gũhyadiarinũ gohra áriro iibũ. Irinu Jesu ero nigui, turaro mera weremi masare:

—Ñemesiburã decore turaro gamero dopa áriñã umũri nũcũ Goãmũ mera turaro áriñdiarã yũre serẽque. Mũa eropa serẽcũ ïgũ yarã áriñdoregura mũa. ³⁸Yũre umupeorãre õpa arĩ gojañuma Goãmũ yare erã gojarapũgue: “Erã sĩporãriguere ojocaricũ iiri deco eropa áriñiguiñorã,” arĩ gojañuma, arĩ turaro weremi Jesu masare.

³⁹“Erã sĩporãriguere ojocaricũ iiri deco eropa áriñiguiñorã,” arĩgũ “Yũre umupeorã Espĩritu Santore oparãcoma” arĩgũ iimi Jesu. Ïgũ umarogue ïgũ mũrianibiricũ dohpa Espĩritu Santopũ arinibirimi dohpa erãre.

Judio masa dũca wariñuma pe curu

⁴⁰Jesu ïgũ eroparicũ peerã, masa bajarã õpa arĩ wereniguima:

—Ihĩ diaye ta Goãmũ yare weremũhtagũ mari coredigũ ta áhrimi, arĩ wereniguima.

⁴¹Õpa arĩma gajirã sã:

—Ihĩ Cristo marire taubu áhrimi, arĩma.

Gajirãpũ õpa arĩma:

—Cristo áriñgũ Galilea majagũ áriñsome ïgũ. Ihĩ Jesupũ ero majagũ ta áhrimi.

⁴²Cristo Davi mũrũ pãrami gajisubũ majagũ arĩgũ áriñbocumi. Eropigũ Davi ya maca mũraro Belén waĩcuri maca masa dehyoagũcumi Cristopũ. Eropa ta arĩ

werea Goãmũ yare erã gojarapũ. Ihĩ Jesupũ Belén macague masa dehyoabiripũ. Eropigu ïgu Goãmũ ïgu obeodigu Cristo gohra árĩbeami, arĩrima erã.

⁴³Eropirã Jesure peenirã gajirã umupeo gajirãpũ umupeobirã árĩnijarã game duca warima pe curu. ⁴⁴Eropirã bajamerãgã Jesure ñeadiarima. Eropa ñeadiaquererã ta ïgure ñeabirima.

Judio masa oparã Jesure ne umupeobiriñuma

⁴⁵Eropirã surara pahia oparã pohrogue fariseo pohrogue dujaa wañorã daja. Erã dujjacũ ïarã erã surarare serẽpiñorã:

—¿Duhpirã Jesure ñeagãribirari mua? arĩñorã.

⁴⁶—Ïgu òtariaro wereniguigu ãhrami. Gajirã ïgu iro dopa wereniguirã ne marima, arĩ yuhriñorã surara erãre.

⁴⁷Erã eroparicũ fariseo masapũ òpa arĩ wereñorã:

—¿Mũare ïgu guyacũ, “Diaye ta arĩgu iimi,” arãri mua sã? ⁴⁸Mari oparã Jesure ne umupeobeama. Gũa sã eropirã ïgure umupeobeaa. ⁴⁹Oã masa Goãmũ dorerire Moiserẽ ïgu apirare masibeama. Eropa masibirã árĩrã Jesure umupeoma. Erã eropa umupeori dipuwaja mari Pagũ Goãmũ erãre dipuwaja moagũcumi, arĩñorã fariseo masa.

⁵⁰Nicodemo fariseo masũ Jesure weretamugũ ejadigu ero árĩpũ erã mera. Erã eroparicũ peegu òpa arĩpũ ïgu erãre:

⁵¹—Jesu ïgu ñero iirare masibeaa mari. Eropa masibirã ïgu marire wereboro core ïgure dipuwaja moamasibeaa mari. Eropa masibiriquererã ta ïgure dipuwaja moarã, mari ya dorerire tarinũgarã iiaa mari, arĩpũ Nicodemo erãre.

⁵²Ïgu eroparicũ peerã òpa arĩ yuhriñorã erã:

—¿Mũ sã ïgu iro dopa ta Galilea majagu ta ãhriri? Goãmũ ya erã gojarapũre buhepehoque. Eropa buhegu, “Goãmũ yare weremũhtagu ne yujugu Galilea majagu marimi,” arĩ masigũca mũhũ, arĩ yuhriñorã erã Nicodemore.

⁵³Erã eropa arĩra pũhrũ erã ya wirigue dujaa wañorã.

Umũ mera ñero iidigore judio masa oparã dipuwaja moadiariñuma

8 ¹Jesupũ ïgu seyaro utãgugue Olivo waicudigugue waha wami. ²Gajinũ Goãmũ ya wihigue gũa wabũ daja. Jesu ejacũ ïarã masa bajarã ïgu pohro gamenerema. Erã gamenerecũ ïgũpũ doanjagu erãre buhenũgarũ. ³Ïgu eropa buhero watope judio masa buherã, fariseo masa mera iri wihigue nomeore aĩ ñajajama. Igo marapũcũquerego gajigu mera igo ñero iicũ bocajañorã erã igore. Eropa bocajarã igore Goãmũ wihigue aĩ ñajama erã igore dipuwaja moadorerã. Aĩ ñajatuha árĩpehrerã gũa ïaro igore duhu nuguma. ⁴Duhunugu òpa arĩma Jesure.

—Buhegu, igo marapũcũgo árĩquerego gajigu mera ñero iigo iicũ bocajabũ. ⁵Moise dorerire òpa ãhraa: “Umũ mera ñero iidigore utã mera dea wejẽcãque,” arĩyoro Goãmũ doreri. ¿Mũca dohpa arĩ pepiri ire? arĩ serẽpima erã Jesure.

⁶ Jesu ñero wereniguicũ peediarã iirima erã ñgũre weresãmorã. Erã eropa serẽpiquerecũ ta Jesupũ muhmusiu dija, yebague ñgũ mujusũru mera gojami.

⁷ Eropigu erã eropa serẽpiniguicũ peegu Jesupũ wahgã doaja, erãre weremi:

—Mũa mera majagu ñero iibigu árigũ igore utã mera deanugaporo, arĩmi Jesu.

⁸ Eropa arĩtuha dipaturi muhrisiu dija, yebague gojami daja. ⁹ Irire peerã igore aĩ ñajarinirãpũ erã ñeri iirare guñarã, erã tirãpũ wiria wamũhtama. Erã pũhrũ erã mera majarã sã wiriapehrea wama. Eropigo nomeo dihta Jesu pohro dujanugamo. ¹⁰ Eropigu Jesu wahgã doaja, igore serẽpimi.

—¿Nohogue áhriri erã? ¿Mũre dipuwaja moadianirã mariri dohpaguere? arĩmi igore.

¹¹ —Marima, opũ, arĩ yũhrimo igo.

—Yũ sã dipuwaja moabeaa mũre. Waque. Eropigo ñerire iinmobiricãque, arĩmi Jesu igore.

Jesu i yeba majarãre boyoro iro dopa Goãmũre masicũ iimi, arĩ gojañumi Ñu

¹² Dipaturi Jesu iri wihigue árirãre weremi:

—Boyoro iro dopa yũhũ i yeba majarãre Goãmũre masicũ iiaa. Yũre umupeogu Goãmũ mera eropa áriniguicãgũcumi. Eropigu ñgũ boyorogue árigũ dopa ta ñarire guñagũcumi. Eropigu ñgũ ñerire guñadiabeami, arĩ weremi Jesu.

¹³ Ñgũ eroparicũ peerã fariseo masapũ ñpa arĩma.

—Mũhũ mũ basi mũ áriricũre eropa arĩ wereniguimaacãgũ iiaa. Mũ ñpa arĩ wereniguiri ne waja mara, arĩma erã Jesure.

¹⁴ Erã eroparicũ Jesu yũhrimi:

—Yũhũ, yũ aridirore masia. Yũ waboro sãre masia. Mũapũ ne irire masibea. Eropigu yũ basi yũ áriricũre werequeregu iri yũ werera diaye ta áhrra.

¹⁵ Mũa sihajaro mũa sã ñara dihtare masia mũa. Eropirã mũa yũre werewũaa.

Yũhũ mũa iro dopa ta werewũabeaa. ¹⁶ Masa erã áriricũre ñagu yũhũ yujugũ ta ñhamasibea. Yũ tamera yũre obeodigu mera masia. Eropigu yũhũ masa erã áriricũre diaye ta ñha masia. ¹⁷ Mũare doreri erã gojarapũ ñpa arĩ werea:

“Masa perã erã yujuro mera erã werecũ erã wereri diaye ta áhrra,” arĩ were gojañuma. ¹⁸ Yũre weregu mera gua perã áhrra. Yũhũ, yũ áriricũre werea. Eropigu yũ Pagũ sã weremi yũre. Ñgũ ta áhrimi yũre obeodigu, arĩmi Jesu.

¹⁹ —¿Nohogue áhriri mũ Pagũ? arĩ serẽpima erã.

—Yũre mũa masibea. Yũ Pagũ sãre masibea. Yũre masirã, yũ Pagũ sãre masiboaya, arĩ yũhrimi Jesu erãre.

²⁰ Jesu erãre buhegu eropa arĩ wereniguimi Goãmũ wihigue erã niyeru apiri comoro pohro. Ñgũ ñero tariburisubu ejabiribũ dohpa. Eropirã erã mera ñgũ áriquerecũ ta ñgũre ñeabirima.

Yũ waboroguere mũapũ wamasisome, arĩñumi Jesu

²¹ Dipaturi masa mera gua áririsubu Jesu erãre weremi daja:

—Yũ aridirogue wagũca. Yũ wara pũhrũ yũre amarãca mũa. Yũ waboroguere mũarũ wamasisome. Eropirã mũa ñeri dipuwajacũrã sĩrĩrãca, arĩ weremi Jesu.

22 “Yũ waboroguere mũarũ wamasisome,” ĩgu arĩcũ peerã,

—¿Ihĩ ĩgu basi wejẽ sĩrigũcuri eropa arĩgu? arĩma judio masa erã basi.

23 Erã basi erã eroparĩcũ Jesu weremi erãre:

—Mũarũ i yeba majarã ãhraa. Yũrũ umaro majagu ãhraa. I yeba dehyoanirã ãhraa mũarũ. Umarogue aridigu ãhraa yũrũ. 24 Mũare yũ árĩricũrĩre yũ werecũ “Diaye árĩbeaa,” mũa arĩrã, mũa ñeri dipuwajacũrã sĩrĩrãca mũa. Eropigu “Mũa ñeri dipuwajacũrã sĩrĩrãca,” arĩrabũ mũare, arĩmi Jesu erãre.

25 —¿Noano ãhriri mũhũ? arĩ serẽpima erã.

—Neguere yũ mũare arĩdiro dopa ta ãhraa yũhũ. 26 Mũare yũ wereburi wũaro dũhyania. Eropiro mũa ñeri dipuwajare mũare yũ wereboro wũaro dũhyaa dohpa. Eropigu yũre obeodigũre yũ peerare i yeba majarãre werea. ĩgu werera diaye ta ãhraa, arĩmi Jesu erãre.

27 “Yũre obeodigu,” ĩgu arĩcũ peerã “Mari Pagũ árĩcumĩ,” arĩ pepibirima erã. 28 Erã eropa arĩ pepibiricũ ĩagu Jesu weremi erãre:

—Yũre masũre Goãmũ ĩgu obeodigũre mũa crusa mera pabia aĩ wahgũ nugurãca. Mũa eropa iirã, “Ĩgu Goãmũ ĩgu obeodigu ta ãhrimi,” arĩ masirãca yũre. Eropirã yũ gamero dopa ta iibigu yũ árĩrĩre masirãca. Eropirã yũ Pagũ ĩgu yũre ĩgu buhera dihtare weregu yũ árĩcũ sãre masirãca mũa. 29 Eropigu yũre obeodigũrũ yũ mera ãhrimi. ĩgu gamerire umũri nũcũ iiniguia. Eropigu ĩgu yũre ne cóãbeami, arĩmi Jesu.

30 ĩgu eroparĩcũ peerã masa bajarã ĩgũre umupeoma.

Goãmũ porãre, ñerire iirã sãre wereñumi Jesu

31 Eropirã gajirã judio masa Jesure umupeoma. Eropigu Jesu erãre weremi:

—Yũ dorerire iipehorã árĩrã, diaye ta yũ buherã ãhraa mũa. 32 Eropirã diaye ta masirãca mũa. Diaye árĩrĩre masirã, ñero iirire duhumasirãca. Eropirã pohro majarã wiunirã iro dopa árĩrãca mũa, arĩmi Jesu erãre.

33 ĩgu eroparĩcũ peerã erã õpa arĩ yũhrima daja:

—Gũarũ iribojegue majagu mũrũ Abrahã pãramerã árĩturiarãgue ãhraa. Eropirã ne gajirã pohro majarã árĩbeaa gũa. Eropigu “Pohro majarã wiunirã iro dopa árĩrãca,” arĩgu ¿dohpa arĩgu eropa arĩri mũhũ? arĩ serẽpima erã Jesure.

34 Erã eroparĩcũ peegu Jesu õpa arĩmi erãre:

—Diaye mũare arĩgu iiaa. Árĩpehrerã ñerire iirãrũ erã ñeri iirire duhumasibeama. Eropiro iri ñeripũ erãre dorea. Eropa árĩrã árĩrã pohro majarã iro dopa ãhrima erã. 35 Pohro majagũrũ ĩgu opũ magũ iro dopa árĩbeami. Doreri opabeami. Iri wihi majagu magũrũ umũri nũcũ diaye ta ĩgu pagũ doreri opami. 36 Yũhũ Goãmũ magũ ãhraa. Eropigu ĩgu doreri opaa. Eropirã mũa ñerire yũ duhucũ iinirã árĩrã diaye ta ñerire duhunirã árĩrãca mũa. 37 Abrahã mũrũ pãramerã árĩturiarã mũa árĩcũ masia. Eropa árĩquererã ta yũ wereripũre peediabeaa mũa. Eropirã yũre wejẽdiaa mũa.

38 Yũ Pagũ ïgu yũre masicũ iirare werea mũare. Yũ eropa werequerecũ ta mũa pagũ ïgu doreripũre iiaa mũa sã, arĩmi Jesu erãre.

39—Abrahã mũrũ iribojegue majagũ gũa pagũ mũrũ árĩmũripũ, arĩ yũhrima erã.

Erã eroparĩcũ Jesu yũhrimi:

—Abrahã mũrũ porã árĩrã ïgu iidiro dopa ta iiboaya mũa. 40 Goãmũ yũre diaye ïgu wererire mũare yũ werequerecũ ta yũre wejẽdiaa mũa. Abrahã mũrũrũ ne eropa iibiridi árĩmi. 41 Mũa pagũ ïgu iidiro dopa ta iiaa mũa, arĩmi Jesu erãre.

Ïgu eroparĩcũ erã yũhrima:

—Mojoto diribiridigo porã árĩbeaa gũa. Yujugu ta ãhrimi gũa pagũ. Ïgu ta ãhrimi Goãmũ, arĩma erã.

42 Erã eroparĩcũ Jesu yũhrimi:

—Goãmũ mera majagũ árĩdigũ ta õguere aribũ yũhũ. Eropirã Goãmũ mũa Pagũ ïgu árĩcũ yũre mahiboaya mũa. Yũ gamero aribiribũ yũ tamera. Yũ Pũ Goãmũ ïgu obeocũ aribũ õguere. 43 ¿Duhpirã yũ wereniguirire peebeari mũa? Yũ wererire yujuro bojebeaa mũa. Eropirã peebeaa mũa. 44 Mũa pagũrũ watĩ ãhrimi. Eropirã watĩ ïgu gameripũre iidiaa mũa. I yeba negohraguere árĩnũgacũgue, dohpague sãre ïgu masare wejẽgũ ãhrimi. Ïgũre diaye maja ne mara. Eropigũ ïgu ne diaye majare wereniguibeamĩ. Ïgu negohraguere gũyanũgadigũ árĩmi. Eropigũ ïgu eropa gũyaniguiũgũ árĩgũ, gũyarire weremi. 45 Yũrũ diaye majare werea mũare. Eropa yũ werecũ peebeaa mũa. 46 “Mũhũ ñero iigũ ãhraa,” arĩmasibeeaa mũa yũre. ¿Diaye mũare yũ werequerecũ ta duhpirã peebeari mũa? 47 Goãmũ porãrũ ïgu wereniguirire peema. Ïgu porã árĩbirã ïgu wereniguirire peebeama, arĩmi Jesu erãre.

Abrahã mũrũ ïgu árĩboro core Cristo árĩmũtatuhañumi

48 Ïgu eroparĩcũ peerã judio masa ïgũre õpa arĩma:

—“Mũhũ Samaria majagũ ãhraa. Eropigũ watĩ mera goroweregũ ãhraa mũhũ,” gũa arĩra diaye ta ãhraa, arĩma erã Jesure.

49 Erã eroparĩcũ peegũ õpa arĩ yũhrimi Jesu:

—Goroweregũ árĩbeaa yũhũ. Yũ Pagũre umupeoa. Mũarũ yũre umupeobeaa. 50 Yũre masa erã umupeorire amabeaa yũhũ. Yũ Pagũrũ yũre umupeocũ gahmemi masare. Ïgu tamera yũ árĩricũrĩre õaro ïha masigũ eropa ta umupeodoremi. Eropigũ yũ Pagũ erã yũre gamebiriri dipuwaja, dipuwaja moagũcumi. 51 Diaye mũare arĩgũ iiaa. Yũ dorerire iigũ mũmũri nũcũ Goãmũ mera eropa árĩniguiũgũcumi, arĩmi Jesu.

52 Ïgu eroparĩcũ peerã õpa arĩma erã:

—Dohpague tamerare mũ watĩ mera goroweregũ árĩcũ gũa õaro masia. Abrahã mũrũ sĩria wañumi. Goãmũ yare weremũhtanirã sã sĩria wañuma iribojegue. Eropigũ “Yũ dorerire iigũ mũmũri nũcũ Goãmũ mera eropa árĩniguiũgũcumi,” arĩgũ, ¿dohpa arĩgũ eropa arĩri mũhũ? 53 ¿Gũa ñecũ mũrũ tauro turari mũhũ?

Īgu, Goām̄u ya werem̄htanir̄ā s̄ā s̄iria wañuma iribojegue. ¿M̄uṛu nihino āhriri eropa ar̄i wereniguḡu? M̄u eropa ar̄iro dopa ár̄ibeaa m̄uḡu, ar̄ima er̄ā.

⁵⁴Er̄ā eropar̄icū peegu Jesu werenemomi:

—Ȳuḡu yu basire umupeodereri duhpiburi ár̄ibeaa. Yu Paguṛu yure umupeodoregu āhrimi ĩgu. “Gua Pagu” m̄ua ar̄iguṛu yu Pagu ta āhrimi.

⁵⁵M̄uṛu yu Pagure ne masibea. Ȳuḡu ĩgure masia. “Īgure masibea,” ar̄igu m̄ua iro dopa ta ḡuyaricuḡu ár̄iboaya ȳuḡu. Diaye ta ĩgure masia. Eropigu ĩgu dorerire iiaa. ⁵⁶I yebaguere yu ár̄iboro coregue mari ñec̄u m̄uḡu Abrah̄ā m̄uḡu masim̄htatuham̄riñumi yure. Eropa masigu ĩgu mucubirim̄riñumi, ar̄imi Jesu.

⁵⁷Īgu eropar̄icū er̄ā ȳuḡrima:

—Abrah̄ā m̄uḡu iribojegue majagu āhrimi. M̄uṛu cincuenta bojori opanibea. ¿Eropigu m̄uḡu ĩgu m̄uḡure duhpigu ĩha masiboyuri? ar̄ima judio masa ĩgure.

⁵⁸—Diaye m̄uare ar̄igu iiaa. Abrah̄ā ĩgu ár̄iboro core yuṛu ár̄im̄htatuhabu, ar̄imi Jesu er̄āe.

⁵⁹Īgu eropar̄icū peer̄ā er̄ā ut̄ayerire aī ĩgure deadiarima. Er̄ā eropa deadiaquerecū ta Jesuṛu Goām̄u wihigue ár̄idigu duhri wiria wami.

Cuiri ĩhajabigure oaro ĩagu wacū iññumi Jesu

9 ¹Jesu ḡua ĩgu buher̄ā mera mague tariar̄ā gajigure cuiri ĩhajabigure bocajabu. Īgu ne masa dehyoagugue ta cuiri ĩhajabigu ár̄iṛu. ²Ḡua s̄ā ĩgure ĩar̄ā serēpibu Jesure.

—Buhegu, ¿ih̄i duhpigu cuiri ĩhajabigu masa dehyoayuri? ¿Ñerire iim̄riyuri eropa wagu? ¿O ĩgu pagu sumar̄ā er̄ā ñero iira dipuwaja eropa wayuri ĩgu? ar̄i serēpibu ḡua Jesure.

³Ḡua eropar̄icū peegu oṛa ar̄i ȳuḡrimi:

—Ih̄i ĩgu pagu sumar̄ā s̄ā er̄ā ñerire iira s̄ā ĩgure cuiri ĩhajabiricū iibea. Goām̄uṛu ĩgure cuiri ĩhajabiricū iimi. ĩgure ĩacū iibu masare ĩgu turarire ii ĩhmuburire apimi Goām̄u. ⁴Yure obeodigu ĩgu apirare yure iiro gahmea dohpaguere. Ñamiguere mari mohmemasibiro dopa ta puhr̄ugue yure obeodigu ĩgu apirare iimasibea ȳuḡu. ⁵I yebaguere i yeba majar̄āe Goām̄ure masicū iiaa, ar̄imi Jesu.

⁶Eropa ar̄ituha yebague disico ehomepimi. ĩgu disico ehomepirare nicu mera mohmore nijagu, cuiri ĩhajabigure ĩgu cuirire s̄umi. ⁷Eropa s̄ugu oṛa ar̄imi Jesu:

—Siloé waic̄uri gobegue m̄u cuirire coegu waque, ar̄imi Jesu. Siloé ero majar̄ā ya mera ar̄ir̄ā obeora gobe ar̄ir̄ā iima.

Jesu ĩgu cuiri coedoredigup̄u waha, coetuhaja, cuiri ĩagugue dujajapu ĩgu ya wihigue. ⁸Īgu dujajacū ero majar̄ā ĩgure ĩañor̄ā. Ero core niyeru serēdigu ĩgu ár̄icū ĩanir̄ā ĩgure oṛa ar̄iñor̄ā er̄ā basi:

—¿Ih̄i sohō ár̄idigu niyeru serēdoadigu ár̄ibeari? ar̄iñor̄ā er̄ā.

⁹—Īgu ta āhrimi, ar̄iñor̄ā gajir̄ā.

—Īgu ár̄ibeami. Eropa ár̄ibiriqueregu ta ĩgu iro dopa ta bejagu āhrimi, ar̄iñor̄ā gajir̄ā.

Erā eroparīcū peegu cuiiri ihajabiridigupū ōpa arīpū:

—Īgu ta āhraa yuhū, arīpū erāre.

¹⁰Īgu eroparīcū masa īgure serēpiñorā:

—¿Cuiiri ihajabiridigu árīdigu dohpa ii ihari mūhū? arī serēpiñorā erā īgure.

¹¹—Jesu waīcūgu disicore nicu mera mohmore yū cuirire sūami. Yure sūtuhaja “Siloé waīcūri gobegue mū cuirire coegu waque,” arāmi yure. Īgu eroparīcū coegu ejabu yuhū. Eropa yū coera pūhrū yū cuiiri ōaro dehyoabu yure, arī werepū īgu masare.

¹²—¿Mūre eropa iidigu nohogue árīcūri īgu? arīñorā erā.

—Ūba. Noho árīgu árīcūmi, arīpū īgu

Cuiiri ihajabiridigure fariseo masa serēpiñuma

¹³Eropa arī wereniguituha erā cuiiri ihajabiridigure fariseo masa pohrogue aī ejañorā. ¹⁴Irinū Jesu dihta nicure mohmore cuiiri ihajabigure ōagu iiranū Sabadonū árībū. Irinū gūa soorinū árībū. ¹⁵Eropirā fariseo masapū īgure serēpiñorā daja.

—¿Dohpa ii ihari mūhū? arī serēpiñorā erā.

—Nicu mera yū cuirire sūami. Eropigu yū cuirire coera pūhrū ihaa yuhū, arī werepū īgu erāre.

¹⁶—Īgu mari soorinū mari mohmedorebiririnūre mohmeami. Eropigu īgu Goāmū yagu árībeami, arīñorā gajirā fariseo masa.

Gajirāpū ōpa arīñorā:

—Nerire iigu árīgu ōpa īre ōagu wacū iimasibeami. Eropigu īgu ōagu árībocūmi, arīñorā gajirā Jesure.

Eropirā erā, erā basi pe curu dūca wariñorā. ¹⁷Eropirā dipaturi erā cuiiri ihajabiridigure serēpinemoñorā daja.

—¿Mūre mū cuirire ōaro iidigure dohpa arī pepiri mūhū Jesure? arīñorā erā īgure.

—Īgu diaye ta Goāmū yare weremuhtagu āhrimi, arīpū cuiiri ihajabiridigupū.

¹⁸Negohraguere judio masa ōpa arī pepiriñorā. “Ihī cuiiri ihajabiridigu árībeami,” arī pepiriñorā. Eropa arī pepirā cuiiri ihajabigu pagū sūmarāre sihubeoñorā erā. ¹⁹Sihubeo īgu pagū sūmarāre serēpiñorā fariseo masa oparā.

—¿Ihī diaye ta mū magū āhriri? ¿Mata īgu cuiiri ihajabigu masa dehyoari? ¿Diaye ta cuiiri ihajabiridigu árīqueregu dohpa ii ihari dohpaguere? arī serēpiñorā erā īgu pagū sūmarāre.

²⁰—Ihī gūa magū ta āhrimi. Eropigu mata cuiiri ihajabigu masa dehyoami īgu. ²¹Irire masiquererā ta īgu iarare, īgure ĩacū iidigu sāre masibea gūa. Gūa magure serēpique. Bugū āhrimi īgu. Īgu basi weremasimi īgu, arīñorā īgu pagū sūmarā.

²²Judio masa oparā ero coreguere ōpa arītuhañorā:

—“Jesu ta Cristo mari taubu āhrimi,” arīrāre mari buheri wirigū ñajadoresome gūa, arīmuriñorā judio masa gūa oparā.

Erā eroparīcū peenirā cuiri īhajibigū pagū sūmarāpū judio masa oparāre güi arīñorā. ²³Eropa güirā “Bugū āhrimi īgu. Īgure ta serēpique,” arīñorā erā judio masa oparāre.

²⁴Pūhrū judio masa oparā dipaturi cuiri īhajibiridigūre sihubeoñorā. Sihubeo ōpa arīñorā īgure:

—Goāmū mera diaye wereque mūhū. Jesure īgu ñeri iigu īgu arīcū gua masia. Eropigū diaye wereque guare, arīñorā judio masa cuiri īhajibiridigūre.

²⁵Erā eroparīcū peegu ōpa arī yūhripū īgu:

—Jesure īgu ñeri iigu īgu arīcū masibirica yūhū. Yujuñe ta masia yūhū. Iribojeguere cuiri īhajibigū arīmūribū yūhū. Dohpaguerūre īhaa yūhū. Iri dihtare masia yūhū, arī yūhripū cuiri īhajibiridigūpū erāre.

²⁶—¿Dohpa iiari īgu mūre? Mū cuirire īhjadoregū dohpa iiari īgu mūre? arī serēpiñorā erā daja.

²⁷—Irire ta mūare weretuharabūgū yūhū. Yū eropa arī werequerecū ta mūa ne peediabea yūre. ¿Dohpa iidiarā yū dipaturi werecū peediari mūa? ¿Mūa sā īgu buherā arīdiari? arīpū īgu erāre.

²⁸Īgu eroparīcū peerā erā īgure turiñorā.

—Mūhū Jesu buhegū āhraa. Guapū Moise buherā āhraa. ²⁹Diaye ta Goāmū Moisere wereniguimūriñūmi. Jesure obeodigūre gua masibea, arīñorā erā cuiri īhajibiridigūre.

³⁰Erā eroparīcū yūhripū īgu:

—¿Īgure obeodigūre mūa masibiricū, yūre īacū iidigu arīgu Goāmū īgu obeodigu arībiribocuri īgu? ³¹Goāmū ñeri iigure īgu serērire peebeamī. Iri tamerare mari masia. Ñerire iigure peebiriqueregū ta Goāmūre umupeogūre, īgu dorerire iigure īgu serērire peemi Goāmū. ³²Negohraguere i yeba arīñugacūguere, mata masa dehyoagūgue ta cuiri īhajibigūre ne yujugūpūre īhacacū iigu marimūripū. ³³Eropigū Jesu Goāmū īgu obeodigu arībigū yūre īacū iibiriboñūmi, arīpū īgu erāre.

³⁴Erāpū ōpa arī yūhriñorā:

—Mūhū mata ñegu arīmūriya. ¿Eropa arīqueregū ta guare buheri mūhū? arīñorā judio masa oparā.

Eropa arītuha erā īgure cohā wiuñorā.

Jesu yare gamebirā cuiri īhajibirā iro dopa āhrima, arī wereñūmi Jesu

³⁵Eropigū cuiri īhajibigūre erā cohā wiurare Jesu peemi. Europa peegu cuiri īhajibiridigūre gua bocajacū, īgure serēpimi.

—¿Masūre Goāmū īgu obeodigūre umupeori mūhū? arīmi Jesu.

³⁶—Opū, ¿noa āhriri īgu? Īgure masigu umupeogūra, arīmi cuiri īhajibiridigūpū Jesure.

³⁷—Īgure īhatuhabū mūhū. Dohpaguere mū mera wereniguigu īgu ta āhraa yūhū, arīmi Jesu cuiri īhajibiridigūre.

³⁸—Opū, mūre umupeoa yūhū, arīmi cuiri īhajibiridigūpū.

Eropa arĩgu ĩgu Jesu pohro mereja ĩgure umupeomi.

³⁹Ĩgu eropa umupeocũ ĩagu õpa arĩmi Jesu masare:

—Õarã, ñerã sã erã iirare masicũ iibu aribu yũhũ. Cuirĩ ĩhajabirã erã ĩabiro dopa ta yũ Pagure masibirã ãhrima. Eropa masibirãre yũ Pagure masicũ iigu aribu yũhũ. “Gua õaro masia,” arĩ pepinirã sãre õaro erã masibirirare masicũ iigu aribu yũhũ, arĩmi Jesu.

⁴⁰Ĩgu eroparĩcũ peerã bajamerãgã fariseo masa ĩgure õpa arĩma:

—“Cuirĩ ĩhajabirã erã ĩhamasibiro dopa ta masibea mũa sã,” ¿arĩri mũhũ gũare? arĩma fariseo masa Jesure.

⁴¹Erã eroparĩcũ Jesu õpa arĩmi:

—“Cuirĩ ĩhajabirã erã ĩha masibiro dopa ta diaye õaro masibea gua,” mũa arĩcũ dipuwaja mariboya. “Gua õaro masirã ãhraa,” mũa arĩrã ãhraa. Eropirã yũre peediabirira dipuwaja mũare dipuwaja ãhraa dohpagure, arĩmi Jesu erãre.

Oveja ĩhadibugũ queoriñere wereñumi Jesu

10 ¹Pũhrũ queoriñe mera werenigui queogu buhebu õpa arĩmi Jesu gũare gajirã masa sãre:

—Diaye arĩgu iiaa mũare. Oveja diburi sãriro disiporo ñajabigũpũ gajipũgue ñajagũpũ yajari masũ ãhrimi. ²Disiporo ñajagũpũ ovejare ĩhadibugũ ãhrimi. ³Disiporo coregũ disiporo pãgũmi ovejare ĩhadibugũ ĩgu ñajariborore. Ovejare ĩhadibugũ eracũ ĩgu wereniguirire peerã ãhrima ĩgu oveja. Erãre sihugũ, erã waĩ mera sihubeomi ĩgu. Eropigu erãre sãrirogue árĩrãre sihu wiuniguimi disiporogue. ⁴Ĩgu yarãre árĩpeherrerãre sihu wiu erãre mũhtanũgajami. Ovejapũ ĩgu wereniguirire masirã, ĩgure nũrsiama. ⁵Gajigũre erã masibigure nũrsiabeama erã. Eropirã gajirã erã wereniguirire peerã, gũi omagã wahama, arĩmi Jesu masare.

⁶Iri ĩgu werequerecũ ta irire peerã masibirima erã.

Jesu ovejare õaro ĩhadibugũ iro dopa ĩgu yarãre õaro ĩhadibumi

⁷Eropigu dipaturi Jesu erãre gua sãre weremi daja:

—Diaye mũare arĩgu iiaa. Ovejare diburi sãriro disiporo iro dopa ãhraa yũhũ. ⁸Árĩpeherrerã yũ core arinirã gũyarire buherã yajari masa iro dopa ãhrima. Erã eropa árĩquerecũ ta oveja iro dopa árĩrã yaharãpũ gajirãre ne pee wahgãbeama. ⁹Yũ ovejare diburi sãriro disiporo iro dopa ãhraa. Iri disiporo ñajarã iro dopa ta ãhrima yũre umupeorã. Eropigu erãre peamegue wabonirãre taugũra. Ovejare cãhmotari sãriro erã cãhmotaro dopa ta yũ taunirãre cãhmotagũca. Eropirã erã gamerire oparãcoma, arĩmi Jesu.

¹⁰Eropa arĩtuha õpa arĩnemomi:

—Mũare gũya buherã ovejare yajari masa iro dopa ãhrima. Gajirã yajadiarã wejẽdiagãrima. Oveja iro dopa árĩrã yaharã árĩpeherrerinũri Goãmũ mera árĩcũ iigu aribu yũpũ. Eropigu yaharã mũmũri nũcu erã õaro árĩcũ iibu aribu yũpũ.

¹¹Ovejare õaro ĩhadibugũ iro dopa arĩgu ãhraa yũhũ. Ovejare õaro ĩhadibugũ

sĩribu árĩqueregũ ta ĩgu ovejare cãhmotaniguigucumi. Yaharã Goãmũ mera erã eropa árĩniguiburire sĩriguca. ¹²Ĩgu mohmeri masũpũ òaro ovejare ĩhadibugũ árĩbeami. Eropirã oveja ĩgu yarã árĩbeama. Eropigũ nũgũ majagũ diaye ovejare ñeagu ĩgu aricũ ĩagu ĩgu mohmeri masũpũ ovejare cóãcã gũĩ omagã wahami. ĩgu eropa cohãpigãra pũhrũ, nũgũ majagũ diaye ĩgu ovejare ĩgu ñeacũ ĩarã ovejapũ omasirigã wahama. ¹³Ĩgu mohmeri masũpũ ĩgu wajatari dihtare gahmemi. Eropigũ ĩgu ovejare òaro ĩhadibudiabeami, arĩmi Jesu.

¹⁴Eropa arĩtuha òpa arĩnemomi queoriñe mera:

—Ovejare òaro ĩhadibugũ iro dopa àhraa yũhũ. Eropigũ yaharãre masia yũhũ. Eropirã yaharã sã yũre masima. ¹⁵Eropa ta yũ Pagũ sã yũre masimi. Eropigũ yũ sã yũ Pagũre masia. Yaharã Goãmũ mera erã árĩniguiburire sĩriguca. ¹⁶Gajirã oveja gaji sãriro majarã iro dopa árĩrã gajirã masa sã yaharã árĩrãcoma. Erã sãre aĩgũca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yũju curu ta árĩrãcoma. Eropigũ yũ dihta yaharãre ĩhadibugũca, arĩmi Jesu.

¹⁷Eropa arĩtuha òpa arĩnemomi daja:

—Yaharã Goãmũ mera erã árĩniguiburire sĩriguca yũhũ. Yũ sĩrira pũhrũ masa mũriagũca. Yũ eropa iibu árĩcũ yũ Pagũ yũre mahimi. ¹⁸Yũ wejẽdorebiricũ yũre wejẽmasibiriboñuma erã. Yũ gamero mera yũre wejẽrãcoma. Eropigũ yaharã Goãmũ mera erã ya árĩburire sĩriguca. Sĩrimasia yũhũ. Eropigũ masa mũriamasia. Yũ Pagũ yũre irire ta iidoremi, arĩmi Jesu.

¹⁹Ĩgu eroparĩcũ peerã judio masa pe curu dũca warima daja. Gajirã gajiropa pepi, gajirã sã gajiropa pepinirã árĩma.

²⁰—Ĩgu watĩre opami. Eropigũ goroweregũ àhrimi. ¿Duhpirã ĩgũre dipaturi peeri mũa? arĩma gajirã bajarã judio masa.

²¹Gajirãpũ òpa arĩma:

—Watĩ mera goroweregũ árĩgũ eropa òaro arĩ wereniguibiriboñumi. Cuirĩ ĩhajabigũre ĩacũ iimasibiriboñumi watĩre opagu. Eropa árĩgũ árĩgũ ĩgu watĩre opabeami, arĩma gajirã judio masa.

Judio masa Jesure gamebiriñuma

²²Gajinũ Jerusaléngue bosenu iirã iima dipaturi judio masa. Goãmũ wihire erã Goãmũ ya árĩburire erã apiri bosenu árĩbũ. Irisubu yura wahgũro árĩbũ. ²³Irinũ Salomo waĩcũri taribugue Goãmũ wihigue árĩri taribure Jesu gũa mera ĩhacurigu iimi. ²⁴Iri taribugue ĩgu árĩcũ ĩarã judio masa ĩgu pohrogue gamenere ĩgũre serẽpima daja:

—Yoatariari boje gũare òaro werebeaa mũhũ. Diaye gũare òaro were purumujuque. ¿Cristo Goãmũ ĩgu obeodigu ta àhriri mũhũ? arĩma erã ĩgũre.

²⁵Erã eroparĩcũ peegũ òpa arĩ yũhrimi Jesu:

—Mũare weretuhabu yũhũ. Yũ eropa werequerecũ ta yũre peebeaa mũa. Yũ Pagũ ĩgu dorero dopa ta ĩgu turari mera ii ĩhmurabu mũare. Eropa iigu yũ Cristo árĩrire ta mũare ĩhmugũ iirabu. ²⁶Yũ eropa ii ĩhmuquerecũ ta yũre peebeaa mũa. Mũapũ yaharã árĩbeaa. Eropirã gajigu yarã oveja iro dopa árĩrã yũpũre peebeaa

m̄ua. ²⁷Oveja erāre īhadibugure erā peediro dopa ta yaharā yure peema. Eropigu erāre masia yuh̄u. Eropirā erā yu mera wahama. ²⁸Eropigu um̄uri n̄ucu Goām̄u mera ár̄icū iiaa erāre. Eropirā erāp̄u peamegue wasome. Eropigu yaharāre yu īhadibucū gajirāp̄u ne yure emamasibeama erāre. ²⁹Yu Pagu yaharāre yure odigu yu tauro turam̄i. Eropirā yu Pagu s̄a yaharāre igu īhadibucū gajirā igu s̄are ne emamasibeama. ³⁰Yuh̄u, yu Pagu mera yujugu ta āhraa, ar̄imi Jesu judio masare.

³¹Igu eropar̄icū peerā judio masap̄u igure deaburi utāre dipaturi aīma daja. ³²Erā eropa iicū īagu Jesu erāre serēpimi:

—Yu Pagu igu turari mera baja deyoro moarire ii īhmurab̄u m̄uare. ¿Ñehenore iira dipuwaja utā mera deadiari m̄ua yure? ar̄i serēpimi.

³³Igu eropar̄icū peerā ōpa ar̄ima erā:

—Goām̄u turari mera m̄u ii īhmuri dipuwaja m̄ure utā mera dea wejēdiabeaa gua. Goām̄ure m̄u ñero wereniguiri dipuwaja m̄ure utā mera dea wejēdiaa gua. Masu ár̄iqueregu ta m̄uh̄u “Goām̄u āhraa yuh̄u,” m̄u ar̄iri dipuwaja m̄ure utā mera dea wejēdiaa gua, ar̄i yuhrima erā.

³⁴Erā eropa ar̄i yuh̄ricū peegu Jesu erāre weremi:

—M̄ua s̄are “Goāmarā,” ar̄i piyumi Goām̄u. Eropa ta ar̄i gojañuma igu dorerire erā gojarap̄ugue. ³⁵Goām̄u yare erā gojarap̄u queoro ár̄icū mari masia. “Ḡuyari āhraa,” irip̄ure ar̄imasibeaa mari. Eropigu igu yare pepirāre diaye ta igu “Goāmarā,” ar̄i piyumi. ³⁶Goām̄u yure beyenijagu i yebaguere obeomi. Eropigu “Yuh̄u Goām̄u magu āhraa,” yu ar̄ira dipuwaja “Goām̄ure ñero wereniguigu iimi Jesu,” arāa m̄ua yure. ¿Duh̄pirā yure eropa ar̄iri m̄ua? ³⁷Yu Pagu igu gamero dopa ta igu turari mera yu ii īhmubiricū tamerare yu buherire “Diaye ta āhraa,” ar̄ibiriboya m̄ua. ³⁸Yu Pagu igu turari mera yu ii īhmuquerecū ta yur̄ure umupeodiabiriboca m̄ua. Eropa umupeodiabiriquererā ta igu turari mera yu ii īhmucū īarā yu iirare “Diaye ta āhraa,” ar̄ique m̄ua. M̄ua eropa ar̄irā, yu Pagu mera gua yujuro mera ár̄icū masirāca m̄ua. Eropirā yuh̄u, yu Pagu mera yujuro mera yu ár̄icū masirāca m̄ua. Eropirā peerāca m̄ua, ar̄imi Jesu erāre.

³⁹Igu eropar̄icū erā igure dipaturi ñeadiarima. Erā eropa ñeadiacū igu duhri wiria wami.

⁴⁰Eropa wiriadigugue ta Ñu masare igu waīyem̄htadirogue Jordán waīc̄uriya sipu majasesgue gua dipaturi wab̄u daja. Erogue dujacāb̄u.

⁴¹Eropirā masa bajarā igure īarā erama. Ōpa ar̄ima erā erā basi:

—Ñu waīyegup̄u Goām̄u turari mera deyoro moarire ii īhmubirimi. Eropa ii īhmubiriquerecū ta ár̄ipehreri Jesure igu wererap̄u diaye ta āhraa, ar̄ima masa erā basi.

⁴²Eropirā masa erogue bajarā umupeoma Jesure.

Lázaro waīc̄ugu s̄iria wañumi

11 ¹Eropi Judea yebague Betania waīc̄uri maca majagu Lázaro waīc̄ugu ar̄imi. Iri maca igu pagu porā nome María, Marta mera ar̄ima. ²Mariapu

Jesure poesuri mera sũbo, igo poari mera ĩgũre tucoebodigo árĩmo. Igo tĩgu Lázaroꝑũ dorecũgu iĩpũ. ³Eropirã erã nome gajirãre Jesure weredorerã obeoñorã.

—Opũ, mũ mahĩgu dorecũgu iimi, arĩ weredorerã obeoñorã Lázaro pagũ porã nome.

⁴Erã gua pohrogue eraa, iri querere werecũ peegu õpa arĩmi Jesu guare.

—Dohpaguere Lázaro ĩgu dorecũri sĩriburi árĩbeaa. Goãmũ turarire masare ĩhmuburire dohpaguere ĩgu dorecũmi. Eropirã yũ turari opagu árĩcũ sãre masa ĩarãcoma, arĩmi Jesu.

⁵Jesu Martare, igo pagũ mago, Lázaro sãre turaro mahĩmi. ⁶Eropĩgu Lázaro ĩgu dorecũrire peequeregu ta ero Jesupũ penũ dujanimi. ⁷Penũ pũhrũ Jesu õpa arĩmi guare ĩgu buherãre.

—Dipaturi Judea yebague dujaa warã daja, arĩmi guare.

⁸—Buhegu, cãrugã ta mũre judio masa utã mera dea wejẽdiama. ¿Duhpĩgu dipaturi dujadiari mũhũ? arĩbũ gua ĩgũre.

⁹Gua eroparĩcũ peegu ĩgu erã wejẽmasibirirare weregu, werenĩgui queori mera guare õpa arĩmi:

—Wũaro guñaricũbiricãque. Yujunũre doce horari gohra ãhraa. Abe mũũ majagu árĩcũ õaro ĩhaa mari. Eropirã mũũre curirã ne cohresome mari. ¹⁰Naitĩaro curirã cohrema. Abe mũũ majagu maricũ õaro ĩabeama erã, arĩmi Jesu.

¹¹Eropa arĩgu guare werenemomi.

—Mari mera majagu Lázaro carĩgu iicumi. ĩgu eropa carĩquerecũ ta yũhũ ĩgũre wahgũgu wagua, arĩmi guare.

¹²—Opũ, Lázaro carĩgu árĩgu tarĩgućumi, arĩbũ gua.

¹³Gua eropa arĩquerecũ ta Jesupũ “Carĩgu iicumi,” arĩgu, “Sĩria wami,” arĩgu iidĩgu arĩmi. ĩgu “Lázaro carĩgu iicumi,” arĩcũ peerã “Lázaro soogu iicumi,” arĩ pepirĩbũ guapũ. ¹⁴Gua eropa arĩ pepicũ masĩgu Jesu guare diaye weremi.

—Lázaro sĩria wañumi. ¹⁵Yũ mariro ĩgu sĩricũ õapũricãa. Eropirã mũa yũre umupeonemorãca. Ina ta. Mari ĩarã warã ĩgu pohrogue, arĩmi Jesu.

¹⁶Toma sũhrũadĩgu erã arĩguꝑũ õpa arĩmi guare:

—Mari sã Jesu mera warã. ĩgũre wejẽrã mari sãre wejẽporo, arĩmi Toma.

Jesu “Eropa arĩnĩguicãcũ iigu masare masugu ãhraa,” arĩñumi

¹⁷Eropĩ gua erogue ejara pũhrũ ero majarã õpa arĩ werema Jesure:

—Wapĩcũrinũ taria Lázaro mũũre masa gobegue erã apira pũhrũ, arĩ werema ĩgũre.

¹⁸Betaniapũ Jerusalén pohrogã uũre kilómetros yoaro dujabũ. ¹⁹Eropirã judio masa bajarã Martare, María sãre ñehamere orerã eranirã árĩma Lázaro ĩgu sĩrira pũhrũ. ²⁰Eropĩgu Jesu mera gua ejaboro pohro árĩcũ peego Martapũ guare bocatĩrigo eramo. Igo bocatĩrigo wacũ Marĩapũ igo ya wihi dujadigo árĩmo. ²¹Eropa bocatĩrigo Marta õpa arĩmo Jesure:

—Opu, yu tĩgu ĩgu sĩriboro core mũhu ohõ árĩcũ ĩgu sĩribiriboañumi.
 22 Dohpague sãre Goãmure mu serẽcũ ĩgu mu serẽro dopa ta iigucumi,
 arĩmo Marta Jesure.

23—Mu tĩgu masagucumi, arĩmi Jesu igore.

24—I yeba pehrerĩnu ĩgu masa muriaborore masia yũhu, arĩmo igo.

25 Igo eroparĩcũ Jesu weremi daja:

—Yũhu sĩrinirãre masacũ iigu ãhraa. Masare yu mera eropa árĩniguicũ
 iigu ãhraa. Yure umupeogu sĩriquerẽgu ta eropa árĩniguicãgucumi.

26 Eropirã árĩpehrerã Goãmũ mera árĩniguirã yure umupeorã peamegue
 wasome. ¿Ire masiri mũhu? arĩmi Jesu igore.

27—Opu, masia yũhu. “Cristo Goãmũ magu i yebague arigucumi,” erã
 arĩdigu mu árĩcũ masia yũhu, arĩmo Marta Jesure.

Lázaro ĩgu masa gobe pohro Jesu oreñumi

28 Marta eropa arĩtuha igo pagu magore Marĩare sihugo wamo.

—Marire buhegu mari ya macare eranijagu iiami. Mure sihuami, arĩ
 yayarogã arĩ werepo Marĩare.

29 Igo eroparĩcũ peego Marĩa pobero mera wahgãnugaja, gũa pohrogue
 árĩmo Jesure ĩago arigo. 30 Erã ya macague ejanibicarabu dohpa. Marta
 guare igo bocatĩridirogue árĩnibu gũa. 31 Judio masa iri wihi Marĩare
 ñehamere orerã iinirã árĩma. Eropirã igo pobero mera wahgã wacũ iarã
 erã igore nurĩsiagãnirã árĩma. “Igo tĩgu mũrũre erã apira gobegue
 orego wago iicumo igo,” arĩ pepinirã árĩrima erã. Eropa arĩ pepirã igore
 nurĩsiagãnirã árĩma.

32 Eropigo Marĩa gũa pohrogue erago, Jesure ĩha, ĩgu guburi pohro merejamo.

—Opu, yu tĩgu ĩgu sĩriboro core mũhu ohõ árĩcũ ĩgu sĩribiriboañumi,
 arĩmo igo ĩgure.

33 Eropigu igo judio masa igo mera arinirã sã erã orecũ ĩagu Jesupu
 turaro bujawere ñero sĩporãcumi.

34—¿Lázaro mũrũre nohogue opari mũa? arĩ serẽpimi Jesu.

—Opu, ĩagu arique, arĩ sihugãma erã.

35 Erã eroparĩcũ peegu Jesu oremi.

36 ĩgu orecũ ĩha judio masa õpa arĩma erã basi:

—Lázaro mũrũre Jesu burigã mahirañumi, arĩma.

37 Gajirãpu õpa arĩma:

—Cuiri ĩhajabigũre ĩacũ iigu ãhrimi ihĩ Jesu. ¿Eropigu Lázaro ĩgu
 sĩriboro core masumasibiriboayuri? arĩma gajirã.

Lázarore masuñumi Jesu

38 Eropigu Jesu dipaturi turaro bujoweremi. Eropirã árĩpehrerã Lázaro mũrũ
 masa gobegue ejabu. Utãyegue árĩri gobegue ĩgu dupu mũraro erã sĩ acura
 gobegue árĩbu. Eropi iri gobegue wuariye utãye mera erã bihara gobegue árĩbu.

³⁹—Ūtāyere aĩ weaque, arĩmi Jesu.

Īḡu eroparĩcũ peego Marta sĩridigũ mũrũ pagũ mago õpa arĩmo:

—Opũ, dohpague wapicũrinũ wahaa ĩḡu sĩrira pũhrũ. Eropiro ĩḡu dũrũ mũraro urĩ árĩca, arĩmo Jesure.

⁴⁰—“Yũre umupeogo Goãmũ turarire ĩagoca,” mũre arĩrabũ, arĩmi Jesu Martare.

⁴¹Īḡu eropa arĩra pũhrũ erã utāyere aĩ weama. Erã eropa aĩ weara pũhrũ Jesu umarogue ĩha Goãmũre õpa arĩmi:

—Ahũ, yũre mũ peetuhabũ. Irire mũ iicũ masigũ mucubiria mũre.

⁴²Yũre mũhũ umũri nũcũ peeniguia. Irire masia. Eropa masiquereḡu ta yũhũ mũ obeodigũ árĩcũ õre niguirã erã masiburire mũre eropa arĩḡu iiaa.

⁴³Eropa arĩtuha Jesu turaro gaguiniguimi:

—Lázaro, arique, arĩ gaguiniguimi ĩḡu.

⁴⁴Īḡu eroparĩcũ sĩridigũ mũrũrũ ĩḡu mojotorire ĩḡu guburi sãre suhri gasiri mera erã diridigũ, ĩḡu dipurure suhri gasiri mera erã omadigũ masa gobegue wiririmi.

—Īḡure dirirare pãque ĩḡure, arĩmi Jesu

Judio masa oparãpũ Jesure ñeadiariñuma

Mt 26.1-5; Mr 14.1-2; Lc 22.1-2

⁴⁵Īḡu eropa masucũ ĩarã bajarã judio masa mera majarã María mera árĩnirã Jesure umupeoma. ⁴⁶Gajirãpũ erã mera majarã fariseo masa pohrogue eja, Jesu ĩḡu iirare wereñorã erãre. ⁴⁷⁻⁴⁸Eropirã pahia oparã, fariseo masa oparã sã gamenere, erã basi õpa arĩ wereniguiñorã.

—Jesu bajasuburi deyoro moarire ii ĩhmumi. Īḡu eropa iicũ, “Irire iibita,” mari arĩbircũ árĩpehrerã masa ĩḡure umupeo, ĩḡu mera wabocoma. Eropirã Roma majarã oparã Goãmũ wihire cóãdorerã obeorãcoma erã yarã surarare. Mari ya yeba sãre emarãcoma erã. Mari ya yeba majarã Jesure erã opũ erã apicũ ĩarã Roma majarã oparã guarã ñero iirãcoma marire. ¿Eropa iirã dohpa iirãcuri dohpaguere? arĩ wereniguiñorã erã erã basi.

⁴⁹Erã eropa arĩquerecũ ta gajigũ Caifa waicũḡu iri bojorire pahia opũ árĩḡu erãre werepũ.

—Mũarũ ne masibea. ⁵⁰Judio masa árĩpehrerã mari ya árĩburire yujugũ masũ ĩḡu sĩricũ õhaa. Īḡu sĩribircũ mari árĩpehrerã judio masa pehrea waboca. Irire mũa masibea, arĩmi Caifa erãre.

⁵¹Eropa arĩḡu ĩḡu gamero eropa arĩbiriñumi. Pahia tauro opũ ĩḡu árĩcũ judio masa ya árĩburire Jesu ĩḡu sĩriborore Goãmũrũ Caifare eropa arĩ weredoreñumi. ⁵²Jesu ĩḡu sĩrigũ judio masa ya dihta sĩribiriñumi. Sĩrigũ árĩpehrerã Goãmũ porã i yeba árĩpehrero árĩrã sãre erã ya árĩburi sãre sĩriñumi Jesu. Erã yuju curu árĩboro dopa sĩriñumi. ⁵³Caifa eroparĩcũ peerã erã “¿Jesure dohpa ii wejẽrãcuri mari?” arĩ wereniguirã ĩḡure wejẽmorã iĩñorã.

⁵⁴Ígure erã wejēdiacũ masigu Jesu bajarã judio masa watope dipaturi curigu wabirimi. Eropigu masa marirogã Efraín waïcuri macague guare sihu wami. Guare iri maca sihu dujanimi Jesu.

⁵⁵Irisubure Pascua bosenu gua judio masa bosenu árīboro merogã dūhyabu. Eropirã bosenu core masa bajarã gaji macari majarã masa Jerusalengue gamenerema. Pascua majare erã baboro core Goãmu ya árīburire erã basi coemorã ejanirã árīma. ⁵⁶Eropirã erã Jesure amarã iĩñorã. Erã eropa amacũ ïarã Goãmu wihigue árīrã õpa arĩ wereniguiñorã: —¿Bosenure ïagu aribiribocuri Jesu mua pepicũ? arĩ wereniguiñorã erã basi.

⁵⁷Eropirã pahia oparã, fariseo masa sã õpa arĩ weredoreñorã masare: —Jesu ïgu árīrore mua masirã wereque guare. Ígure ñeamorã iiaa gua, arĩñorã oparã masare.

María Jesu guburire poresuri mera pipeoñumo

Mt 26.6-13; Mr 14.3-9

12 ¹Pascua bosenu seis nuri gohra dūhyacũ Jesu gua ïgu buherã mera Betaniague ejabu. Lázaro Jesu ïgu masudigu iri maca majagu árīmi. ²Gua ejara pūhrũ Jesu sã gua ya bari árīburire iima gajirã. Eropirã Lázaro, Jesu, gua mera mesare dojabu. Gua eropa dojara pūhrũ Marta barire peomo guare. ³Eropigo María poresuripure nardo waïcuri goripure yuju kilo deco aĩgari, Jesu guburire pipeomo. Pipeotuha igo poari mera tucoemo. Igo eropa pipeora pūhrũ iri wihi ñaro poresu sehya wabu. ⁴Igo eropa iicũ ïha gua mera majagu, Jesure ïhaturirãre wiabu Juda Iscariotepũ õpa arĩmi:

⁵—¿Duhpigo iri poresuri eropa iisiriri goa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocurãre oboañumo igo, arĩmi ïgu.

⁶Judapũ mojomorocurãre itamudiabiriñumi. Ígu gua ya niyeru dibugu árīqueregu ta yajaricugu árīmi. Eropigu ïgu gua ya niyeru sãre yujuyerisuburi aĩmũrimi. Eropigu iri niyerure aĩdiagu árīgu, eropa arĩñumi ïgu Marĩare.

⁷Ígu eroparicũ peegu õpa arĩmi Jesu:

—Eropa arĩbita igore. Igo poresurire yure igo dũarare yure pipeoamo yure erã yaaboro core yũ dũpũre amuyugo. Mojomorocurãpũ mua mera eropa árīniguicãrãcoma. Eropirã mua gamero erãre omasia mua. ⁸Yũpũ i yebaguere eropa árīniguicãsome, arĩmi Jesu.

Pahia oparã Lázarore wejēdiañuma

⁹Eropirã Jesu ïgu Betaniague árīcũ peerã judio masa bajarã ïgure ïarã arima. Ígu dihtare ïarã aribirima. Lázaro sīridigu Jesu ïgu masudigure ïgu sãre ïarã arirã iima. ¹⁰Erã ïarã ejarare pahia oparã masirã Lázarore wejēdiañorã.

¹¹Lázaro s̄iridigu Jesu ĩgu masudigu árĩcũ ĩarã bajarã masa Jesure umupeoma. ĩgu eropa masucũ ĩarã bajarã judio masa erã pahia erã buheripure cóãma. Erã eropa cóãcũ ĩarã pahia oparãpũ guataria wa, Lázaro sãre wejediañorã.

Jerusaléngue ejañumi Jesu

Mt 21.1-11; Mr 11.1-11; Lc 19.28-40

¹²Pascua bosenu erã iicũ bajarã masa Jerusaléngue ĩarã wanirã árĩma. Gajinu Jerusaléngue Jesu ĩgu waburire masa peenirã árĩma.

¹³Eropirã bejepure aĩgã, ĩgure bocatĩrirã wama. Eropa bocatĩrirã õpa arĩ gaguiniguima erã.

—Īre umupeorã. Ihĩ Goãmũ ĩgu obeodigu õaro ariporo. Ihĩ judio masa mari opu ta àhrimi, arĩ gaguiniguima erã.

¹⁴Jesu burrogã ĩgu bocadigu weca peyami. ĩgu eropiigu Goãmũ yare erã gojarapũ werediro dopa ta iimi. Õpa arĩ gojañumi Goãmũ yare wereyumũhtadigugue.

¹⁵Jerusalén waĩcuro majarã güibiricãque mũa. Īaque. Mũa opu burrogã weca peyagãrimi, arĩ weremũhtañumi Goãmũ yare erã gojarapũgue.

¹⁶Irire gũa ĩgu buherã õaro masinibiribũ. Eropa masibiriquererã ta umarogue Jesu ĩgu mũriara pũhrũ gũa erã gojara mũrãre guña boca pee masibũ. Õpa arĩ pepibũ: “Goãmũ yare erã gojarapũgue Jesure weremũhtañuma. Eropiro Goãmũ yare erã gojarapũ aridiro dopa ta sihajabũ Jesure,” arĩ pepibũ gũa basi.

¹⁷Lázarore erã apira gobegue árĩgure Jesu ĩgu piyucũ ĩgure ĩgu masucũ ĩanirãpũ weresiríniguinirã árĩma masare. ¹⁸Eropirã Lázarore Jesu ĩgu masurare erã peenirã árĩrã masa bajarã Jesure bocatĩrirã wama. ¹⁹Erã Jesure eropa umupeocũ ĩarã fariseo masa erã basi õpa arĩñorã.

—Árĩpehrerã Jesu yarã dihta warã iima dohpaguere. Eropirã mari dohpa iimasibea erãre, arĩñorã fariseo masa erã basi.

Bajamerãgã Griego masa Jesure amagãriñuma

²⁰Eropi bosenu Goãmũ wihigue Goãmure umupeorã eranirã mera majarã bajamerãgã griego masa arĩñorã. ²¹Eropirã erã Felipe pohrogue erañorã. Felipepũ Betsaida waĩcũri maca Galilea yeba árĩri maca majagu árĩmi. Eropirã ĩgu pohrogue erarã õpa arĩñorã ĩgure:

—Jesure ĩadiaca gũa, arĩñorã erã.

²²Erã eroparĩcũ peegu Felipe Andreguere weregu warũ. Eropirã erã perã Jesure werema. ²³Erã werera pũhrũ Jesu gũare weremi:

—Yũhũ masũ Goãmũ ĩgu obeodigu àhraa. Yũre árĩpehrerã umupeoburibusu árĩro iiaa dohpaguere. Dohpaguere yũ s̄iribusibusu árĩro ta iiaa. ²⁴Diaye mũare arĩgu iiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera pũhrũ bajayeri dũcasuia. Eropa ta yũ s̄irira pũhrũ yũre erã yaara pũhrũ bajarã masare Goãmũ mera

eropa árínigumorãre iiguca yuhũ. ²⁵I yeba mua árĩrire wũaro pepiboca mua. Eropã pepirã Goãmũre guñabirã peamegue warãca mua. I yeba mua árĩrire eropa pepicãrã, Goãmũ mera eropa áríniguirãca. ²⁶Yahare iidiarã, yũ buherire ðaro peeque mua. Mua eropa iirã mua sã yũ árĩboroguere árĩrãca. Yahare iigũre yũ Pagurũ umupeogũcumi, arĩmi Jesu gũare.

Jesu ĩgu sĩriburiñere wereñumi

²⁷Ōpa arĩnemomi gũare.

—Dohpaguere yuhũ ñero sĩporãcua. ¿Yũ Pagũre dohpa arĩgũcuri yuhũ? “¿Ahũ, yũ ñero tariborore tauque,” ¿arĩbocuri yuhũ? Irire arĩbeaa yuhũ. Ñero taribu ta i yebaguere aribũ. Eropiro yũ ñero tariburisubũ dohpaguere ãhrraa, arĩ weremi Jesu gũare ĩgu buherãre.

²⁸Eropigũ òpa arĩmi ĩgu Pagũre:

—Ahũ, mũ turagũ árĩrire dohpaguere ĩhmuque masare, arĩmi Jesu ĩgu Pagũre. ĩgu eroparĩcũ umarogue wereniguiro caribũ.

—Turagũ yũ árĩrire masare ĩhmutuhabũ. Dohpaguere eropiigũ dipaturĩ ĩhmugũca masare, arĩro caribũ.

²⁹Eroparĩcũ peerã ero niguirã masa bajarã òpa arĩma:

—Bupu arĩcumi eropa busũgũ, arĩma masa.

—Anyu Jesure weregũ iiami, arĩma gajirã masa.

³⁰Ōpa arĩmi Jesurũ:

—Umarogue yũre peedorero eropa busũbiro carabũ. Mũapũre peedorero eropa carabũ. ³¹Dohpaguere i yeba majarã erã ñeri iira dipuwaja dipuwajacũrãcoma. I yeba majarã erã opũre watĩre Goãmũ cóãgũcumi. ³²Eropigũ crusague yũre erã aĩ wahgũ nugucũ bajarã masare yaharã árĩmorãre iiguca yuhũ, arĩmi Jesu.

³³Eropa arĩgũ crusague ĩgu sĩriborore weregũ iimi Jesu masare. ³⁴ĩgu eroparĩcũ peerã masarũ ĩgũre òpa arĩma:

—Goãmũ yare erã gojarapũ òpa arãa: “Cristo árĩpehrerinũri arĩgũcumi,” arĩ gojañuma. ¿ĩgu eropa arĩ gojacũ mũre masũre Goãmũ ĩgu obeodĩgũre dohpa arĩronore mũre wejẽ crusague aĩ wahgũrãcuri masa? ¿Goãmũ ĩgu obeodĩgũ noa ãhrĩri ĩgu? ¿Cristo árĩbearĩ mũhũ? arĩ serẽpima erã Jesure.

³⁵Erã eroparĩcũ òpa arĩ yuhrimi Jesu:

—Boyoriñe iro dopa arĩgũ masare Goãmũ yare ðaro masicũ iiaa yuhũ. Pũhrũñarigã mua mera arĩsome yuhũ. Mũare yũ buhecũ dohpaguere peeque ñerire mua iibiriburire, Goãmũ mera mua eropa áríniguiburire. Yũ buherire peebirã naitĩaro curirã iro dopa erã waborore masibeama.

³⁶Eropigũ boyoriñe iro dopa ta arĩgũ yuhũ ta ãhrraa. Eropigũ mũare buhegũ Goãmũ yare ðaro masicũ iiaa mũare. Dohpaguere yũ waboro core yũre umupeoque. Eropã umupeorã yaharã árĩrãca mua, arĩmi Jesu.

Eropa arĩ weretuha waha wami erãre duhri wahgãgũ.

Judio masa Jesure umupeobiriñuma

³⁷Bajasuburi Goāmũ turari mera eräre Jesu ĩgu deyoro moarire ii ĩhmuquerecũ ta judio masa bajarã ĩgure ne peediabirima. ³⁸Goāmũ yare erã gojarapũ Isaia mũrũ ĩgu gojadio dopa ta eropa iirã iima erã. Ōpa arĩ gojañumi Isaia:

Goāmũ, mũ buherire gũa werecũ masa peediabeama. Mũ turarire eräre mũhũ ii ĩhmuquerecũ ta irire “Diaye árĩbeaa,” arĩma erã, arĩ gojañumi Isaia Goāmũ yare gojarapũgue.

³⁹Erã eropa peediabiricũ ĩagu Goāmũ eräre masibiricũ iĩnumi. Iri sãre Isaia ōpa arĩ gojañumi daja:

⁴⁰Cuiri ĩhajibirã iro dopa árĩcũ iidi árĩmi Goāmũ eräre. Eropigũ ĩgu yare masibiricũ iidi árĩmi eräre. Eropirã ĩgu turarire erã ĩaquererã ta erã ĩarare masibirinirã árĩma erã. Eropirã ĩgu buherire peequererã ta irire masibirinirã árĩma erã. Goāmũ yare masirã erã ñerire cóadoreboñuma. Eropigũ eräre tauboñumi ĩgu, arĩ gojañumi Isaia Goāmũ yare erã gojarapũgue.

⁴¹Isaia Cristo turarire masiyudigũ eropa arĩ gojamũhtañumi.

⁴²Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare güirã gajirã masare Jesure erã umupeorire werebirinirã árĩma. Irire erã werecũ peerã gũa judio masa buheri wihigue eräre ñajadorebiriboñuma fariseo masapũ. ⁴³Goãmũre mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã áhrraa,” arĩ gajirãre werediabirinirã árĩma.

Jesu wererire erã peediabiriri dipuwaja masa dipuwajacũrãcoma, arĩ wereñumi Jesu

⁴⁴Masa bajarã gũa pohro gamenerenirãre Jesu turaro busuro mera weremi: —Yũre umupeogũ yũ dihtare umupeobeami. Yũre obeodigũ sãre umupeomi ĩgu. ⁴⁵Eropirã yũre masirã yũre obeodigũ sãre masima. ⁴⁶Yũhũ boyoriñe iro dopa ta árĩgu yũhũ Goāmũ yare buhegu ahraa i yebaguere. Eropigũ Goāmũ yare mũare masicũ iiaa. Yũre umupeogũ naitĩaro wagũ iro dopa ñerire iiniguisome. Yũre umupeogũ diaye pepigũcumi. ⁴⁷Gajirã yũ wererire peequererã ta irire yũhribeamã. Erã eropa yũhribiriquerecũ ta, erã yũhribirira dipuwaja moasome yũrũ dohpã. I yebaguere dipuwaja moagũ arigũ aribiribũ yũhũ. I yeba majarãre peamegue wabonirãre taugũ arigũ aribũ yũhũ. ⁴⁸Yũre gamebigũre yũ wereri sãre gamebigũre dipuwaja moari árĩroca. ĩgu yũre peebirira dipuwaja i mũmũ pehrecũ dipuwajacũgũcumi. ⁴⁹Yũhũ yũ gamero werebeaa. Yũ Pagũ yũre obeodigũrũ yũre weredoremi. Eropiro yũ wereripũ ĩgu ya wereniguirĩ áhrraa. ⁵⁰ĩgu ya wereniguirire peerã Goãmũ mera eropa árĩniguirãca mũa. Eropigũ yũ Pagũ ĩgu weredorediro dopa ta werea mũare, arĩmi Jesu gũare.

Jesu ĩgu buheräre guburire coeñumi

13 ¹⁻³Eropi Pascua bosenu coregã áriñu. Iri ñamire Jesu gña ĩgu buherã mera iri bosenure babu áriñi. Eropigu i yebare ĩgu wiriaborore ĩgu Pagu pohro waburire merogã duhyacũ masidigu áriñi Jesu.

Gña barisubu Judare wafı doretuhadigu áriñi ĩgu pepirigue. Eropigu ĩgure Simo Iscariote magure Jesure İhaturiräre iri ñamire ĩgu wiaburire doretuhadigu áriñi. Jesu ĩgu yaräre i yeba áriñäre burigã mahidigu áriñi. Eropigu ĩgu mahirare İhmubu gña guburire coemi. İgu Goãmũ pohrogue ĩgu arirare, pũhũ ĩgu umarogue ĩgu mũriaburi säre masidigu áriñi. İgu Pagu Goãmũ ĩgure áriñehrerã weca opu ĩgu apira säre masidigu áriñi. ⁴Eropa masiqueregu wahgãñugaja, ĩgu suhriro weca majañere tuwea suhriro gasiro mera ĩgu paru yujũre dirimi. ⁵Dirituha soropa mera decore pisã, guare ĩgu buheräre gña guburire coenugami. Guare coetuha ĩgu dirira gasiro mera tucoemi gña guburire.

⁶Gajirã buheräre coegã, Simo Pedroguere ejami. İgu guburire ĩgu coeboro core, Pedropũ ĩgure õpa arıñi:

—Opũ, ¿yu guburire coebu iiri mũhũ? arıñi Jesure Pedro.

⁷—Dohparagã yũhũ mũre iiburire masibeaa mũhũ. Eropa masibiriqueregu ta pũhũ masigũca, arıñi Jesu ĩgure.

⁸—Yu guburire ne coesome mũhũ, arıñi Pedro.

—Mũre yũ coebiricũ yahagu árisome mũhũ, arıñi Jesu.

⁹—Opũ, yũ guburi dihtare coebiricãque. Yu guburire, yũ mojotorire, yũ dipuru säre coeque, arıñi Pedro.

¹⁰İgu eroparicũ Jesu õpa arıñi:

—Yujugu masu guhagu ĩgu dupure õaro tucoepohomi. Eropiro ĩgure dipaturi tucoema masiya mara. İgu guburi dihtare coero gahmea. Áriñehrerã mũa ñeri iirare coenirã mũa áriñquerecũ ta yujugu mũa mera majagu ĩgu ñerire coeya marigu añhriñi, arıñi Jesu.

¹¹Jesu ĩgure İhaturiräre wiabure masituhãñumi. Eropa masigu “Yujugu mũa mera majagu ĩgu ñerire coeya marigu añhriñi,” arıññumi ĩgu.

¹²Gña guburire coetuha, suhrirore sañatuha, doajami daja ĩgu doadiro ta. Tuhaja õpa arıñi guare:

—¿Dohparagã yũhũ mũare iirare masiri mũa? ¹³Mũa yure “Buhegu,” arı piyurã, “Opũ,” arı piyurã diaye ta arıñã iiaa yure. Mũare buhegu, mũa opu diaye ta añhraa yũhũ. ¹⁴Eropirã yũhũ mũare buhegu, mũa opu áriñqueregu ta mũa guburire yũ coecũ mũa sã mũa mera majaräre guburire coeque. ¹⁵Dohparagã mũa iiburire mũare İhmubũ. Mũa mera majaräre mũa itamuburire mũare İhmubũ. Mũare yũ iidiro dopa ta mũa sã iique. ¹⁶Diaye mũare arıgu ta iiaa. Mũa yũ pohro majarã dopa arıñã yũ tauro áriñbeaa. Mũare buhedore yũ obeorã añhraa mũa. Eropirã yũ tauro áriñbeaa mũa. Eropa iigu ta “Yu iidiro dopa ta iique,” arãbũ yũhũ mũare. ¹⁷Ire mũa masirã, yũ dorerire iirã, mucubirirã áriñrãca mũa.

18 “Mũare árīpehrerãre eropa arĩbeaa. Yũ beyenirãre masia yũhũ. Goãmu yare erã gojarapũ arĩdiro dopa ta eropa waroca. “Yũ mera bagũ ta yũre wejẽdiami,” arĩ gojañuma Goãmu yare erã gojarapũgue. 19 Ñĩgu yũre eropa wiaboro core ire wereyugũ iiaa mũare. Yũre ñgu eropa iira pũhrũ “Jesu ta Cristo Goãmu ñgu obeodigu ãhrimi,” mũa arĩburire ire mũare wereyugũ iiaa yũhũ. 20 Diaye ta mũare arĩgu iiaa. Yũ obeonirãre gamegu yũ sãre gahmemi ñgu. Eropigu yũre gamegu yũre obeodigu sãre gahmemi ñgu, arĩmi Jesu guare ñgu buherãre.

Juda Jesure ñhaturirãre ñgu wiaborore wereñumi Jesu

Mt 26.20-25; Mr 14.17-21; Lc 22.21-23

21 Eropa arĩ weretuha Jesu turaro bujaweremi. Eropa bujaweregu õpa arĩ weremi ñgu guare.

—Diaye mũare arĩgu iiaa. Yujugu mũa mera majagu yũre ñhaturirãre wiagũcumi, arĩmi Jesu.

22 Ñgu eroparicũ peerã Jesure wiabure masibirã, gũa game ñhamehtubũ.

23 Yũhũ ñgu buherã mera majagu Jesu ñgu mahigũpũ ñgu pohro doabũ.

24 Eropigu Simo Pedro yũre ñgu mojoto mera sipũ serẽpidoremi Jesure ñguare wiabure: 25 Eropigu yũpũ Jesu pohro doadigu serẽpiñabũ ñguare:

—Opũ, ñnihire arĩgu iri mũhũ? arĩbũ yũhũ.

26 —Iru panrure mohwa aĩ, yũhũ yoso ogũ ñgu ta ãhrimi yũre wiabu, arĩmi Jesu.

Eropa arĩtuha iriru panrure ñgu mohwarañere yosotuha Judare Simo Iscariote magũre omi. 27 Eropigu panre ñgu ora pũhrũ watipũ Judare ñero iidoredigu arĩmi. Eropigu Jesu ñguare õpa arĩmi:

—Mũ iiburire yojaro mera ii purumujuque mũhũ, arĩmi Jesu Judare.

28 Ñgu eroparicũ peerã gũa mesague doanirã Jesu Judare ñgu arĩrare masibiribũ. 29 Yujurãyeri gũa õpa arĩ pepiribũ: “Juda gũa niyerure dibugũ ãhrimi. Eropigu bosenu gũa baburire asũdoregu obeoami Jesu Judare.

Mojomorocũrãre niyerure odoregu iiami Jesu,” arĩ pepiribũ gũa yujurãyeri.

30 Eropigu Juda iri panre ñeatuha wiria wami. Ñgu wiriarasubure ñami arĩbũ.

Mama doreriñere wereñumi Jesu ñgu buherãre

31 Ñgu wiriara pũhrũ guare õpa arĩmi Jesu:

—Dohpague tamerare yũhũ masũ Goãmu ñgu obeodigu yũ turagu arĩrĩre ñhmugũcumi Goãmu masare. Eropigu Goãmu ñgu turagu arĩrĩre ñhmugũca yũpũ. 32 Eropigu Goãmu turarire yũ ñhmucũ ñgu yũ turari sãre dohparagã ñhmu purumujuugũcumi. 33 Yũ porã, yũre peeque. Bajamenũrigã mũa mera arĩnigũca. Yũre amarãca mũa. Eropigu judio masare yũ arĩdiro dopa ta mũa sãre arãa. “Yũ waborore mũapũ wamasibea,” erãre yũ arĩdiro dopa ta mũa sãre werea.

34 Mama doreriñere mũare weregũra. Mũa mera majarãre mahique mũa. Mũare yũ mahidiro dopa ta mũa mera majarãre mahi umupeoque. 35 Eropirã mũa mera majarãre mũa mahicũ ñha gajirã yaharã mũa arĩcũ ñha masirãcoma, arĩmi Jesu.

“Jesure masibeeaa,” Pedro ïgu arïburire wereñumi Jesu

Mt 26.31-35; Mr 14.27-31; Lc 22.31-34

³⁶ ïgu eroparïcũ Simo Pedro Jesure serëpimi:

—Opũ, ïnohogue waguçuri mũhũ? arïmi Pedro. ïgu eroparïcũ Jesu yũhrimi:

—Yũ waboroguere dohpaguere yũ mera wamasibeeaa mũhũ. Dohpaguere wamasibiriqueregu ta pũhrũ yũ pohro wagũca, arïmi Jesu Pedrore.

³⁷ Pedro arïmi:

—Opũ, ïduhpigu dohpaguere mũ mera wamasibiribocuri yũhũ? Yũre erã wejëdiaquerecũ yũhũ mũre duhusome. Itamugũca, arïmi Pedro Jesure.

³⁸ —ÏMũ eropa arïgu diaye ta yũre itamuguçuri? Diaye mũre weregu ïiaa. “Jesure masibeeaa,” arïguca mũhũ gajirãre. Æhresubu eropa arïguca cãreña ïgu wereboro core, arïmi Jesu Pedrore.

Jesu Goãmũ pohrogue wari maha iro dopa ãhraa yũhũ, arï wereñumi

14 ¹ Pũhrũ Jesu guare õpa arï weremi:

—Ne bũjawere wũaro guñaricũbiricãque. Goãmũre “Diaye ta ïigu ãhrimi,” arï umupeoque. Eropirã yũ sãre eropa umupeoque. ² Yũ Pagũ ïgu áriroguere baja wiri ãhraa. Mũa áriborore amuyugu wagũra. Iri diaye ta ãhraa. Eropigu mũare irire werea. ³ Eropigu mũa áriborore amutuha, dujarigũra yũhũ. Eropigu yũ pohrogue mũa árimorãre aïgu arigũra yũhũ daja. ⁴ Eropirã yũ waburi mare masia mũa, arïmi Jesu guare ïgu buherãre.

⁵ —Opũ, mũ waborore masibeeaa guã. ÏEropirã dohpã ii mũ waburi mare masirãcuri guã? arï serëpimi Toma Jesure.

⁶ ïgu eropa arï serëpicũ Jesupũ yũhrimi:

—Goãmũ pohrogue wari maha iro dopa árigu tiiaa yũhũ. Eropigu diaye áririre weregu áricãgu tiiaa yũhũ. Eropigu umaroguere ojocariniguicũ ïigu árigu tiiaa yũhũ. Eropirã yũre umupeorã dihta yũ Pagũ pohrogue warãcoma. ⁷ Nere yũre masirã árirã, yũ Pagũ sãre masiboaya mũa. Dohpaguere ïgure ïhaa mũa. Eropirã ïgure masituhabu mũa, arïmi Jesu.

⁸ ïgu eroparïcũ Felipe õpa arïmi:

—Opũ, mari Pagure ïhmuque guare. Iripëta gahmea guã, arïmi ïgu.

⁹ ïgu eroparïcũ Jesu weremi:

—Felipe, ïyoari boje yũ mera áriqueregu ta, mũ masinibeari yũre? Yũre ïagu yũ Pagũ sãre ïatuhami. “Eropigu mari Pagure ïhmuque guare,” ïduhpigu eropa arïri mũhũ yũre? ¹⁰ Yũ Pagũ mera yujugu ta ãhraa yũhũ. Irire “Diaye áribeaa,” ïarïgu meje iiri mũhũ? Mũare weregu yũ gamero weregu ïibeeaa. Yũ Pagure werebasagu ïiaa. Eropigu ïgu yũ mera árigu ïgu turari mera ii ïhmumi. ¹¹ Yũhũ, yũ Pagũ mera yujugu ta ãhraa. Yũ eroparïcũ irire “Diaye ta ãhraa,” arï pepique mũa. Irire “Diaye ta áribeaa,” arïdiarã, Goãmũ turari mera deyoro moarire yũ ii ïhmurire ïaque. Eropa ïara pũhrũ yũ Pagũ mera yũ yujugu ta áririre “Diaye ta ãhraa,” arï pepique mũa. ¹² Diaye mũare arïgu ïiaa.

Yũre umupeogũ yũ iidiro dopa ta iigũcumĩ. Eropĩgu ãgũpũ yũ tauro iigũcumĩ. Yũ Pagũ pohrogue wabu iiaa dohpaguere. Eropĩgu yũre umupeogũ yũ tauro Goãmũ turari mera ii ãhmugũcumĩ. ¹³Eropĩgu yũre umupeorãre erã yũ wãĩ mera serẽropẽ ta iigũra. Eropa iigu yũ Pagũ ãgu turarire ii ãhmugũca. ¹⁴Yũre umupeorã mũa áricũ mũa serẽropẽ ta iigũra, arĩmi Jesu.

Espĩritu Santore mũare obeogũra, arĩ wereñumi Jesu

¹⁵Eropa arĩtuha gũare õpa arĩnemomi:

—Yũre mũa mahirã, yũ dorerire iipehorãca. ¹⁶Yũ Pagũre serẽgũra. Yũ eropa serẽcũ yũ Pagũpũ gajigũre mũare itamubure mũare obeogũcumĩ. Eropĩgu ãgu mũare itamubupũ ãmũri nũcu mũa mera árigũcumĩ. ¹⁷ãgu diaye majare weregũ Espĩritu Santo áhrimi. I yeba majarãpũ Espĩritu Santore masibeama. Eropirã ãgũre opamasibeama. ãgu ta mũa mera árigũcumĩ. Eropirã mũa ãgũre oparãca. Eropirã ãgũre masia mũa. ¹⁸Mũare cóãsome yũhũ. Mũa mera áribũ dujarigũca yũhũ daja. ¹⁹Merogã dũhyaa yũ waboro. Yũ wara pũhũ i yeba majarã yũre umupeobirĩnirã yũre dipaturi ãasome. Mũapũ yũre ãarãca. Yũ ojocarĩcũ mũa sã ãmũri nũcu Goãmũ mera ojocarĩrãca. ²⁰Irinũ yũ dujariburĩnũre yũhũ, yũ Pagũ mera yujugũ ta yũ áricũ masirãca mũa. Eropirã yũ mera mũa áricũ mũa mera yũ áricũ sãre masirãca mũa. ²¹Yũ dorerire iigu yũre mahĩgu ta áhrimi. Eropĩgu yũre mahĩgũre yũ Pagũpũ mahĩgũcumĩ. Eropĩgu yũ sã ãgũre mahĩgũca. Eropĩgu ãgũre yũre õaro masicũ iigũca, arĩmi Jesu gũare ãgu buherãre.

²²Gũa mera majagũ gajigũ Juda waĩcũgũ arĩmi Iscariote áribĩgũ. Õpa arĩmi ãgu Jesure.

—Opũ, ¿dohpa iigũcũri mũhũ gũare eropa arĩgu? ¿I yeba majarãre mũre masicũ iibĩgu dohpa iigũcũri mũhũ gũa dihtare mũre masicũ iigu? arĩ serẽpimi Juda.

²³ãgu eroparĩcũ Jesu yũhrimi:

—Yũre mahirã yũ dorerire õaro iima. Erã eropa iicũ yũ Pagũpũ erãre mahĩgũcumĩ. Eropirã erã mera árirã árirãca gũa. ²⁴Yũre mahĩbĩgũ yũ dorerire iibeami. Eropiro yũ wereri mũa peerapũ yũ werenĩguiri áribẽaa. Yũre obeodĩgu ya werenĩguirĩpũ áhrra. ãgu yũ Pagũ ta áhrimi.

²⁵Mũa mera árinĩgu ire mũare werenĩguigu iiaa. ²⁶Pũhũ yũ serẽcũ yũ Pagũ Espĩritu Santore obeogũcumĩ mũare. Eropĩgu Espĩritu Santopũ mũare itamubu árigũ, mũare buhepehogũcumĩ ãgu. Eropĩgu mũare yũ wererare guñacũ iigũcumĩ ãgu.

²⁷Mũare õaro áricũ iigũca yũhũ. Yũhũ õaro áridiro dopa ta õaro áricũ iigũca mũare. I yeba majarã erã iidiro dopa iisome yũhũ. Yũ tamera diaye õaro áricũ iigũca mũare. Bũjawere wũaro guñarĩcũbĩricãque mũa. Eropirã gũĩbĩricãque mũa. ²⁸“Yũhũ wagũca. Eropĩgu mũa mera áribũ dujarigũca daja,” mũare yũ eropa arĩ werecũ peetuhabũ mũa. Irĩre masirã árirã mucubĩriboaya mũa. Yũre mũa diaye mahĩnirã árirã mucubĩriboaya mũa. Yũ Pagũpũ yũ tauro turami. Eropirã ãgu pohrogue yũ waborore mũa masira pũhũ yũre mahirã mucubĩriboaya mũa. ²⁹Yũre mũa umupeoburire yũ waborore wereyũgu iiaa mũare.

³⁰“I yeba majarã opu watí doregu iimi dohpaguere. Eropigu ñgu eropa dorecũ yũhu mua mera wereniguituboro merogã dũhyaa. Ñgũpu yũre tarinũgamasibeami. ³¹Yũre yũ Pagũ ñgu dorero dopa ta iiaa yũhu. Eropa ta iiaa yũhu yũ Pagũre yũ mahirire i yeba majarã erã masiburire.

“Wahgãñũgajaque. Ina warã, arĩmi Jesu gũare ñgu buherãre.

Jesu iguiru iro dopa ãhraa, arĩ wereñumi

15 ¹Eropigu werenigui queori mera buhegu gũare õpa arĩmi Jesu: —Yũhu iguiru diaye majaru iro dopa árigũ ãhraa. Yũ Pagũpu iguirure ñhadibugũ iro dopa árigũ ãhrimi. ²Iguirure iri dũpũri gamesũriro dopa ta mua yaharã yũ mera ãhraa. Dũca mariri dũpũrire iguirure ñhadibugũ ñgu peha cõaro dopa ta yũ Pagũ ñgu gamerire iibirãre cohãmi. Dũcacuri dũpũrire iguirure ñhadibugũ ñgu amuro dopa ta yũ Pagũ ñgu gamerire iirãre itamugũcumi ñgu “Yũ gamerire iinemoporo,” arĩgu. ³Yũ wererire peerã, “Diaye ta ãhraa,” arãa mua. Eropigu yũ Pagũ mua ñeri iirare cõãtuhami. ⁴Yũre gamesũriro dopa ta yũ mera majarã árique mua. Eropigu mua mera árigũca. Iguiru dũpũri iguiru mera gamesũribiro áriro iri dũpũripũ dũca mara. Eropa ta yũ mera majarã õaro áribirã sã yũ Pagũ gamerire iimasibea mua.

⁵Iguirure iri dũpũri gamesũriro dopa ta mua yaharã yũ mera ãhraa. Iri dũpũri iguirure õaro gamesũriro áriro dũcacũ. Mua sã yũre õaro gamesũrirã yũ Pagũ gamerire iiaa. Yũre gamesũrirã áribirã ñgu gamerire iimasibea mua. ⁶Ñeri dũpũrire turira dũpũre ñgu cõaboro dopa ta yũ mera majarã áribirãre yũ Pagũ cõãgũcumi. Iri dũpũri ñaicũ ñha iguirure ñhadibugũ iri dũpũrire aĩ gameneo peamegue soecãgũcumi. Eropa ta iigũcumi Goãmũ yũ mera majarã áribirãre.

⁷“Yũ mera majarã árirã yũ buherire cãdijibiriboca mua. Eropa cãdijibirã mua gameropẽ ta yũre serẽque. Eropigu mua serẽropẽ ta ogura. ⁸Yũ Pagũ gamerire mua iirã áricũ ñarã, “Oã Jesu yarã ãhrima,” arĩ masirãcoma gajirã masa. Eropirã mũare ñarã yũ Pagũre umupeorãcoma. ⁹Yũ Pagũ ñgu yũre mahidiro dopa ta yũ sã mũare mahia. Eropirã yũ mahiri mera árique mua. ¹⁰Yũ Pagũ ñgu dorerire iiaa yũhu. Eropigu ñgu mahigu áriniguia yũhu. Eropa ta mua sã yũ dorerire iirã yũ mahirã áriniguicãrãca mua.

¹¹“Ire mũare wereabu yũ mera mua õaro mucubiriborore. Eropirã turaro mucubirirãca mua. ¹²Õpa dorea mũare: Mũare yũ mahidiro dopa ta mua mera majarãre mua sã mahique. ¹³Yũjugũ masũ ñgu mera majagũ yañe áriborañe sirigũ ñgu mera majagũre bũrigã mahiami gajirã mahidiro tauro. ¹⁴Eropirã yũ dorerire iirã yũ mera majarã ãhraa mua. ¹⁵Diaye ta mua yũ mera majarã gohra ãhraa. Mua eropa árirã áricũ áripehrerire yũ iirare werea mũare. Pohro majagũ ñgu opu iiburire masibeami ñgu. Eropigu “Yũ pohro majarã bu árirã ãhraa mua,” arĩbea mũare. Yũ Pagũ ñgu yũre wererare mũare werepehoabũ. Eropa weregu “Yũ mera majarã ãhraa mua,” mũare arãa dohpaguere. ¹⁶Mũarũ yũre beyebiribũ. Yũpũ mũare beyebũ yũ Pagũ gamerire mua iimorãre. Mua eropa iicũ mua eropa iiri ne yuju diaye gohra árisome. Mua eropa iicũ yũre

mua umupeocũ yu Pagu mua serēropē ta muare ogucumi. 17Ire muare dorea yuhũ: Mua basi game mahi umupeoque, arĩmi Jesu.

Jesure ĩgu yarā sãre i yeba majarā ĩhaturire wereñumi Jesu

18 Eropigu guare werenemomi daja:

—I yeba majarā muare erā ĩhaturicũ ĩarā ire guñaque mua: “Guare eropa ĩhaturiboro core Jesupure ĩhaturinugatuhama erā,” arĩ guñaque. 19I yeba majarā gohra mua áricũ, erā mera majarāre erā mahidiro dopa ta mua sãre mahiboañuma erā. I yeba majarā mera mua árinicũ muare beyebũ. Eropirā dohpaguere i yeba majarā gohra áribea mua. Mua eropa áribiricũ ĩarā i yeba majarā muare ĩhaturima. 20Mua yaharā árirā “Yu tauro áribea,” muare yu arĩrare guñaque mua. Eropa yu mera majarā árirā yu ñero tariboro dopa ta ñero tarirāca mua sã. Yure ñero iinirā ta mua sãre ñero iirācoma. Yu buherire yuhirinirā ta mua buheri sãre yuhrirācoma. 21I yeba majarā yure obeodigũre masibeama. Eropirā yure umupeorā mua áricũ ñero iirācoma erā muare.

22 “Erāre yu buhegu aribiricũ erā yure gamebirira dipuwaja mariboaya. Dohpaguere erāre yu buhera puhũ “Ñeri dipuwaja mara guare,” arĩmasibeama erā. 23 Yure ĩhaturigu yu Pagu sãre ĩhaturimi. 24 Goãmũ turari mera gajirā erā ne iibirirare ii ĩhmubũ. Eropiro erāre irire yu ii ĩhmubiricũ erā peebirira dipuwaja mariboaya. Goãmũ turari mera yu ii ĩhmurare erā ĩara puhũ yure yu Pagu sãre ĩhaturima erā. 25 Eropa ĩhaturirā Goãmũ yare erā gojarapũ matague ta erā arĩ gojadiro dopa ta iirā iima erā. Ōpa arĩ gojañuma: “Erāre yu ñero iibiriqerēcũ ta yure ĩhaturima erā,” arĩ gojañuma matague ta Goãmũ yare erā gojarapũgue, arĩmi Jesu.

26 Eropigu werenemomi daja:

—Yu puhũgue muare itamubu, yu Pagu mera árigu muare yu obeobu Espiritu Santo ta áhrimi. ĩgu diaye majare weregu ta áhrimi. Eropigu ĩgu arigu yu áricurire weregucumi muare. 27Muare yu buhenugacũgue mua sã yu mera umuri nũcu áribũ. Mua sã yu áricurire wererāca, arĩ weremi Jesu guare.

16 1 Eropa arĩtuha guare ōpa arĩ werenemomi: —Puhũ yu buherire yu sãre mua cóabiriburire ōpa weregura muare. 2Mari buheri wirigue mua ñajadiacũ ñajadoresome muare yaharā mua árirĩ dipuwaja. Eropirā muare gajisubu wejē “Goãmũ gamerire iirā iiaa,” arĩ pepirācoma gajirā. 3Yu Pagure, yu sãre erā masibeama. Eropa masibirā muare ñero iirācoma erā. 4Eropirā muare erā ñero erā iicũ ĩarā, “Erā ōpa iiboro core ta Jesu guare weremũhtayutuhami,” arĩ guñarāca mua. Mua eropa arĩ guñaburire dohpaguere ire weremũhtagu iiaa muare, arĩ weremi Jesu.

Espiritu Santo ĩgu iiburire wereñumi Jesu

Eropa arĩtuha ōpa arĩ werenemomi:

—Neguere mua mera árigu ire muare werebiribu. 5Dohpaguerũre yure obeodigu pohrogue wagũca. “¿Nohogue wagũcuri mũhũ?” arĩ ne uyugũ yure

serēpibea m̄a ȳre. ⁶Eropa serēpibiriquererā ta ȳn waborore m̄are werēcū m̄a ñero s̄iporāc̄na. ⁷M̄a ñero s̄iporāc̄nquerēcū m̄are ōpa diaye ta werea: Ȳn wara p̄hr̄u m̄are ōacāroca. Ȳn ūmarogue wabiricū m̄are itamubup̄ aribibocumi. Eropa waḡu eja m̄are ĩḡure obeoḡuca ȳh̄n. ⁸Ȳn eropa obeocū ĩḡu ariḡucumi. Eropa eraḡu i yeba majarāre ñerire iirā erā ár̄icū masicū iiḡucumi ĩḡu. Eropiḡu ōaro ár̄iricuburire buheḡucumi ĩḡu. Eropiḡu Goām̄u ĩḡu dipuwaja moaborore wereḡucumi masare itamubup̄. ⁹Ȳre umupeobirā āhr̄ima i yeba majarā. Eropiḡu itamubup̄ masa erā ñero iiric̄urire erāre masicū iiḡucumi. ¹⁰Ȳn Paḡu pohrogue waḡuca. Ȳn eropa wara p̄hr̄u masa ȳre ĩanisome. Eropiḡu itamubup̄ ariḡu ōaro ár̄iric̄ur̄i s̄āre buheḡucumi. ¹¹I yeba majarā op̄re wat̄ire Goām̄u dipuwaja moadoretuhami. Eropiḡu Goām̄u masare ĩḡu dipuwaja moaburi s̄āre wereḡucumi itamubup̄.

¹²“W̄uaro āhraa m̄are ȳn wereburi. Ȳn eropa werenemodiaquerecū ta ire ȳn werēcū dohparagā masisome m̄a. ¹³Ȳn eropa werenemobiricū Esp̄ritu Santop̄u irire werenemoḡu ariḡucumi. ĩḡu ĩḡu gamero m̄are weresome. Ȳn Paḡu ĩḡu weredorerare m̄are wereḡucumi. Eropiḡu m̄are diaye majare werepehoḡucumi. Eropiro p̄hr̄ugue waburire m̄are masicū iiḡucumi ĩḡu. ¹⁴Eropiḡu ĩḡu yare m̄are wereḡucumi. Eropa wereḡu ȳre umupeocū iiḡucumi m̄are. ¹⁵Ár̄ipehreri ȳn Paḡu ya s̄ā yaha āhraa. Eropiḡu “Esp̄ritu Santo yahare wereḡucumi,” arāb̄n m̄are, ar̄i weremi Jesu.

B̄jawererā ár̄iquererā ta p̄hr̄u mucubirirāca m̄a, ar̄i wereñumi Jesu

¹⁶Eropa ar̄it̄uha ōpa ar̄i werenemomi guare daja:

—Bajamen̄ri ȳre ĩasome m̄a. Eropirā p̄hr̄ugā ta daja m̄a ȳre ĩarāca, ar̄imi Jesu.

¹⁷ĩḡu eroparicū peerā, guap̄n bajamerāgā ōpa ar̄i wereniguib̄u gua basi:

—“Bajamen̄ri ȳre ĩasome m̄a. Eropirā p̄hr̄ugā ta daja m̄a ȳre ĩarāca,” ar̄iḡu ¿dohpa ar̄iḡu eropa ar̄ari marire? Eropiḡu “Ȳn Paḡu pohrogue waḡuca,” ¿dohpa ar̄ironore eropa ar̄ari ĩḡu? ¹⁸“Bajamen̄ri p̄hr̄u,” ar̄iḡu ¿dohpa ar̄iḡu eropa ar̄ari ĩḡu? ĩḡu wererare ōaro pee masibea mari, ar̄ib̄u gua basi.

¹⁹Gua eropa ar̄i wereniguicū Jesu ĩḡure gua serēpidiarire masiḡu guare ōpa ar̄i weremi:

—“Bajamen̄ri ȳre ĩasome m̄a. ¿Eropirā p̄hr̄ugā ta ȳre ĩarāca daja,” ȳn ar̄irare serēpidiari m̄a? ¿Irire ȳn ar̄irare masibeari m̄a? ²⁰Diaye m̄are ar̄iḡu iiaa: Ȳh̄n s̄iricū ĩarā m̄a orerāca. Eropirā bur̄igā b̄jawererāca. Ȳre umupeobirinirāp̄n mucubirirācoma. M̄ap̄n b̄jawerenirā ár̄iquererā p̄hr̄u mucubirirāca m̄a. ²¹Ōpa āhraa iri: Nomeo niji wahḡugo igo ñero tariburisub̄u āhraa. Eropigo igo turaro b̄jaweremo. Eropa b̄jawerequerego, igo maḡugā dehyoacū ĩago mucubirimo. Eropigo igore p̄ur̄irare guñabeamo igo pare. ²²Eropa ta m̄a dohpaguere b̄jawererāca. P̄hr̄u m̄a ȳre ĩarāca daja. Eropirā m̄a turaro mucubirirāca. M̄a eropa mucubiririre gajirā m̄are b̄jawerecū iimasisome.

²³“Irinu yure mua ĩarinure yure serēpisome mua. Yu Paguru mua serērire ogucumi. Diaye ta muare arĩgu iiaa. Yure mua umupeocũ ĩagu yu Pagure yu waĩ mera mua serērire ĩgu muare ogucumi. ²⁴Yu ōpa waboro core mua yure waĩpeo Goãmure serēnibiribu mua. Dohpaguere yure waĩpeo Goãmure serēque. Mua eropa serēcũ muare ĩgu ogucumi mua turaro mucubiriburire, arĩmi Jesu guare.

Ñeräre Jesu ĩgu tarinugarire wereñumi ĩgu buheräre

²⁵Eropa arĩtuha ōpa arĩnemomi:

—Werenigui queori mera muare weremurabu. Eropa werequeregu ta puhru muare werenigui queori mera weresome pare yuhu. Yu Pagurure mua ōaro peeboro dopa weregura muare. ²⁶Irinure mua ya arĩburire muare serēbasasome yuhu. Yure umupeorã yaha waĩ mera mua basi ĩgure serērãca. ²⁷Mua yure mahirã āhraa. Eropirã yu Pagu pohrogue yu aridigu arĩcũ “Diaye ta āhraa,” arãa mua. Eropa arĩrã mua arĩcũ ĩagu, yure mahirã mua arĩcũ ĩagu yu Pagu sã muare mahimi. ĩgu eropa mahicũ mua ĩgure serērãca. ²⁸Yu Pagu pohro arĩdigu arĩgu i yebaguere aribu yuhu. Eropigu dohpaguere i yebague arĩdigu arĩgu yu Pagu pohrogue dujaguca daja, arĩmi Jesu.

²⁹ĩgu eroparĩcũ gua ĩgu buherã ōpa arĩbu:

—Dohpague tamerare werenigui queori mariro wereniguigu ōaro diaye wereniguigu iiaa muhu guare. ³⁰Muhu ōaro masipehogu mu arĩcũ gua dohpague ta ōaro masia. Eropirã gajirã mure buhemasibeama. Eropirã irire gua dohpaguere ōaro masia. Gua irire ōaro masirã arĩrã Goãmũ pohrogue mu aridigu arĩcũ “Diaye ta āhraa,” arãa, arĩbu gua Jesure.

³¹Gua eroparĩcũ Jesu yuhrimi guare:

—Dohpaguere “Diaye ta āhraa,” ĩarĩri mua pare? ³²Puhrũnari mua ya wirigue wasirirã yure cóarãca mua. Mua eropa cóaquerecũ ta yu Paguru yu mera āhrimi. Eropigu yuhu yujugu ta arĩbeaa. ³³Ire muare wereyubu yure mua guñaturari mera mua ōaro arĩboro dopa. I yeba arĩrisubu Goãmure gamebirã pohrogue mua arĩcũ muare ñero iirãcoma erã. Erã eropa iiquerecũ ta guñaturaque mua. I yeba majarã erã ñero iirare tarinugagu āhraa yuhu. Eropirã yure guñatura mucubirique mua, arĩmi guare ĩgu buheräre.

Jesu ĩgu buherã ya arĩburire ĩgu Pagure Goãmure serēbasañumi

17 ¹Eropa arĩ weretuha Jesu umarogue ĩhamuju ōpa arĩ wereniguimi Goãmure ĩgu Pagure:

—Ahũ, dohpaguere mu werediro dopa ta yure erã ñero iiburisubu ejanijaro iiaa. Yure mu magure erã masare umupeocũ iique. Mu eropa iicũ masare mure umupeocũ iigura yu sã. ²Arĩpehrerã tauro opu aribu muhu yure. Eropigu mu yure oniräre mu mera eropa arĩniguicũ iiguca muhu. ³Mu dihta Goãmũ gohra āhraa. Yuhu Jesucristo mu obeodigu āhraa. Eropirã arĩpehrerã mure masirã, yu sãre masirã mari mera umaroguere eropa arĩniguicãrãcoma, arĩmi.

⁴Eropa arĩgu ta ōpa arĩnemomi Goãmure:

—I yebaguere m̄ iidorerare iipehoab̄ yuh̄. Erop̄a iiḡ masare m̄ turaḡ ářĩřire iħmuab̄ yuh̄. ⁵I yeba ářĩboro core m̄ mera ȳ ářĩc̄ ōaro turari opab̄. Eropiḡ dohpaguere m̄ ářĩroque irire ȳ ōaro turaḡ ářĩřire iħmuque.

⁶“I yeba ářĩřare ȳre m̄ onir̄are m̄re masic̄ iiab̄. M̄ onir̄a m̄ yar̄ áħřima. Eropiḡ er̄are ohab̄ m̄hu ȳre. Eropir̄a m̄ dorerire iiaa er̄a. ⁷⁻⁸Ȳre m̄ wererare er̄are buheab̄. Ȳ buhec̄ peer̄a ȳ buherire gahmeama er̄a. Eropir̄a diaye ta m̄ pohro aridiḡ ȳ ářĩc̄ masima er̄a. Eropir̄a m̄ obeodiḡ ȳ ářĩc̄ s̄are “Diaye ta áħraa,” ar̄ pepima er̄a.

⁹“Er̄a ya ářĩburi m̄re ser̄eḡu iiaa. Gajir̄a ya ářĩburip̄ure ser̄eḡu iibea yuh̄. Ȳre m̄ onir̄a m̄ yar̄ áħřima. Eropiḡ er̄a ya ářĩburire ser̄eḡu iiaa m̄re. ¹⁰Er̄a ářĩpehrer̄a m̄ yar̄ áħřima. Eropir̄a m̄ yar̄ap̄u yahar̄á áħřima. Ȳre umupeor̄a ȳ turaḡ ářĩřire iħmuma er̄a masare.

¹¹“Dohpaguere i yebaguere dujasome yuh̄. M̄ pohro wabu iiaa. Ȳ eropa waquerec̄u ta dohpaguere ȳre m̄ onir̄a i yebaguere dujama. Ah̄, m̄hu ōaḡu áħraa. Ȳre m̄ onir̄are m̄ turari mera iħadibuque. M̄ eropa dibuc̄u mari yujuḡu ta ářĩdiro dopa ta yuju curu ta ářĩr̄acoma er̄a s̄a. ¹²Er̄a mera ářĩḡu m̄ turari mera er̄are ōaro iħadibuab̄. Yujuḡu tamera peamegue waḡucumi m̄ yare er̄a gojarap̄u werediro dopa ta.

¹³“Dohpaguere m̄ pohroque wabu iiaa. Eropiḡu i yeba i ářĩpehrerire m̄ yar̄are werea ȳ mera er̄a ōaro mucubir̄borore. ¹⁴M̄ yare wereab̄ er̄are. Er̄a ȳ iro dopa ta i yeba ářĩwajamor̄á ářĩbeama. Eropir̄a i yeba majar̄ap̄u er̄are iħaturima. ¹⁵“I yeba ářĩřare, yahar̄are aiaque,” ar̄ibeaa. Erop̄a ar̄ibiriquereḡu er̄are ōaro iħadibuque wat̄i ĩerire iidoreri er̄ague ar̄iḡu. ¹⁶I yeba majaḡu ářĩbeaa. Er̄a s̄a ȳ iro dopa ta i yeba ářĩwajamor̄á ářĩbeama. ¹⁷Yahar̄are m̄ buheri mera ōar̄á ářĩc̄u iique er̄are. M̄ wererip̄u diaye ta áħraa. ¹⁸I yebaguere ȳre m̄ obeodiro dopa ta ȳp̄u yahar̄are m̄ yare buhedoreḡu obeoa. ¹⁹M̄ gamerire iibu ářĩḡu, s̄ĩribu ářĩḡu er̄a ya ářĩburire s̄ĩribu áħraa. Erop̄a s̄ĩribu áħraa yuh̄ yahar̄á s̄a m̄ gamerire diaye er̄a ōaro iiburire.

²⁰“Yahar̄are dohpague ářĩr̄a dihtare itamuque,” ar̄i ser̄ebeaa yuh̄. Yahar̄á gajir̄are er̄a buhera p̄ħr̄u gajir̄á s̄a ȳre umupeor̄acoma. “Er̄a s̄are itamuque,” ar̄aa yuh̄. ²¹Yahar̄á ářĩpehrer̄a er̄a yuju curu ářĩboro dopa itamuque. Yuh̄ m̄ mera yujuḡu ta áħraa. Mari yujuḡu ářĩdiro dopa ta er̄a mari mera yuju curu ta ářĩporo. Yujuro mera ta ářĩporo m̄ obeodiḡu ȳ ářĩřire ářĩpehrer̄a masa “Diaye ta áħraa,” er̄a ar̄iburire. ²²Ȳre m̄ ora turarire yahar̄are ohab̄. Iri turarire opar̄á yujuḡu ta mari ářĩdiro dopa ta er̄a s̄a yuju curu ta ářĩr̄acoma. ²³Yuh̄ er̄a mera áħraa. Eropiḡu m̄hu ȳ mera áħraa. Mari eropa ářĩr̄á ářĩc̄u mari yar̄á diaye ta ōaro yuju curu ta ářĩr̄acoma. Yuju curu er̄a ářĩc̄u ĩar̄a m̄ obeodiḡu ȳ ářĩřire i yeba majar̄á masir̄acoma. Eropir̄a ȳre m̄ mahidiro dopa ta yahar̄á s̄are m̄ mahirire masir̄acoma masa.

²⁴“Ah̄, i yeba ářĩboro core ȳre mahib̄ m̄hu. Erop̄a mahiḡu ȳ turaḡu ářĩřire iħmub̄ m̄hu. Eropiḡu ȳre m̄ onir̄a ȳ mera er̄a ářĩc̄u gahmea ȳ turaḡu ářĩřire er̄a masiboro dopa. ²⁵Ah̄, m̄hu ōaḡu áħraa.

I yeba majarã ñerã mure masibeama. Yurũ mure masia. Eropirã yũhũ mũ obeodigu áricũ masima yaharãpũ. ²⁶Mũre erãre masicũ iiabũ. Pũhrũ sãre mure erãre masicũ iigũca yũre mũ mahidiro dopa ta gajirãre erã mahiburire. Eropigu yaharã mera árigũca, arĩmi Jesu mari Pagure.

Jesure peresu iĩnuma

Mt 26.47-56; Mr 14.43-50; Lc 22.47-53

18 ¹Īgu eropa arĩra pũhrũ Jesu gũa sã ĩgu buherã Cedrón waĩcũriyare taribuja, Olivo waĩcũri gorogue ejabũ. ²Bajasuburi iri gorogue Jesu mera gũa gameneremũribũ. Eropigu Juda Jesure ĩhaturirãre wiabu iri gorore masĩmi. ³Eropa masigu pe curu surara mera aridi arĩmi ĩgu. Yuju curu surara gohra arĩma. Gaji curu surara Goãmũ wihire corerã arĩma. Pahia oparã, fariseo masa erã obeonirã arĩma surara. Eropa arirã sihãri dipurure, eropãricũ yucũ mojócumã erã. ⁴Iri gorogue gũa pohrogue erã erara pũhrũ Jesu ĩgu ñero tariborore masigu, erãre bocatĩri serẽpimi:

—¿Noare amarã iiri mũa? arĩmi Jesu.

⁵—Jesu Nazare majagũre ahmaa, arĩ yũhrima erã.

—Īgu ta ãhraa yũhũ, arĩmi Jesu.

Judapũ Jesure ñeadoregũ erã mera arĩmi. ⁶Eropirã Jesu “Īgu ta ãhraa yũhũ,” ĩgu arĩcũ erãpũ uca wa yebague dusirimaagã mehmereja wama.

⁷Erã eropa wacũ ĩagu dipaturi serẽpimi Jesu:

—¿Noare amarã iiri mũa? arĩmi.

—Jesu Nazare majagũre amarã iiaa gũa, arĩ yũhrima erã daja.

⁸—Īgu ta ãhraa, arĩrabũgũ yũhũ mũare. Eropirã yũre ñearã oãre yũ mera majarãre peresu iibiricãque, arĩmi Jesu.

⁹Eropa guare mahigũ ne yujugũre dederecũ iibirimi. Eropa iigu ero core Goãmũre ĩgu arĩdiro dopa ta iigu iimi ĩgu. “Yũre mũ onirãre ne yujugũre dedeobiribũ,” ĩgu arĩdiro dopa ta iigu iimi Jesu. ¹⁰Eropi Simo Pedro matamijire opagũ irimijire tuãwea aĩ, pahia opũ pohro majũre Malco waĩcũgũre ĩgu gamirore pacoro medijucãmi. Diayerũ maja gamirore pacoro medijucãmi ¹¹Īgu eropa pacorocũ ĩagu Jesu opa arĩmi:

—Mũ matamijire dibuque. Yũ Pagũ ĩgu yũre ñero taridorero dopa ta ñero tarigura, arĩmi Jesu Pedrore.

Pahia tauro opũ pohrogue Jesure aĩgãnuma erã

Mt 26.57-58; Mr 14.53-54; Lc 22.54

¹²Īgu eropa arĩtuhacũ ta surara, erã opũ mera, Goãmũ wihire corerã surara sã Jesure ñeha ĩgũre dirima. ¹³Dirituha Ana waĩcũgũ pohrogue aĩgãmũhtama erã. Anapũ Caifa mũñecũ arĩmi. Caifapũ iri bojorire pahia tauro opũ arĩmi. ¹⁴“Judio masa ya arĩburire yujugũ masũ sĩricũ õhaa,” arĩdigũ arĩmi ĩgu Caifapũ.

—Jesure masibea, arĩnumi Pedro

Mt 26.69-70; Mr 14.66-68; Lc 22.55-57

¹⁵Eropigu yũhu Simo Pedro mera Jesure yoañarirogue nũrsiabu. Yũru pahia opu ĩgu ĩha masigu árĩbu. Eropigu Jesu pũhrũ, opu árĩri wihi árĩri sãriro pohecague ñajaa wabu. ¹⁶Pedropu disiporo dujanũgajami. Eropigu maji wiriri disiporo coregore serẽbasabu Pedreore aĩ ñajabu. Yũ eropa serẽpiñacũ igo Pedreore ñajaridoremo. Igo ñajaridorera pũhrũ yũhu Pedreore aĩ ñajaa wabu. ¹⁷Yũ eropa aĩ ñajajacũ ĩago disiporo coregopu Pedreore serẽpimo:

—¿Jesu buherã mera majagu árĩbeari mũhu? arĩmo igo Pedreore.

—Árĩbeaa yũhu, arĩ yũhrimi Pedropu.

¹⁸Ero core ero majarã pohro majarã, surara mera erã sũhmaburi peamere dihunirã árĩma. Yũsaa árĩbu. Eropirã erã iri peame tũro sũhma niguima. Erã sũhmacũ ĩagu Pedro sã sũhmagu wami.

Pahia tauro opu Jesure serẽpi ĩañumi

Mt 26.59-66; Mr 14.55-64; Lc 22.66-71

¹⁹Eropi pahia tauro opu árĩgu Jesu ĩgu buherire, guã ĩgu buherã sãre serẽpi ĩaru Jesure. ²⁰ĩgu eropa arĩ serẽpicũ Jesupu yũhrĩpu ĩgure:

—Árĩpehrerãre buhegu erã core niguibu. Eropa buhegu mari buheri wiri Goãmu wihi sãre masa gamenererogue eropa buhe niguicãbu. Duhrinijagu ne buhebirabu yũhu. ²¹¿Duhpigũ yũre serẽpiri mũhu? Serẽpidiagu yũre peenirãre serẽpique. Yũ wererare erã masima, arĩ yũhrĩpu Jesu.

²²ĩgu eroparĩcũ surarapu ero niguidigu ĩgu mojoto mera Jesure paru.

—Eropa arĩbircãque pahia tauro opu, arĩpu surara Jesure.

²³ĩgu eroparĩcũ Jesu opa arĩpu:

—Ñero arĩ yũ wereniguirare wereque yũre. ¿Diaye majare yũ mũare werequerecũ duhpigu pari mũhu yũre? arĩpu Jesu surarare.

²⁴Pũhrũ Ana Jesure erã diridigũre Caifa pahia tauro opu pohrogue obeopu.

—Jesure masibea, dipaturi arĩnumi Pedro

Mt 26.71-75; Mr 14.69-72; Lc 22.58-62

²⁵Eropi Simo Pedro peame tũro sũhma niguigu iimi. Eropa ĩgu sũhma niguicũ ĩarã ero majarã ĩgure serẽpima.

—¿Mũ sã Jesu buherã mera majagu árĩbeari? arĩ serẽpima erã Pedreore.

—Árĩbeaa yũhu, arĩ yũhrimi Pedro.

²⁶Eropigu pahia tauro opu pohro majagupu Pedro ĩgu gamiro pacorodigu acaweregupu Pedreore serẽpimi:

—¿Jesure erã ñearasubu yũ arĩcũ mũ sã erã mera arĩsabu? arĩ serẽpimi ĩgu Pedreore.

²⁷—Yũhu ĩgu mera árĩbirabu, arĩ yũhrimi Pedro. ĩgu eroparĩcũ ta cãreña weregu carimi.

Jesure Pilato serēpiñumi

Mt 27.1-2, 11-14; Mr 15.1-5; Lc 23.1-5

²⁸Ñamiñarigā árícū Caifa ya wihigue árínirā Jesure aī wiria, iri maca majarā opu Pilato ya wihigue aīgā wama erā. Eropa waquererā igu ya wihiguere ñajabirima. Pascua árícū erā bamorā árírā ōpa arīma: “Judio masu áríbeamī Pilato. Eropirā mari i wihigue judio masu áríbigu áriri wihire ñajarā, mari dorerire tarinugaráca. Eropirā mari ñajacū iarā ñerā dopa íabocomā marire. Eropirā marire bosenu barire marire badorebiribocomā,” arīma. Eropa arírā opu ya wihire ñajabirima Jesure aīgānirāpu. ²⁹Erā ñajabiricū íagu Pilato erā pohroque wihi disiporogue wiriranugaja, erāre serēpimi:

—¿Ñehenore íre weresādiari mua? arī serēpimi Pilato erāre.

³⁰—Íhī ōagu igu árícū mure ígure obiriboaya. Negu āhrimi ígu, arī yuhrima erā.

³¹Erā eroparícū Pilato ōpa arīmi:

—Mua basi ígure aíaque. Eropirā mua ya doreri arīro dopa ta ígure dipuwaja moaque, arīmi Pilato erāre.

—Gua judio masapu masure wejēdoremasibea, arīma erā Pilatore. Eropa arírā Jesure wejēdoremorā iima.

³²Erā eropa wejēdorecū Jesupu crusague ígu sīriborore ero core ígu werediro dopa ta eropa wabu. ³³Erā eropa arīra puhru Pilatopu wihigue maji ñaja, Jesure sihubeo ígure serēpipu:

—¿Judio masa erā opu ta āhriri muhu? arī serēpipu.

³⁴Jesu yuhripu ígure.

—¿Mu guñaro yure eropa arī serēpiri muhu? ¿O gajirā mure erā wererare peenijagu yure serēpigū iiri muhu? arīpu Jesu Pilatore.

³⁵—Judio masu áríbeaa yuhu. Mu ya yeba majarā, pahia oparā sã, mure wiama yure. ¿Ñehenore ñero iiri muhu erā eropa mure dipuwaja moadiacū? arīpu Pilato.

³⁶—Yu opu áriri i yeba maja áríbeaa. Yuhu i yeba majarā opu árícū, yaharā yure itamuboñuma judio masare ñeadorebirā. Yu opu áriri i yeba maja áríbeaa, arīpu Jesu Pilatore.

³⁷—¿Eropigu opu āhrra arīri muhu eropa arīgu? arīpu Pilato.

—Mu arīro dopa ta opu ta āhrra. Masa opu árību masa dehyoabu yuhu. Eropigu i yebague arīgu erā opu árību arību. Diaye majare weregu arību. Áriphrerā diaye áririre peediarā yu wererire peema, arīpu Jesu.

³⁸—¿Ñeheno āhriri diaye áriri? arīpu Pilato.

Judio masa Jesure wejēdoreñuma

Mt 27.15-31; Mr 15.6-20; Lc 23.13-25

Eropa arítuha Pilato judio masa pohro maji dujaa wa erāre weremi:

—Īre ne gajino dipuwaja mara. ³⁹Bojori nūcū Pascuanū árícū yujugū peresu árīgure mūa wiudorea. ¿Eropigū ĩre Jesure ta mūa opū árībupure muare wiubasacuri yūhū? arīmi Pilato judio masare.

⁴⁰Īgū eroparícū peerā erā judio masa ōpa arī gaguiniguima:

—Īgure wiubiricāque. Barrabápure guare wiubasaque, arī gaguiniguima judio masa Pilatore. Barrabápu yajaricūgu árīdigū árīpu.

19 ¹Erā eropa arī gaguiniguira pūhrū Pilato Jesure tāradorepu. Eropirā ĩgū yarā surarapu ĩgure tārānorā. ²Tārātuha pora bero iituha, Jesure ĩgū dipuru weca duhpeñorā. Duhpeotuha, oparā ya suhrirore ĩgure sārānorā. ³Eropirā ĩgū pohro nūgaja ōpa arīnorā erā ōpa arī wereyarā:

—Ōaro árīporo. Judio masa opū ōaro árīporo, arī wereya erā mojotori mera ĩgure pañorā.

⁴Eropigū Pilato dipaturi waha, judio masare weremi:

—Peeque mūa. Īre ñeri dipuwaja mara. Eropigū irire mūa masiburire ĩgure mūa pohro aīgāribu iiaa, arīmi Pilato.

⁵Īgū eropa arīra pūhrū Jesu pora berore peyadigū, oparā ya suhrironore sañadigū wihigue árīdigū wiririmi. Īgū wiriricū Pilato ōpa arīmi:

—Īaque. Ihī ta āhrimi ĩgū, arīmi Pilato.

⁶Īgū eropa arītuhacū peerā pahia oparā, surara Goāmū wihi ĩhadibu corerā sā Jesure ĩarā gaguiniguima:

—Crusague wejēque ĩgure. Crusague pabia wejēque ĩgure, arī gaguiniguima erā.

—Īgure ne ñeri dipuwaja mara. Eropirā mūa basi ta ĩgure aīgāque. Eropirā mūa basi ta ĩgure crusague pabia wejēque, arīmi Pilato erāre.

⁷—Īgū, ĩgū basi “Goāmū magū āhrra,” arīmūrami. Īgū eropa arīra waja gua doreripu ĩgure wejēdorea, arīma erā Pilatore.

⁸Erā eroparícū peegu ũcataria Pilatorū. ⁹Eropigū dipaturi ĩgū wihigue Jesure aī majiñajagu Jesure serēpipū daja:

—¿Nohogue majagu āhriri mūhū? arīpu Pilato Jesure.

Īgū eropa arī serēpiquerecū ta Jesu ĩgure ne yūhribiripū:

¹⁰Īgū yūhribiricū ĩagu Pilato ĩgure serēpinemopū:

—¿Yūre yūhribeari mūhū? Yūhū mūre peresu árīgure wiumasia.

Eropigū mūre crusague pabia wejēdoremasia yūhū. ¿Īrire masibeari mūhū? arīpu Pilato Jesure.

¹¹Īgū eroparícū Jesu yūhripū daja:

—Goāmū mūre dorebiricū ne iimasibiriboaya mūhū. Eropigū yūre ĩhaturirāre wiadigūpu mū tauro ñero dipuwajacūgūcumi, arīpu Jesu Pilatore.

¹²Īgū eroparícū peegu Pilatorū ĩgure wiudiaripū. Īgū eropa wiudiaquerecū ta dipaturi judio masapu gaguiniguima:

—Jesu “Opū āhrra,” arīgu mari tauro opū árīgure Roma majagure ĩhaturigū iimi ĩgū. Eropigū ĩgure wiugu mū sā mari tauro opū árīgure ĩhaturigū āhrra, arī gaguiniguima judio masa Pilatore.

¹³ Erã eroparĩcũ peegu Jesure wihigue árĩgure aĩ wiriri, ĩgu dipuwaja moadoregu ĩgu doari pẽro doajami Pilatorũ. ĩgu dipuwaja moadorero judio masa ya mera gabata waĩcuro empedrado waĩcubũ. ¹⁴ Irinũ Pascuanũ bosenu árĩcũ gũa baburi gũa amurinũ árĩbũ. Irisubu goeri boje core árĩbũ. Doajatuha Pilato masare õpa arĩ weremi:

—Ihĩ ta àhrimi mua opu, arĩmi ĩgu.

¹⁵ ĩgu eroparĩcũ peerã judio masa gaguĩnguima daja:

—Sĩriporo ĩgu. Sĩriporo ĩgu. Crusague pabia wejẽque ĩgure, arĩ gaguĩnguima erã.

—¿Mua opu árĩquerecũ ta ĩgure crusague pabia wejẽdiari mua? arĩmi Pilato erãre.

Ĩgu eroparĩcũ õpa arĩ yũhrima pahia oparã:

—Mari árĩpehrerã tauro opu Roma majagu àhrimi. Gajigu opu marimi marire, arĩ yũhrima pahia oparã.

¹⁶ Erã eropa arĩ wereniguira pũhrũ Pilato Jesure crusague pabia wejẽdoregu wiame erãre pare.

Jesure pabia wejẽñuma erã

Mt 27.32-44; Mr 15.21-32; Lc 23.26-43

Eropirã surara Jesure aĩ wiriama. ¹⁷ Erã aĩ wiriacũ Jesupũ crusare ĩgu basi aĩ coã, dipu pero waĩcurogue ejami. Gũa judio masa ya mera Gólgota waĩcubũ. ¹⁸ Eroque eja erã Jesure crusague pabiama. Eropirã gajirã perã sãre yujugu ĩgu diayerũ, gajigure ĩgu opu pabiama erã. Eropigu Jesu erã deco árĩmi. ¹⁹ Pilato taboamijire goja, crusague Jesu weca pabia tuodorepu ĩgu gojaramijire. Õpa arĩ gojara árĩbũ: “Ihĩ Jesu Nazare majagu, judio masa tauro opu àhrimi,” arĩ gojara árĩbũ irimijire. ²⁰ Irimijire gojagu judio masa ya mera, Roma majarã ya mera, Griego ya mera gojara árĩbũ. Eropiro Jesure crusague erã pabianugudiro maca pohrogã árĩbũ. Eropirã bajarã judio masa Pilato ĩgu gojarare ĩha buhema. ²¹ Eropirã pahia oparã iri buhetuhaja õpa arĩrã wañorã Pilatore:

—“Ihĩ judio masa opu àhrimi,” arĩ gojabita. Gũa opu árĩbeami ĩgu.

Eropigu õpa arĩ goja amuque mũhũ. Ihĩ “Judio masa opu àhraa,” arĩ yujugu ta ĩgu basi ta eropa arĩ pepigu àhrimi, arĩ goja amuque, arĩñorã pahia oparã.

²² Pilatorũ yũhripu erãre:

—Yũ gojarare ne yũ goja amosome, arĩpu Pilato erãre.

²³ Jesure erã pabiara pũhrũ wapicurã surarapu Jesu suhri mũrare erã basi game gueremorã iima. Erã eropa guerediaquerecũ ta ĩgu suhriro yoari suhriro dohori mariri suhriro árĩbũ. Iri suhriro suara suhriro árĩbũ.

²⁴ Iri suhriro eropa árĩcũ ĩarã õpa arĩma erã basi:

—Iñe suhrirore yeguesiribircãrã. Yujugu dihta aĩporo. Eropirã iñe suhriro aĩbure masimorã deabirarã mari, arĩma erã basi.

Eropa deabirarã Goãmu yare erã gojarapũ erã gojadiro dopa ta eropa iirã iima erã. “Yũ suhrirore erã basi guerema. Eropirã yaha suhrirore

aĩbure masidiarã deabirama erã,” arĩ gojañuma Goãmũ yare erã gojarapũgue. Erã gojadiro dopa ta eropa iima erã.

²⁵Jesu pago, Jesu buamo María Cleofa marapo, María Magdalena mera Jesu crusa pohrogã ĩha niguima. ²⁶Eropigũ ĩgu pago, yũhũ ĩgu mahigũ sã ĩgu pohrogã gua niguicũ ĩagu ĩgu pagore yũre weremi:

—Dohpaguere ihĩ mũ magũ árĩbu àhrimi, arĩmi Jesu ĩgu pagore.

²⁷Eropa arĩtuha yũre õpa arĩ weremi ĩgu:

—Dohpaguere igo mũ pago árĩbo àhrimo, arĩmi Jesu yũre.

Ĩgu eropa arĩra pũhrũ Jesu pagore yaha wihigũ aĩ opamũribũ.

Jesu sĩria wañumi

Mt 27.45-56; Mr 15.33-41; Lc 23.44-49

²⁸Ĩgu eropa arĩ werera pũhrũ árĩpehreri Goãmũ ĩgure mohmedoregũ ĩgu apirare iipehogũ árĩgũ masipũ Jesu. Eropa masigũ Goãmũ yare erã gojarapũ iribojegue erã arĩ weryudiro dopa ta õpa arĩmi Jesu:

—Ñemesibuca yũre, arĩmi Jesu.

²⁹Ero vino sũiri deco dicũri sorobu ero doabũ. Eropirã ero árĩrã Jesu eroparĩcũ pee mimi aĩri yũsũre deco mera erã yosora yũsũre yucũgũ hisopo waĩcũdigũ ojogoro dirituma. Eropirã aĩ muju Jesu disiro sítuma.

³⁰Iri decore Jesu mimituha õpa arĩmi:

—Iripẽta árĩca, arĩgũ ta ĩgu dipũrũre muhmũsiudija sĩria wami.

Yujugũ surara Jesu patore gubuye gohra ñoseñumi ñoserimiji mera

³¹Irinũ Pascua bosenu core árĩbũ. Iri bosenu gua baburire gua amurinũ árĩbũ. Eropirã gajinũ Sabado árĩcũ iri õari bosenu árĩcũ crusarigue sĩrinirãre judio masa apidiabirima. Irinũ ta bosenu gua judio masa bosenu wũari bosenu árĩro iibũ. Eropirã erã sĩrinirã mũra irinũ crusarigue árĩcũ gamebirima. Eropirã pabianirã mũrare erã ñigagũ gõarire panuadorerã judio masa serẽñorã Pilatore erãre sĩri purumujudorerã. Erã eropa iira pũhrũ erã dũpũ mũrare aĩdijumorã iima. ³²Erã eropa dorecũ surarapũ crusari pohroge eja, yajaricũgũre copũ árĩgũ ñigagũre panuama: Gajipũ árĩgũ sãre eropa ta iima erã. ³³Eropa iiquererã Jesu ñigagũre panuabonirã ĩgu pohro eja ĩgu sĩridigũ árĩcũ ĩha panuabirima.

³⁴Eropa panuabirã yujugũ surara ĩgu patore gohra gubuye ĩgure ñosemi. ĩgu eropa ñosecũ mata ĩgu di, deco mera wiribũ. ³⁵Ĩgu eropa wacũ ĩabũ yũhũ. Yũhũ ipũre gojagũ diaye mũare werea. Diaye yũ wereri árĩcũ masia yũhũ. Mũare irire werea mũa sã Jesure mũa umupeoburire. ³⁶Goãmũ yare erã gojarapũ werediro dopa ta eropa wabũ. “Ĩgu gõare ne yuju gõare panuabirima,” erã arĩ gojadiro dopa ta Jesu ñigagũ gõare ne yuju gõa panuabirima. ³⁷Eropiro gajipũ sã Goãmũ yare erã õpa arĩ gojayudiro dopa ta wabũ: “Ĩgure erã ñosedigũ mũrũre ĩarãcoma erã,” erã arĩ gojadiro dopa ta gua Jesure erã ñosedigũ mũrũre ĩabũ.

Jesu dɔpɔre masa gobegue yaañuma
Mt 27.57-61; Mr 15.42-47; Lc 23.50-56

³⁸ Ìgu sīrira pũhrũ José Arimatea majagu Jesu dɔpũ mɔrarore aĩ dijubu Pilatore serẽgu ejapu. Josẽpu gajirã judio masare giũgu, Jesure umupeogu ìgu áririre werebiridigu árimi. Eropigu ìgu dɔpũ mɔrarore ìgu serẽra pũhrũ Pilatorũ ìgu dɔpɔre aĩdorepu. Ìgu aĩdorecũ José crusa pohro eraa Jesu dɔpũ mɔrarore aĩgã wami. ³⁹ Nicodemo sã ìgu poresurire mohmorere treinta kilo nũcũrre aĩgãrimi Jesu dɔpũ ìgu amuburire. Yucũgu di pohga, mirra waĩcũri poresuri, yucũgu pohga mera áryoro ìgu mohmorera. Ìgu Jesu mera ñami weretamudigu árimi. ⁴⁰ Eropirã erã perã Jesu dɔpũ mɔrarore aĩma. Judio masa sīrinirãre yaaro dopa ta ìgu dɔpũ mɔrarore poresuri sũra pũhrũ suhri gasiri mera omama. ⁴¹ Crusague Jesure erã pabia wejẽdiro pohro pohe áribũ. Iri pohegue masa gobe ñtãyegue erã seara gobe áribũ. Iri gobere ne yujugu sīridigũre cõañibirima dohpa. ⁴² Pascuanũ bosenũ maja gũa judio masa baburire amurinũ áribũ. Eropirã iri gobe pohrogã crusa áricũ ero apima erã Jesu dɔpũ mɔrarore.

Jesu masa mɔriañumi
Mt 28.1-10; Mr 16.1-8; Lc 24.1-12

20 ¹ Domingo ñamiñarigã áricũ, boyoboro coregã María Magdalena Jesu masa gobegue ejapo. Erogu ejago iri gobere erã biharayere gajipu tunuguraye áricũ ìapo igo. ² Eropa ìadigo áriigo gũa pohrogue omagãrimo igo. Simo Pedro mera perã áribũ gũa. Eraa õpa arĩ weremo gũare igo.

—Mari Opũ dɔpũ mɔrarore aĩcãnrã ãhrama. Eropirã ìgure erã apidirore mari masibea, arĩmo igo gũare.

³ Igo eroparicũ peerã, yũhũ Pedro mera gũa perã masa gobegue ìarã wabũ gũa. ⁴ Eropa ìarã warã gũa perã omagãabũ. Eropa omarã, yũhũ Pedore omatarigãgu masa gobegue ejamuhtabũ. ⁵ Erogu ejagu muhmunereja ìha acubũ iri gobere. Eropa ìha acugũ ìgure erã omara gasiro seyarore ìabũ. Eropigu iri gobere ñajabiribũ. ⁶ Yũ eropa ìara pũhrũgue Simo Pedro sã erami. Eraa masa gobegue ñajaa, ìgu dɔpũ mɔrarore erã omara suhri gasirire ìami ìgu. ⁷ Eropigu Jesu dipurure erã omara gasiro sãre ìami daja. Iri gasiro boje oyaro, yeguera gasiro áribũ. ⁸ Eropigu yũ sã masa gobegue ñajabũ. Jesu ìgu maricũ ìagu “Diaye ta Jesu masa mɔriañumi,” arĩ pepibũ yũhũ. ⁹ Iri gobegue gũa waboro core Goãmu yare erã gojarapũ Cristo sīriburire erã wererare õaro gũa masinibiribũ. Dohpaguepũre iri gobere yũ ìara pũhrũ, “Diaye ta Jesu masa mɔriañumi,” arĩ pepibũ yũhũ. ¹⁰ Eropa ìatuhajarã gũa wihigue dujaa wabũ.

Jesu María Magdalenare dehyoñumi
Mr 16.9-11

¹¹ Eropi masa gobe disiporo María niguigo ore niguipo. Eropa orequerego ta muhmunereja igo ìhame acupo masa gobere. ¹² Eropa

ĩhame acugo perã anyuare boreri suhricurãre Jesu ĩgu oyadiro murarogue erã doacũ ĩapo igo. Yujugu ĩgu dipuru oyadiro doapũ. Gajigu ĩgu guburi oyadiro doapũ. ¹³Erãre igo ĩacũ erãpũ igore serẽpiñorã:

—Nomeo, ¿dohpa árironore orego iiri mũhũ? arĩñorã erã.

—Yũ Opũ dũpũ murarore aĩcãñirã àhrama. Eropigo erã apidirore masibea yũhũ, arĩpo igo.

¹⁴Eropa arĩtuha, majinũgaja nijago Jesure ero niguigũre ĩapo igo. Eropa ĩaquerego ta Jesure ĩha masibiripo igo.

¹⁵—Nomeo, ¿dohpa árirono orego iiri mũhũ? ¿Noare amago iiri mũhũ? arĩpũ Jesu igore.

“Ihĩ i pohere ĩhadibugu àhrimi,” arĩ pepiripo igo Jesure. Eropa arĩ pepigo òpa arĩpo igo:

—Mũhũ ĩgu dũpũ murarore aĩdigũ árĩgu wereque mũ apidirore yũre.

Mũ werera pũhrũ aĩgora ĩgu dũpũ murarore, arĩpo igo ĩgure.

¹⁶Igo eropa arĩra pũhrũ Jesu òpa arĩpũ:

—María, arĩpũ.

Ĩgu eropa piyucũ peego, majiñabeo igo Hebreo ya mera òpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegu,” arĩma.

¹⁷Jesu arĩpũ:

—Yũ Pagũ pohrogue mũrianibea dohpa yũhũ. Yũ eropa mũrianibiricũ yũre mohpiñabiricãque. Eropigo gajirã yaharã pohrogue waque. Erã pohrogue ejago òpa arĩ wereque: “Jesu òpa arĩdoremi mũare: ‘Yũ Pagũ pohrogue wabu ĩaa. Mũa Pagũ sã àhrimi ĩgu. Goãmũ pohrogue wabu ĩaa. Mũa yagũ Goãmũ sã àhrimi ĩgu,’ arãmi Jesu,” arĩ wereque erãre, arĩpũ Jesu Marĩare.

¹⁸Ĩgu eropa arĩra pũhrũ Marĩa Magdalena guare Jesu buherã pohrogue eraa weremo guare:

—Mari Opũre ĩabu yũhũ, arĩ Jesu igore guare weredorerare weremo igo.

Jesu ĩgu buherãre dehyoañumi

Mt 28.16-20; Mr 16.14-18; Lc 24.36-49

¹⁹Irinũ soorinũ ñamicague gũa Jesu buherã gũa acawererãre judio masare güirã, gũa ya wihigue biha ñaja doabũ gũa. Gũa eropa doacũ Jesu gũa watope dehyoanũgaja òpa arĩmi:

—¿Àhriri mũa? arĩmi.

²⁰Eropa arĩtuha ĩgu mojotorire, ĩgu patore sãre guare ĩhmũmi. Eropirã gũa ĩgure gũa opũre masa mũriadigũre ĩarã mucubiribũ. ²¹Dipaturi Jesu guare òpa arĩmi daja:

—Õaro árĩque mũa. Yũ Pagũ ĩgu yũre obeodiro dopa ta yũ sã mũare obeoa, arĩmi guare.

²²Eropa arĩtuhaja guare ĩgu purisãmi. Eropa purisãgu Espĩritu Santore gũa ñeaburire ĩhmugũ iimi. ĩhmutuhaja òpa arĩmi:

—Dohpaguere Espiritu Santore ñeaque m̄ua m̄ua mera árĩbure. ²³Masa erã ñeri dipuwajare bujawerecũ iarã, “M̄ua ñero iirare cohãa,” arĩmasia m̄ua erãre. Erã bujawerebiricũ iarã, “M̄ua ñeri iirare cóabiribu,” arĩmasia m̄ua, arĩmi Jesu guare ĩgu buherãre.

Jesure masa muriadigure Toma ĩañumi

²⁴Jesu ḡua watope ĩgu dehyoacũ Toma s̄uhruadigu erã arĩgu ḡua mera marimi irisubure. ²⁵Īgu eropa maricũ ḡua ĩgu mera majarã ĩgure werebu.

—Mari Opure ḡua ĩabu, arĩ wereribu ḡua ĩgure.

Ḡua eropa arĩ werequerecũ ta õpa arĩmi Toma:

—Īgu mojotorire erã pabiara goberire ĩabigu iri goberire yu mujusĩru mera puñabigu “Diaye ta masa m̄uriañumi,” ne arĩsome. Eropigu ĩgu patore gubuye árĩri gobere yu mojoto mera s̄i acubigu, “Diaye ta masa m̄uriañumi,” ne arĩsome yuhũ ĩgure, arĩmi Toma.

²⁶Yuju semana p̄uhrũ ḡua ĩgu buherã ḡua ya wihigue árĩbu. Irisubure Toma ḡua mera arĩmi. Iri wihi bihara wihi árĩbu. Bihara wihi árĩquerecũ ta Jesu ñaja, ḡua watope dehyoanugaja õpa arĩmi:

—¿Áhriri m̄ua? arĩmi.

²⁷Eropa arĩtuha ĩgu Tomare weremi:

—Īaque yu mojotorire. Eropi m̄u mujusĩru mera yu mojotorire erã pabiara goberire puñaque. Eropigu m̄u mojoto mera yu patore gubuye árĩri gobere s̄i acuñaque. “Diaye árĩbeaa,” arĩbiricãque. “Diaye ta áhrraa,” arĩque m̄uhũ, arĩmi Jesu Tomare.

²⁸Īgu eropa arĩra p̄uhrũ Toma yuhrimi:

—M̄uhũ yu Op̄u áhrraa. M̄uhũ yahagu Goãmu áhrraa, arĩmi Toma Jesure pare.

²⁹—Yure m̄u ĩara p̄uhrũ yure “Diaye ta áhrraa,” arãa. Gajirãpu yure ĩabiriquererã ta “Diaye ta áhrraa,” arĩ umupeorãcoma. Eropirã erã turaro mucubirirã árĩrãcoma, arĩmi Jesu Tomare.

Jesure masa erã masiburire ipure gojañumi Ñu

³⁰Eropigu baja gaji sãre Goãmu ĩgu turari mera ii ĩhmũmi Jesu ḡua mera arĩgu. Irire ĩgu iirare ipure gojapehobirabu yuhũ. ³¹Eropa gojapehobiriqueregu ta ipũ yu wererare gojagu, “Jesu ta Cristo Goãmu ĩgu obeodigu áhrimi. ĩgu diaye ta Goãmu magu áhrimi,” m̄ua arĩ masiburire gojabu. Eropirã m̄ua ĩgure umupeorã Goãmu mera m̄ua eropa árĩnguiburire gojabu ipure.

Jesu siete ĩgu buherãre dehyoañumi

21 ¹P̄uhrũ Tiberia waĩcũri ditaru tũro dipaturi guare ĩgu buherãre dehyoami daja. Guare dehyoagu õpa iimi ĩgu daja. ²Simo Pedro, Toma s̄uhruadigu erã arĩgu, Natanae Galilea yeba árĩri maca Caná waĩcũri maca majagu, ḡua perã Zebedeo porã, gajirã sã perã ḡua oã nucũ gamenere árĩbu.

³Ḡua eropa gamenerera p̄uhrũ Simo Pedro õpa arĩmi:

—Wai wejēgu wagu iiaa, arīmi ĩgu.

—Gua sã mũ mera warãra, arĩbu gua ĩgure.

Eropa arĩtuha buha wabu. Eropirã dohodiru mera wabu. Iri ñamire gua òaro boyotahmuquererã ne yujung waimũre wejēbiricarabu.

⁴Boyodiji merejacũ Jesu imiporo ĩgu niguicũ iarĩbu gua. Eropa ĩaquererã ĩgure ĩha masibiricarabu gua. ⁵Eropigu guare òpa arĩ serēpimi:

—Ne, ¿wai wejēari mua? arĩmi Jesu.

—Ne wejēbirabu, arĩ yũhribu gua.

⁶—Dohodiru diayeru wejēdire mehyuque. Iripu mehyurã wai wejērãca, arĩbeo niguimi guare. ĩgu eroparĩcũ peerã ĩgu arĩdiro dopa ta mehyubu. Gua mehyura pũhru bajarã wai ñajama. Bajarã wai ñajacũ iarã wejēdigure dohodirugue aĩsã turabiricarabu gua. ⁷Eropigu yũhu Jesu ĩgu mahigu Pedrore werebu:

—Mari Opũ àhrimi sihĩ imiporo niguigu, arĩbu Pedrore.

Yũ eroparĩcũ Jesu ĩgu árĩcũ masigu, Simo Pedro ĩgu suhrirore sañami.

Wai wejēbu ĩgu suhrirore tuweadigu arĩmi. ĩgu suhrirore sañatuha diague yuriñajami. ⁸Eropirã gajirã gua buherã dohodirugue árĩbu. Cien metro yoaro diaguere payabu gua. Eropirã wejēdigure wai bajarã ñajadigure dohodiru mera taramajaabu gua. ⁹Tãroque tuhajarã pea niti dihta gose oyari peame weca waire ĩgu mupunugupidigure ĩabu gua. Panru sãre ĩabu gua.

¹⁰Gua eropa ĩacũ Jesu guare òpa arĩmi:

—Dohparagã mua wejēnirãre bajamerãgã aĩgãrique, arĩmi guare.

¹¹ĩgu eroparĩcũ Simo Pedro Jesu mera árĩgu ĩgu sã dohodirugue ñaja, wejēdire tara majaami imiporogue. Pagarã wai ñajanirã ciento cincuenta y tres wai árĩma. Bajarã wai ñajaquererã wejēdire ne yehguebirima.

¹²—Banirã arique, arĩmi Jesu guare.

—¿Noano àhriri mũhu? arĩ serēpiñabiribu gua ĩgure. Gua Opũ ĩgu árĩcũ masibu gua. ¹³Eropigu Jesu peame pohroque eja, panre aĩ guare gueremi. Wai sãre gueremi.

¹⁴Eropigu Jesu ĩgu masa mũriara pũhru imiporo dehyoagu uñresubu guare ĩgu buherãre dehyoagu iimi.

Jesu Simo Pedro mera weretamuñumi

¹⁵Gua bara pũhru Jesu Simo Pedrore serēpimi:

—Simo, Jona magu, ¿oãre mũ mahiro tauro yũre mahiri mũhu? arĩmi Simo Pedrore.

—Opũ, mũre mahia yũhu. Mũre yũ mahirire masia mũhu, arĩ yũhrimi Simo Pedro.

Jesu arĩmi:

—Eropigu ovejagãre mari ejodiro dopa ta yaharãre buheque mũhu, arĩmi Jesu.

¹⁶Eropa arĩtuha dipaturi ĩgu Simo Pedrore serēpimi daja:

—Simo, Jona magu, ¿yũre mahiri mũhu? arĩmi Jesu.

—Opɸ, mure mahia yuɦu. Mure yu mahicũ masia mũɦu, arĩ yuɦrimi Simo Pedro.

Jesu arĩmi daja:

—Ovejare iɦadibugu ovejare iɦu ɔaro iɦadiburo dopa ta yaharãre ɔaro iɦadibuque, arĩmi Jesu Pedore.

¹⁷Eropa arĩtuha dipaturi Simo Pedore serẽpimi:

—Simo, Jona magu, ¿diaye ta yure mahiri mũɦu? arĩmi Jesu daja.

Ʋhresubu iɦu eropa serẽpicũ peegu Simo Pedro turaro bujaweremi.

—Opɸ, mũɦu masipehoa. Mure yu mahicũ masia mũɦu, arĩmi Simo Pedro.

—Ovejare mari ejodiro dopa ta yaharãre buheque mũɦu. ¹⁸Diaye mure arĩgu iiaa. Mũɦu mamũ arĩgu mũ suhrire saňa, mũ gamerogue curimuribũ mũɦu. Eropa arĩdi arĩqueregu ta puɦru mũɦu buɦu arĩcũ, mũ mojotorire sĩbeocũ gajigu mure mũ suhrire sãgucumi. Eropigu mũ wadiabirogue mure aĩgãgucumi, arĩmi Jesu Simo Pedore.

¹⁹Eropa arĩgu Simo Pedro doɦpa wa iɦu sĩrĩborore wereyugu iimi. Eropigu Simo Pedro sĩrĩgu Goãmure, “Ōagu, turagu aɦraa,” masa erã arĩcũ iɦu iĩborore wereyugu iimi. Eropigu Pedro mera weretamutuhagu ɔpa arĩmi Jesu iɦure:

—Diaye ta yu buhediro dopa iique mũɦu, arĩmi Jesu Pedore.

Jesu iɦu mahigu ipũre gojadigu arĩmi

²⁰Iɦu eroparĩcũ Pedropu yure Jesu iɦu mahigure erãre yu nũrusiacũ iami iɦu. Yuɦu iɦu iagupũ ero core Jesu pohrogã badoagu iɦure ɔpa arĩdigu arĩbu. “Opɸ, ¿mure iɦaturĩrãre wiabupu nihino arĩcuri iɦu?” arĩ Jesure serẽpidi arĩbu yuɦu. Eropa yure iagu Pedro serẽpimi Jesure:

²¹—Opɸ, ¿ihĩ Ńupu doɦpa wagucuri? arĩ serẽpimi:

²²—Ire mure werebeaa. I yebaguere yu dujariboro core iɦure arĩniguicũ yu iicũ irire masibea mũɦu. Eropigu iɦu waborore guňabita mũɦu. Diaye ta yu buhediro dopa iique mupũ, arĩmi Jesu Pedore.

²³Irire iɦu yure Ńure wererare peerã arĩpehrerã Jesu yarã weresiririma. Irire weresirirã ɔpa arĩrima erã: “Jesu iɦu mahigu buhegu sĩrisome,” arĩ weresiririma yure Jesu yarã erã basi. Erã eropa arĩquerecũ ta “Iɦu sĩrisome,” arĩgu iĩbirimi Jesu. “I yebaguere yu dujaricũ iɦure arĩniguicũ yu iicũ irire masibea mupũ,” arĩmi Jesu Pedore.

²⁴Jesu buhegu ire weregu, ipũre gojagu aɦraa yuɦu. Eropirã i wereri diaye ta arĩcũ masia mari.

²⁵Baja gaji sãre Jesu iimi. Iɦu iirare mari gojapehocũ iripũri gojarapũri baja tariari pũri waboya. Eropiro iripũrĩre mari dibucũ siɦajabiriboya i yeba. Ʋjũtũria waboya yu pepicũ. Iripẽta aɦraa.